

671.3901  
084  
:6

卷廿五

人物志一之二

卷廿六

人物志二之一

重修信陽縣志  
董錫賡署

重修信陽縣志卷二十五人物

人物志

古者唐虞三代建都皆在黃河南北故教澤涵濡人材薈萃西自豐鎬東迄齊魯中經陝洛鄭宋之間列聖相望百家競出其德行道誼政事文章燦著於詩書春秋戰國者可考也信陽地近南服開化較晚漢魏以降始稍有聞然有明一代大復先生學問行誼海內宗仰其詩古文辭則韓杜後不祧之宗也他如高鐵溪孟有涯之才器董重夫張季升之政績馬君卿戴仲鷗王維允之骨鯁王師竹何啓圖之忠亮李子齊錢陸石之幹濟李順卿張振猷之義烈求之漢唐亦不數覩迨及有清聲華稍遜然流風所被寬廉興起庠校相劇以道義家庭相率以禮法名臣碩儒義士賢媛雖不能如前明之多然以耳目所及二百餘年固未嘗絕生才多則甄別較嚴生才少則收錄宜廣亦作志者之通義也民國肇興風趨一變少年學子多皆抱奇氣負偉略誠能納之軌範講求實用皆邑之秀國之良也念及將來烏能不畢然高望耶志人物

乾隆志曰天地之正氣放鍾寧寧不可多得或曠世而一見或數伯樂而一見我中尚水流長賢峯聳不歷不惟功垂青史卓然不磨固

皆後先輝映卽姑德存立巖阿孤以芳自泉壤亦代禕不名乏教人若夫於賢巾哲纒來遊媛  
迹以山垂永久當表

人物志之一 照錄乾隆志

忠義 孝行 政事 耆德 文學 武功 流寓

人物志之一 照錄乾隆志

忠義

周春秋

彭仲爽申人仕楚爲令尹孫權謂潘濬曰彭仲爽申俘也楚文王以爲令

尹

前漢

范滂字孟博汝南人少厲清節爲州里所服時冀州饑荒盜賊羣起乃以滂爲清詔使按察之滂登車攬轡慨然有澄清天下之志及至州境守令自知賊汚望風解印綬去其所舉奏莫不厭塞衆議後坐黨事繫獄獄吏謂曰凡坐繫者皆祭皋陶滂曰皋陶古之直臣知滂無罪將理之於帝如其有罪祭之何益王甫詰曰君爲人臣不忠共造部黨評論朝廷虛構無端並欲何爲滂對曰臣聞仲尼之言見善如不及見惡如探湯欲使善善同其清惡惡同其汚謂王政之所願聞不悟更以爲黨乃慷慨仰天曰古之修善自求多福今之修善身陷大戮身死之日願埋滂於首陽山側上不負皇天下不愧夷齊甫愍然爲之改容

按滂邑人以非

滂已久故仍之

後漢

劉南和名邕義陽人隨先主入蜀益州既定爲江陽太守建興中稍遷至監軍後將軍賜爵關內侯卒子式嗣少子武有文與樊建齊名官亦至尙書志贊曰鎮南粗強監軍尙篤並預戎政任自封裔

傅彤義陽人仕漢爲將軍章武初從昭烈帝征吳敗於猇亭彤爲後殿兵衆盡死彤氣益烈吳人使降彤罵曰吳狗安有漢將軍而降者遂死於戰

傅僉彤之子以彤死節拜爲左中郎景耀末爲陽安關守將魏鍾會督兵至漢中使護軍胡烈攻關口僉拒守其下蔣舒率衆迎降烈乘虛襲城僉格鬪而死

魏延字文長義陽人以部曲隨先主入蜀數有戰功遷牙門將軍先主爲漢中王遷治成都當得重將以鎮漢川衆論以爲必在張飛飛亦心自許昭烈乃拔延爲督漢中鎮遠將軍領漢中太守一軍盡驚昭烈大會羣臣問延曰今委卿以重任卿居之欲云何延對曰若曹操舉天下而來請爲大王拒之偏將十萬之衆至請爲大王吞之衆咸壯其言建興元年封都亭侯丞相諸葛亮駐漢中以延爲督前部領司馬涼州刺史

八年與魏將費瑤郭淮戰於陽谿大破淮等遷爲前軍師征西大將軍假節進封南鄭侯延每隨亮出輒欲請兵萬人與亮異道會潼關如韓信故事亮制而不許延嘗謂亮爲怯歎憾己才用之不盡

晉

朱序字次倫義陽平氏人世爲名將寧康初拜梁州刺史鎮襄陽累敗苻堅都護李伯護密與賊應遂陷沒堅以爲尙書太元中苻堅南侵遣序說謝石序反謂石曰若堅百萬之衆悉到莫可與敵及其未會擊之可以得志於是石遣謝琰選勇士八千人涉淝水挑戰堅衆小郤序時在軍後呼曰堅敗衆遂大奔序乃得歸拜龍驤將軍後累功贈左將軍散騎常侍

晉書有傳按序係義陽人  
隆志作義陽平氏誤

唐

胡元範申州人武后時爲鳳閣侍郎救裴炎貶死瓊州史稱廉介有才

宋

朱修之字恭祖序之孫也元嘉中戍滑臺魏將安頡攻圍糧盡城陷太武嘉其固守之節以爲雲中鎮將妻以宗室女修之潛謀南歸妻疑之每流涕謂曰觀君無停意何不實以告我義不相負修之深嘉其義而不

告也後脫身至東萊遂以爲黃門侍郎累遷雍州刺史政在寬簡士庶悅附及南郡王義宣反檄修之舉兵雍土時儻修之僞與之同遣使陳情於孝武孝武嘉之以爲荊州刺史加都督率衆攻江陵竺超己執義宣修之至於獄殺之以功封南昌縣侯修之立身清約百城貺贈一無所受唯以蠻人宜存撫納有餉皆受得輒與佐吏賭之未嘗入己去鎮之日秋毫無犯後拜左戶部尙書加特進金紫光祿大夫卒諡貞侯

梁

張惠紹字德繼義陽人少有武幹齊明帝時爲直閣義師起歸梁高祖累有戰功高祖踐祚封石陽縣侯遷驍騎將軍時東昏餘黨作亂惠紹馳赴斬首數十級賊乃散走以功遷太子右衛率天監四年大舉北伐惠紹執城主馬成龍送京師六年魏軍攻鍾離惠紹與馮道根等攻斷魏連橋魏軍大潰以功爲持節都督冠軍將軍入爲衛尉卿出爲持節都督司州諸軍事兼刺史領安陸太守在州和理吏民親愛之徵還爲左衛將軍加通直散騎常侍卒諡曰忠

明

張琪字唯潤元季寧國人濠梁起義弟道應募屢立戰功授千戶琪獨不

求仕洪武元年舉賢良除明州知府改建麻宇作興學校躬率甲士平海寇有功授階亞中大夫力請致仕徙籍信陽泉石自娛足迹不及城市

孫顯洪武丁卯舉人卒業國子監太祖臨幸說書稱旨授工科給事中累陞工部尚書丁外艱廬墓三載鄉里推重之上嘗御闕樓睹欄楯上有紅光閃爍令人迹之則顯衣袂袍督役由此忌之會廷諍忤旨杖四十謫戍雲南密籍其家止水牛一條茅屋數間使者還報上嘉歎召復原職至中途卒於是復予八十金勅有司營葬事

葉清字源潔爲監察御史平允持正陞山西僉事景泰庚午賊入犯以清總偏頭關事時兵少賊強清募敢死士萬餘人與都督杜忠議曰朝廷厚養爾輩正爲今日予本書生願與圖報忠率驍騎於前清統勁卒於後與賊戰大破之捷聞陞參議尋轉副使卒於官

高鑑字克明信陽人武選司主事崇王之國汝寧請置守備大司馬難其事鑑曰是無難也卽移信陽守備於汝寧朝議稱便尋以事忤中貴人逮謫鎮遠通判適洞夷相讎殺督府檄鑑往輯之不服鑑夜徙居他山供帳如故遲明則臥榻已碎矣鑑從容束帶出帳中議事羣夷神之皆



叩首服遷鎮江同知夔州知府致仕鑑體貌修偉才器磊落善談辨曉音律詩書圖畫自成一家日本使臣見之歎服鑑負公輔之器不究其用至今惜之人號鐵溪先生

馮鎬字大京成化間刑部主事晉湖廣兵備平郴桂諸處洞苗上嘉其功賜豸繡二襲白金二錠巡撫畿南值逆瑾擅權諷鎬求援鎬曰此官可奪此節不可喪遂解綬歸出賜金置義田贍貧族置祭田備蒸嘗都御史唐公順之碑其事

張雲字季升襄陵知縣有惠政進給事中論逆瑾擅權下獄瑾敗獲免泣諫南幸上以忠懇不罪後以都御史提督遼東功績尤偉歷戶部尙書致仕淳雅範俗絕迹公庭卒年七十有八賜祭葬贈太子少保

何景明字仲默六歲能詩以神童稱隨父之臨洮任臨洮守李公紀奇其才授以春秋卽善說春秋歸復受尙書於兄景韶尋以尙書舉第三人時年十五諸王公大人爭迎致一見所過觀者如堵壬戌成進士授中書舍人與李夢陽邊貢薛惠輩攻古文辭振起大雅尙氣節鄙榮利並有國士之風海內皆宗尙之稱曰何李屹然爲一代山斗逆瑾用事景明移書許襄毅言大臣宜操正義以抑瑾權瑾聞而銜之謝病歸竟坐

免官瑾誅以文正李公薦復職及夢陽下江西獄又移書楊太宰爭之始得白乾清宮災應詔陳時政詆番僧義子語多激切舉朝危之錢寧欲交驩持古畫求題待命終歲卒不予一字師御史客死京邸寥鵬贈以棺景明叱卻曰吾友生不苟受奚爲受汚地下耶遂自出金賻之晉吏部員外陝西提學副使以經術世務教諸生士習文體爲之一變以病請告特旨病痊起用學使致仕起用自景明始歸日宦囊不滿三十金抵舍六日卒年三十九景明於學無所不窺天文地理律呂歷數陰陽醫卜諸家各造其妙而天才俊逸意匠圓融藝苑千秋斯爲獨步顧華玉稱其咳唾珠璣人倫之雋王元美以爲朝霞點水芙蓉試風其推尊可謂至矣自幼謙退未嘗以才凌人及論國家事當否則蹈厲憤發有萬人獨往之氣道弗合者雖隆貴人忍不與見至道藝士卽貧賤衰老尤折節下之沒齒未嘗一問家產居喪不及禫不酒不琴使滇南不持一物歸攷其行誼固蔚然醇儒不獨以詞章名世而已州故有祠汝寧太守徐公中行又立祠於府城北漆雕祠旁世稱大復先生

何景暘字仲升景明兄安慶通判時宸濠犯安慶景暘領兵捍禦勞績居多賊平賜璽書褒賞陞右軍都督府經歷進階光祿寺少卿

孟洋字望之信陽人行人選御史迎父養京邸時權奸在位洋將彈之其父曰言必得罪叵測盍歸與爾啖蠶乎洋曰兒被罪歸一同啖蠶未晚也父笑曰此爾職吾不汝禁也書上劾張聰桂尊諸不法事果下禁獄謫桂林教授稍遷汶上知縣嘉興同知陞湖廣僉事持憲專斷不能阿人意有小拂卽日引疾去嘗與何仲默書言不宜歸者三不能仕者七嘉靖初起山東轉參議陝西參政陞右僉都御史巡撫寧夏尋改提督糧儲聞孫太恭人疾解印馳歸或以職守難之洋曰吾方寸亂矣尙能顧其他哉會總理河道之命方下值恩馳封躬捧冠帔母服之甫月餘而沒人皆頌其孝云復起爲南大理寺卿纔至五十日而卒貧無以殮僚友釀金賻之賜葬東郭外配恭人何氏卽仲默女兄洋爲行人時與仲默崔子鍾田勒甫輩揚摧風雅稱十才子所著見藝文

馬錄字君卿爲固安知縣父瑀通判武昌經固安誠之曰令職字民取譽於上而民弗拊是曰民賊惟公惟廉惟汝永念錄再拜受教在固安延父老問疾苦廉明惇信士民悅服踰年有冀寇襲破固安錄被執寇見臥內無長物乃賢而釋之獨縱去獄囚去囚曰我輩罪宜死幸無竄以累吾慈父復相率詣獄徵拜監察御史督理山東馬政宿弊盡革以內

艱歸僉憲閻公剛介寡合獨時往候錄見馬羸甚以俸易稍良者饋之錄以五不敢當辭閻公歎曰古稱一介不取君卿近之矣起按南畿時嘉靖初遣使捕高唐官屬連坐五百餘人中外大駭錄上疏諫曰先帝時動差錦衣官校四出提人天下洶洶幾壞國事幸賴陛下登極祛除舊弊人始安堵不意復有高唐之命人情且驚且疑當此新政之初恐非所宜癸未巡按陝西汚吏聞風遁去辨冤振滯關內大治旋以疾家居時信陽苦河夫之役歲倍納銀重爲民蠹特奏免之困始少舒巡撫山西妖人李福達事覺錄捕抵法初福達以丹術干武定侯郭勳勳奇之相與頗密及被繫勳移書請貫錄大怒劾勳庇奸亂法勳惶懼入辨謂錄置一家無罪人於死上震怒逮錄下錦衣獄且廷鞠錄被三木但曰臣殺妖人爲宗社計陛下明並日月察臣孤忠臣死無憾上疑以屬三法司於是刑部尙書顏頤壽都御史劉文莊大理卿湯沐等會鞠如錄擬給事中王科等御史高世魁等二十五人各又奏論勳先後十餘疏上令午門外更訊頤壽仍執前詞上曰俟朕親鞠於廷楊一清以黼辰不親獄訟乃己仍會訊之頤壽等改擬福達造妖言律上怒乃命張璠攝都察院桂萼攝刑部方獻夫攝大理寺訊於闕廷萼等私議曰聖

明偶爲近習蔽不急救致有殺直臣名乃委曲具奏而輔臣有爲錄地者從容言馬錄罪大當誅腐儒徇名一死未足爲快不若投諸遠瘴於是錄與李璋徐文華劉琦程啓允盧瓊李珏章綸等坐故入俱謫戍頤壽文莊沐與侍郎劉玉等坐推按不實俱落職王科與聶賢秦佑等坐挾私彈劾俱編氓福達釋歸動置不問既而上諭楊一清等曰馬錄首事害人罪有所歸與其侈及後世不若誅及其身以從舜典訓弗及嗣之意一清曰錄無當死之罪律無可擬之條不宜法外用刑錄既戍南丹講學授徒從之者如雲歷十七年以疾終年六十有八穆廟登極追贈光祿寺少卿

戴冠字仲鷗正德戊辰進士授戶部主事會上誅逆瑾沒其財產貯之豹房而錦衣官屬監局匠役皆坐食糜費宣大陝西邊餉告急冠上疏甚激切上大怒謫廣東烏石驛丞舟行直海賊擊墮水舟子提其髮出之賊復揮刃冠髮長倍身止斷其髮波流中若有人捧而濟者乃獲不死先是冠父長史誼曾涉江夜間水中鬼哭如求援者次日募探深潭得枯骸徙瘞高原復夢前鬼致謝曰終當有以報也至是人皆以爲冥報居嶺表七年當道饋遺悉拒不受亦未嘗一字報答惟時與湛文簡若

水出沒羅浮忘乎爲遷客也有薦於朝者疏云抱經濟之猷日深日大  
希聖賢之道不怨不尤中外以爲非誣起潛山知縣嘉靖入繼首錄忠  
諫出御批戴冠當不次擢用復戶部員外郎陞延平府知府在道改蘇  
州轉山東提學副使一歲而四遷其官未任丁艱歸行李蕭然稱貸舊  
知顧姓者十金爲路費服闋起寧夏兵備副使未任以疾卒年四十冠  
丰姿俊灑含默不多言而遇大事乃憤爭不已平生專積書囊無長物  
與王守仁李夢陽及同里何景明馬錄孟洋樊鵬爲詩文氣節之交著  
述頗富多散佚世所行戴氏遠谷集未免有遺珠之憾子川貢士有詩  
名能世其家學云

王納言字維允信陽人丙戌中禮闈聞父疾亟歸省登己丑科進士授戶  
科給事中言時事得失直聲大震時吏部考選太常寺卿丞上以張鵬  
金斌仁桑有蘭徐可成任教習雅樂讀祝禮納言上疏言太常古之秩  
宗所以典神祇和上下清華重地不可廁以匪人斌仁輩本道家奴耳  
異端黃冠詎可曳組鳴玉以汚廟堂銓選者不思大義致使小人得以  
資緣忤旨繫獄謫湖廣布政司照磨稍遷嘉興府通判陞山東僉事丁  
外艱起陝西僉事分巡延綏稽察軍儲武弁知警以督府糧餉踰時致

軍變遂落籍歸田囊橐蕭然後遇恩詔復職以壽終  
董威字重夫食貧攻苦年四十聯捷歷任魏縣邯鄲知縣俱有生祠召入  
浙江道御史修京都重城巡鹽兩浙奏寬沿海厲禁按貴竹調停安宣  
撫有功任大理民號不冤撫真定延綏招降千六百餘人尋總督川湖  
雲貴平叛苗韓甸等三十六處詳在平苗軍功錄

王祖嫡字胤昌父詔信陽衛指揮僉事註誤鐫世秩祖嫡以胄子舉於鄉  
乃上書闕下白父冤得復故爵隆慶辛未成進士改庶吉士呂文簡公  
嚴重之謂有忠孝大節諸吉士以事殿置吏部掾掾走訴之部往白江  
陵下手劊欲分別議調黜吉士各自匿祖嫡獨前奮言言部掾安所坐  
罪事尋解授檢討垂十年以內艱歸廬墓側起補原官遷國子司業上  
疏言革除間事請及時釐正得旨許重錄景皇帝事而建文君事姑止  
時論偉焉遷洗馬纂修玉牒扈從上閱壽宮賜四品大紅羅衣一襲嘗  
撰明因寺碑中有塗膏燬血語微以示諷偶達慈寧宮賜以寶鑑文綺  
佛像藥物及諸珍饌尤詞林希闊事也擢宮庶以妻喪請告歸維風正  
俗閭里奉爲標準詩文典贍雋永卓然名家晚逃於禪比屬續神氣條  
然不異平日

王延世字思延號喬峯麻子祖嫡之子年十八以祖職襲指揮使十九中本省武舉第二名本衛掌印陞嵩縣守備時陸渾山中有毛胡廬三姓倡亂延世率兵勦之躬詣賊巢置金錢於百步外貫弓執矢呼賊渠曰若能中此則任爾肆掠不則通解散賊愕視莫敢動延世一發貫錢賊遂稽顙乞命陸渾平轉遼左寧遠侯李成梁幕下參謀時有蘇八害者慄悍爲邊患延世於陣次一箭殲之一日忽失延世所在上下惶貽越三日則以三首功單騎歸蓋出塞深入也陞京營神樞佐擊將軍轉神機營以扈蹕功賜麟服陞京城內外巡捕左參將延世負文武才雅有鳴鏑天山封狼居胥意緣右文之世以武功進者多仰人鼻息遂乞骸骨年未三十急流之退人以爲難家居詩文自娛時閉戶誦佛經不問外事然當路雅重之式廬者接踵崇禎元年恩詔進階二品鎮國將軍癸酉信陽中寇患延世贊勦守禦保全之功居多在林下四十餘年七十三歲卒祀鄉賢祠好施與家無餘財見時事日艱談及君父之難輒悲憤填膺忠孝其天性也博學無不通字法右軍人爭以鵝羣寶之詩文清俊有晉唐風所著華黍堂棄餘二十卷半煨於火四子俱庠生伯子星奎生不茹葷六歲卽能詩善書稍長尤工於射論者謂於左參公



猶大令之於右軍李敢之於李廣也每抱出塵之志雖爲諸生非其好也城破後僑寓武昌再破莫知所之人或見之於匡廬云

王星璧乃延世猶子早慧讀書五行俱下留心經濟談九邊阨塞及兵馬錢糧數歷歷如指掌流寇方張以諸生參總理盧公象昇幕每出密計時闖王高某者最雄桀出潼關而東璧曰流者水也就下則免汎濫矣今誘致於江淮之間乘地狹而蹙之可盡殲也盧從之璧復曰諸路將所率皆西北兵可勿憂鳳陽總督部下皆南兵恐不任戰萬一賊回鋒鳳潁則免跳可慮耳盧不從高賊至滁州圍城且破盧統師突至城下直貫賊陣賊驚走先伏一裨帥于滁側起橫擊之賊大敗領其餘黨果犯鳳陽鳳陽兵衄槍甲積如山璧復從盧尾賊而西卒擒高賊於華陰本生謀也後從盧勤王歷觀居庸喜峯冷口之勝詩益悲壯渾古蓋得山河之助云年四十卒然爲人狷忿睡毗必報人亦以此短之

李杜字子齊真定通判駐獨石馬營蒞官廉明善拊循士卒勞問民間疾苦時出禦鹵動奄旬日鹵遠巡避去先是我兵每乘間獵鹵地鹵亦蹂躪邊地相當我衆被執者懷土來歸邊將多殺降以爲己功杜兩申請具疏嚴禁鹵衆感悅內附者日益衆偶給餉逾期士卒脫巾鼓譟撫臺

知杜久得士心召議杜慰數語衆忻然解甲散總兵俞爵游擊呂揚皋  
應鏞世職杜憐其才令立功自贖遂大斬獲爵揚欲入杜子於册可得  
世弁杜笑卻之退具千金進復叱不納會鹵大至制府命大將以下俱  
受杜約束獲首功以千計杜親號識遂中惡卒制府疏其功第一超擢  
僉憲正候旨而不能待矣軍民垂泣不減峴山兩臺監司如失左右手  
爲經理護其喪歸妻子欲貌像左右曰公像戶祀之求之果得數百幅  
擇其尤肖者攜歸至於邊遠歲試不及杜請於臺使者疏得便宜試士  
士至今蔚然有文云

劉尙質字彬卿少以文行雄鄆庠沈郡公雅相器重延入西席盧某羅大  
辟持百金求解正色卻之甲午秋乙未春皆魁本房授大行奉使晉寧  
河藩寧河先王監國鉅富竟不一啓筐篋後使中州使三韓使楚使豫  
章一如使晉己亥以資望選北道御史候旨踰年會封君捐館於家不  
及視飯含哀毀彌留遂至不起大業未竟咸爲悼惜云祀羅山鄉賢祠  
子永泰永豫

劉尙樸字太卿號生白弱冠中萬歷辛卯鄉試己未與兄尙質同以進士  
起家授太原府推官風裁慷慨然陞武選司主事轉正郎疏壅滯清冒濫

諸所條奏咸勒石司前永爲龜鑑有貴戚錦衣某者求掌團營爲曹邱者徧權貴持益堅雖風以中宮意指不動也時有鐵武選之謠司舊有椒山楊公祠啓其門者輒禍及扁鑄有年公獨啓之無他人謂兩公風烈實相埒云陞固原兵憲飭勵將士劫愆邊防時河套鴟張倚公爲長城焉會兄尙質與父文學公相繼捐館舍睽戀母老丁艱後遂乞終養烏情愷切溢於章奏獲報可優游林下十有五年時遼左多事當路競以邊材薦再召寧前兵備守志彌篤年五十七卒崇祀鄉賢公廉介之操始終不渝雖服官十餘載家猶寒素布衣幅巾樵牧時與爭道不知其爲貴官也閉戶手一編如老書生詩酒自娛從不問公家事然憲戟司牧有事輒折節造訪矜式維謹胥吏衛弁無敢登其庭者自後士夫不免頹焉潰矣公疏奏詩篇甚富火於寇子永元永亨永利

李呈章字順卿號鴻渚爲諸生時閉戶力學人以處子目之中萬歷丙午鄉試力行課子弟如諸生時祖遺財產盡讓嫂姪後兩兄嫂並姪相繼物故貧不能葬傾學俸以襄事族人亦多待以舉火者乙丑署河內廣文文行課業生徒翕然宗嚮丁卯陝右聘分廉所拔識者六人榜元出其房辛未授山西遼州守廉平多惠政承平久人不知兵土城垣庫方

督帥修築流賊深夜闖入呈章坐堂罵賊不屈賊追脅移文以賺屬縣復不與遂遇害義烈有足多者

錢守廉字陸石別號雪澗戊午舉於鄉乙丑成進士授太常博士崇禎庚午分順天秋闈所取劉士璉等皆名士考選御史巡方廣東推官知縣某某以貪墨聞守廉下車卽劾罷之有爲蠱術者黨類二百餘人徧散蠱毒於飲食中歲餘毒發延術人調治愈者輒勒分其家資之半粵人苦之守廉窮治黨與盡置之法且刊刻其解救之方以示人賴以活羣不逞多扛富室子以去勒索金貲懲斃而後出之守廉以舊法太輕故不畏上疏謂宜如東北响馬例獲者誅無時報可定爲律勒贖之風遂息海上多警閩粵騷動守廉設法勦禦招其渠海波以寧後其人克以功名顯黎人煽亂守廉奏合粵西南贛諸兵削平之不解帶者數月既平虛地曠山險易以藪奸奏建連平州鎮平縣二城控制之修建之費數十萬金咸出自錫俸勸募不費公家一錢事竣歸適中州寇亂會勦諸將驕蹇多縱士擄掠守廉道值載婦女以行者問知爲某某兩大帥部也立疏劾之嚴旨切責羣帥膽落入都再巡陝右秦撫甘某罷癯不事事守廉彈之去內堵賊氛外飭邊防日夜焦勞遂病嘔血卒於任年

四十九撫臣某總理洪公承疇交疏入奏有鞠躬盡瘁死而後已之語上亦稔鑒忠勤有意大用聞奏震悼加贈太僕寺正卿舊時信陽衛有宣軍每年赴宣卽以不能塞寒死相戒爲畏途守廉疏定折價軍人咸以爲再生其他居鄉賑饑製炮修學宮濟寒士所費無慮數千金至今梓里德之祀鄉賢祠

黃文煥字幼明別號十藪十歲以文見賞於汝南郡守林公年二十五領萬曆己酉鄉薦亞魁數赴春官不第益肆力於古文詞爲詩藻豔不乏氣勢性方正非公事不入公門咸稱爲閉戶先生顧忠憤老而彌篤寇躡中原率子姪僮僕宿守城頭晝夜罔倦每日吾誓不與賊俱生城陷遂沒兩臺交請褒恤會國變未果所著有公車紀行問蛾篇迴月樓集閒語行於世

芮嘉元本衛指揮使萬曆季山東滕縣白蓮教賊亂聚衆數萬鄰省震驚奉檄調嘉元往征之嘉元膽氣無前出入賊陣辟易無敢當者每戰歸必甲馬盡血斬獲倍於諸將一日以單騎深入死事聞下詔褒贈

正芳千戶張泰運勳流賊於鍾山鍾者

石元聲字九成別號雲璈中崇禎癸酉鄉試辛巳之變衆聞寇入城咸鼠

竄元聲獨率家僮執銳登城與寇鏖戰不勝遇害撫按錄請褒恤未果

城陷復有諸生王延佑王星房同以罵賊不屈死

張振猷庠生慷慨尚義崇禎十四年流寇李自成黨攻州城振猷守堞城陷被執賊見儒冠強之降免死振猷罵曰賊奴殺即殺耳安有朝廷養士而喪節受降者乎賊怒將殺之一賊曰殺之無益盍囚之竟以針縫兩目縛於車上載至荊州禁錮數載振猷備嘗苦楚終不為屈我朝定鼎平賊荊州太守釋之令乘驛回籍卒鄉黨至今猶稱為義士

袁崇讓生而峻偉膂力過人當明季流寇方張有梟賊劉扁子據平頭塚來攻崇讓約結敢死之士同心守城時有州人韓朝陽者本紳士張某家僕性最雄桀因過被逐投入賊營用為總兵官朝陽素知崇讓技勇說賊首曰如得袁某為助則申可破也因設計執之勸之降崇讓罵不絕口誓不從賊怒重杖囚之崇讓偽降乃密修書遣使回報諸同事乘其無備攻之已當為內應則賊可擒也賊覺搽其書立斃之拋屍於井至今袁氏子孫衍盛世業詩書多入庠食廩領人以為忠義之報云

孝行

明

蔡玠字錫卿十六補州庠生母梁偶遺疾醫藥罔效玠焚香祝天割股食母疾旋愈後母卒兩事繼母皆以孝聞領嘉靖戊午鄉薦因父老病絕意計偕父卒始謁選淮安通判丙子調楊州丁丑陞淮安同知皆以治河功屢膺薦剡

劉永利字義之別號珂冷大參尙樸之季子有儁才性至孝而介辛巳寇陷州城永利縋母王氏下城母損足利負母行至河干力已竭而寇且至母欲溺河死令子得逃利不忍遂同溺顧水淺不得死復負母行哀號之聲感動行路諸避難者爭爲負母因得生歲荒人相食利鬻書籍衣物市米奉母同妻孥掘薇蕨從不肯一詣富室之門仲兄亡事嫂甚恭撫嫁姪女篤厚有加讀書手不釋卷詩歌爾雅有祖父風旁通釋典時爲方外之遊三十六卒

王綱永樂年間歲貢母患疾晝夜侍側躬嘗湯藥母卒哀毀不食廬於墓側雖盛寒蓬頭跣足負土營墓時值大旱境內田禾將槁惟綱所居周圍十餘里霖雨及時鄉鄰異之事聞詔建坊表閭

王綱袁洪均入明史成化時孝義傳

袁洪合浦縣丞父患足疾每夜焚籲祈痊父沒居喪盡禮負土營墓結廬於側旦夕拜泣三載如一日有司表閭

趙謨郡諸生家貧力學馬御史錄女弟之夫也以事謫戍南丹衛謨父文華往省之沒於南丹謨走六千里徒步扶櫬歸既葬結廬墓側蝗不入境盜賊相戒不敢犯終制上書郡學願削諸生籍躬耕養母知州唐公珣詣墓勸歸申請具題詔建坊旌表

趙謨入明史嘉靖時孝義列傳

楊歸儒生員楊漆子漆故歸儒號泣骨立負土築塋構茅棚其側刊木爲父像朝夕哀奠鄉人憐其貧遺之粟拜謝不受有司表閭

張士傑寇至欲殺其父士傑以身求代賊遂殺士傑貸其父時年十八戴伯鸞性至孝母卒伯鸞居廬啜粥非禮不行與弟伯良俱有毀容時人稱之

劉秦年十一歲父弼明病割股以進父旋得愈奉院文給匾表閭

陳秉心廩生七年廬墓捧土成墳嘉靖三十一年州牧建碑旌表

以上舊志

蕭采幼喪母父繼娶劉氏性酷烈時崇禎辛巳流寇陷城采方九齡父亦沒劉氏棄家避賊遺猪二口留采居守寇至擒猪將殺之采泣不與賊怒以刀砍其左股采負痛奔赴城上賊又追而墜之死而復甦然兩耳已被驚聾矣後逃至汝陽有老人郭某窺采天資靈敏留於家令伴子讀書采恆憂鬱不食或仰而歎俯而泣郭詢其故采曰我母不知何在



烏忍久處他鄉耶郭異之遂送歸顧母劉氏並無憫心猶責以棄猪而逃逐之留養於岳家年十五遊泮以耳疾告衣頂仍不時省視其母適劉氏疾甚醫藥罔效采虛其難起私嘗母糞覺味甘流涕語醫者曰母其危乎醫驚問采告以故醫者異之未幾母果亡采哀毀盡禮自是研究岐黃得異傳以醫著名年七十四而卒

孫瑄賈應才子年六歲以姑適孫九徵立爲嗣後姑生二子長琦次璐俱在孩提九徵旋沒瑄克勤克儉持家無偏私及弟成立其田產廬舍俱歸兩弟瑄僅留園地一畝築室居之學醫爲生越數載嗣母病篤服藥不效瑄謂其妻曰吾雖養子不能忘撫育恩也禱天默佑願以身代潛割股肉兩次和湯以進母啜之漸愈今母年七十餘人以爲誠孝所致夫瑄以螟蛉子既讓其產復刲其膚可謂孝友兼盡矣世之同胞相爭所生有忝者對之不幾爲禽獸行耶

張聯芳生時母故五歲祖父偕亡惟祖母陳氏是依年稍長陳氏得重疾半載醫藥罔效芳乃剝肉作羹以進祖母病頓愈其股上血痕漚漚芳亦不自知其痛不數日卽痊若有神佑者然鄉鄰見者歎服泣下時年十四篤於孝行罔顧肌膚殆天性使然歟

黃金筆性至孝母胡氏年老家貧力作供養母病晝夜虔禱乞以身代及危甚投藥不效計無所出忽憬然曰吾聞割股可以瘳疾乃剖肉具羹母暖而突愈享年六十有八雖由天命皆金筆孝行所致也

政事

明

戴誼字正夫弘治戊午舉人以親老仕獻縣教諭與諸生以古文詞相劇切是時何李方爲斯道啓榛莽誼相與上下其議論稍遷國子學正出爲趙府左長史獻替匡扶王遂有賢名初誼之屈志就職也原期迎養其母陳氏及受職陳以年老不任輿馬誼疏控援例分俸於原籍支給雖得請終非素願久之以致歸子冠成進士卒進階朝列大夫

樊鵬字少南父懋昭嘗爲賈不欺人曾買綿於湖廣李氏至館閱數有羨乃密如李氏問綿數李不知也卽還其羨又常買牛牧與溢三金牛家恐其知而取也設酒跪曰昨者直實溢三金吾貧可遺其一還其二懋昭笑曰吾知爾貧故溢與爾是生鵬登嘉靖丙戌進士授安州知州多惠政遷南京戶部員外郎轉工部郎中因母老疏請終養不許尋陞陝西按察司副使備兵固原禦賊有功受白金綵幣之賜以母憂歸服闋

卒鵬游於何仲默邊庭實之門與孟望之唐應德輩爲詩文友其談詩也卓有所見與康德涵書言初唐詩如春園未放之花含蓄渾厚生意勃勃盛唐則淘洗條理而生意稍薄矣近日海內名家自許古人而乏溫柔敦厚之旨少含蓄渾成之趣所以然者孜孜於杜未嘗引而上之也夫杜亦詩之變體折衷於古風斯詩爲下今人守其繩墨不離尺寸云云世以爲知言

張四知字子畏後移家於汝嘉靖間刑部主事時宗子相梁公實徐子與輩並馳聲藝苑喜新調轉相引重四知卽遨遊諸君間意獨不謂然數以口語折諸君諸君亦折四知乃愈益下帷湛精極思自攻其所好久之出其所爲古文詞類能剗削浮豔灑灑然自成一家言諸君竟不能屈也尋調駕部郎干者如蝟四知一切拒絕卽大司馬有所縱舍爲貴勢人地並無假貸居亡何出爲四川按察僉事憲體嚴重諸所懲汰尤峻賊墨望風憚若神明川東故有夏禹坊會撫蜀者阿寵臣陸炳意爲樹陸宣公坊視禹更過之四知故縮其制撫蜀者大慚恚欲有所中而四知以母病上書不待報行矣明年撫蜀者以前恨竟劾罷四知官一夕夢張平子謂曰吾宗之彥在子矣寤而歎曰嗟乎天將畀予以窮愁

著書耶因戒門者勿通賓客危坐一室旁羅圖史惟肆力於著述萬曆

丙子卒子宿次中丁酉鄉試

宿次名不見科甲表恐有誤

何立字豫甫景明仲子七齡失怙恃苦志好修才華氣節紹先起後性嚴正諸子雖貴侍側未嘗不慄慄中嘉靖癸卯鄉試懷遠知縣縣故苦徭賦諸軍餉糧馬驛傳督責旁午民逃地荒立爲羸縮輕重調劑緩急俾富無蹙財貧紓彘息清訟平罰下感上孚府役不輕下縣避罪者不敢匿鄰戶所盜發卽擒水陸毫不爲梗贖事展物賓至如歸廣招復業人予牛種三年乃徵其賦引宿通者有禁人來告著故土者日以數百計月試諸生崇獎節義孝悌而糾其違荆途遠近雍雍如也政成擢承德安署雲夢隨州俱著賢聲一時臺司嘉重僚友質成薦牘屢騰且有超擢而立浩然賦歸不獲則求齋捧以行入賀禮畢堅疏乞休朝紳高其義借賦都門解組詩以贈陳文瑞公實爲之冠行之日祖帳聚觀曰此何必減二疏耶里居結文酒社秉禮崇儉化俗維風杜門課讀絕口不干公事懷遠謳思先後請於臺使者邵公陸胡公秉性崔公廷試允建生祠徵大司寇王公世貞爲碑記詳具淮浦遺思錄中壽逾大耋臨終治命琅琅且曰人生如此而來如此而往獨往獨來正襟危坐而逝

何洛文字啓圖立之子也淵源家學少著英稱嘉靖辛酉喪然第一文衡相賀以爲得人乙丑成進士改庶吉士每試館閣輒冠曹耦授編修神宗登極擢修撰充經筵日講官數受白金文綺之賜歷中允諭德侍讀學士掌院事詹事府少詹事禮部左侍郎凡七任詞垣周旋講幄者十年每進講必先齋沐期以精誠悟主旁引曲喻用規時政及授簡詠古圖畫上未嘗不稱善乃大書責難陳善四字賜之爲講官詞臣之冠與修兩朝實錄起居注大明會典知貢舉者一主畿試者二分試南宮者一主武試者一所識拔皆海內知名士其知貢舉時取諸卷預隲之及放榜五人無一爽者人倫之鑒可知矣以讀禮歸遂致仕歲甲午中州大搜洛文素無宦囊露產振饑全活萬衆詔建坊表閔復具疏辭免仍賜金幣時璫焰張甚鄰邑幾中礦禍洛文勸朱守勿阿勿激兩河地方咸受其賜嘗與汝陽趙太宰新蔡張中丞輩爲山水游觴弈詩篇不減香山洛社卒賜卹典三子裕家弈家起家

李朝陽字鳴和幼失父事母至孝母疾篤剔肱煎湯以進母竟愈壽至八十三祖遺貲產盡讓弟庠生朝旭中嘉靖丙午鄉試任房縣知縣房地多山民刁負稅朝陽興學平法辨冤滯摘發僞印之姦兩臺郎院悉喪

嘉焉後以老母終養房人爲立生祠周貧族容橫逆貧生王一化不能娶則爲具幣內親藍子信不能嫁則爲飭奩劉茂才暴卒不能葬則爲備棺且贖其孫於萬孝廉或有稱者朝陽遽止之曰吾不欲人知也其真心行善如此孫履中繩中

黃國相字輔之端莊醇篤里人以處子稱之在庠藉甚以選貢得寧剋別駕厲操持平有王佩以過悞致人死國相鞠得其情主出旁邑故主人直指臺竟從國相議且亟稱其仁明薦陞陵縣知縣蝗不爲苗興學課藝陵邑自是科第輩出以母老乞休居家醇謹無異見稱處子時云子文煥中己酉亞魁

張如蕙字又樹號十洲以進士授戶部主事榷河西務有清介聲咨改兵部武選司郎中掌選事時吏多牟賄舞文單寒壘過如蕙一依資俸先後吏不得上下其手陞江南壽頴道寇氛充斥督兵擒勦屢著奇績晉秩太僕寺正卿及掛冠歸以詩酒自娛從不問戶外事鄉里賢之年六十四卒

清

劉檝字岸先蓀芳長子康熙庚戌進士授廣宗知縣政崇簡約下車卽周

詢民隱所欲與聚所惡勿施潔已清操陋規嚴爲禁革百姓競頌二天  
至獎導士類勤課藝而作養之邑久乏科目一經造就有李姓者卽獲  
聯捷多士迄今服藻鑑焉其他善政具邑去思碑記陞陝西河州知州  
方抵任以疾告旋卒於官子長發秀發俱庠生

張如芹字澹石號俟菴如芝如蕙如葵胞弟也文章世家名重一時且孝  
友謙謹攻苦下帷胸富五車運慳一第以恩選蒞任宣城興利除弊吏  
畏民懷兩臺首薦卓異奈勞瘁過多大業未竟週星以疾卒於署官守  
鄉評無愧召杜人咸惜之

張鵬翼字雲閣攻苦下帷文宗先正書法右軍領順治戊子科鄉薦初任  
鄆城教諭陞廣西富川知縣寬嚴並濟吏畏民懷地方亟切瞻依旋以  
註誣歸里食力著書爲後學矜式年五十九卒

周繇祖字念亭復元姪孫幼穎異能文順治戊子拔貢年甫弱冠以恩詔  
廷試上卷授江西安福令有德政民樂愷悌緣漕糧舊多逋欠繇祖催  
科政拙忤當事意尋罷歸福人懷之爲立去思碑旋里齋居一室博稽  
古今典籍課子弟足不履市然遇有公事宜舉輒能毅然獨任時值兵  
燹後文廟明倫堂鞠爲茂草繇祖率閭郡人樂輸多金鳩工庀材堂宇

煥然壯觀至其敦睦族衆調卹鄉黨惠施難以枚舉晚年種竹栽花吟風弄月壽享七旬有六子藝穀藝禾俱庠生

何繼桂丙午漢中府推官在職平允居鄉和易康熙初年祀鄉賢

何瑞徵崇禎戊辰進士廷對第二由翰林歷任國子監祭酒壬午典試江南所拔多名節士如黃淳耀諸賢皆出其門瑞徵於清朝順治元年授禮都右侍郎致仕康熙四十一年祀鄉賢

耆德

明

張端平谷知縣調壽光致仕歸至南洛逆旅拾得同寓官陳勉遺金四錠追六十里還之

孫恪臨晉知縣自幼苦志讀書天性孝友繼母傲兄曲意奉事爲孝廉時貧甚無干謁郡守唐公瑤雅敬重之及居官尤厲清操歸惟空囊幾不免於饑寒

劉鳴瑞字子鳳父仲文有隱德人稱劉長者母吳氏夢五色鳥飛鳴於庭而生故錫以嘉名髫年小試輒冠十四城李霖寰周明字諸督學咸以文行首旌眎一第可類拾數奇屢躋會尙樸李晉陽滿考且歲貢及期



勉拜恩命緘膝弗御也居恆文酒自娛雅慕公幹伯倫之爲人客至開樽盤中水晶玉版泊如也拈韻口占豪逸適上嘗語社中忘年友曰信陽北地云云其雅志可知矣與物無競尺牘不入公門里中忘其爲封君居憂兼戎嶠之幕尤稱至行云所著北征詩草行於世子尙質尙樸俱成乙未進士

劉永泰字大來號又玄侍御尙質子也警敏好學弱冠登萬曆壬子賢書下帷攻苦博通四部諸書爲人俊爽無城府輕財好施知交中多待以舉火性篤天倫事繼母何氏以孝聞雖與弟析箸而居有無與共不間爾我仲叔尙樸故遺三子甚幼爲之輯安中外撫育教訓不啻同胞讀書南成均時焦漪園先生方講學建業得盡聞新建溫陵之旨後益旁通柱下微言以疾卒屢躓公車不得展其抱人爭惜焉詩文儻邁如其人所著有楚游記南征草經史管見劉氏存稿諸書火於寇

孟說字宗傳弱不好弄父教以句讀能成誦徐授以詩輒通大義十六充諸生郡博士馮君奇其才嘗語人曰孟生目不邪視步往來不失尺寸篤行士也父卒說哀毀稍起卽治塋地手植佳樹百餘株與二兄分產取其敝者伯兄早卒嫂貧孤幼撫給備至事仲兄尤謹孝友聞於四方

從游甚衆脩贖有無弗計也性度冲雅非公事未嘗一至官府真以義命自安者宮庶王公祖嫡爲之傳

李履中字冲一萬曆乙卯舉人房縣令朝陽仲孫性孝友平生無疾言遽色從不竿牘有司五上春官不第或勸之仕曰毛義捧檄色喜爲祿養也吾母老且病不得迎養至官移孝謂何布衣蔬食吾事吾親足矣終不仕弟繩中字印可天啓甲子賢書第三人倜儻不羈詩文如其人

志舊

胡養蒙廩膳生居平昌關豪俠仗義兼有幹濟才崇禎十三年流寇肆毒擄掠焚劫平昌受害尤其里人日夜泣號養蒙乃集里人倡義言曰今盜賊蜂起人人自危將坐以待斃乎計惟築城力守庶可保其無虞也因傾產倡捐鳩工庀材里衆欣然樂輸共成義舉數月建磚城一座高四丈周圍三里從此逃者復聚居然一方保障至今城堞巍然完好人烟輻輳爲申州重鎮皆養蒙倡修之功

清

李嶽生字山斗天資樸厚青年遊泮杜門訓課深嫉奔競干謁有澹臺滅明之風父卒事母張氏備盡色養母嘗病篤厭服藥嶽生潛割左股作

羹以進母啜之遂瘳族某負糧二十金被繫獄生鬻產代完鄉黨稱其  
義暮年手不釋卷嚴戒子弟集古人嘉言著爲家訓惜阨於遇僅以歲  
薦終

何獻徵字公執宗伯瑞徵之弟生而長厚敦本慕義宗伯沒遺一子可憐  
尙在弱齡當兵燹之後家計蕭然璣徵追痛其兄加意保護稍長延師  
督課得列膠庠一切家產厚於其姪而已薄取康熙己未歲饑米貴如  
珠璣徵捐貲振粥以濟貧人賴以存活者甚多他如治比任卹解衣推  
食絕無德色猶見古人之風

孫禾字台穎其五世祖恪以詩書世業禾幼失怙克承家學齟齬受書輒  
能解大意好讀古文史書爲文邁軼不循畦轍弱冠補弟子員屢屈不  
售傳經家塾布衣蔬食恬如也父沒已久每有所觸輒痛哭失聲竭力  
事母甘旨必供從無忤言和睦兄弟析產能讓旣而兄楫亡卽以次子  
祐爲繼於是嫂獲守節而母心亦賴以安門以內從無間言其在鄉黨  
中無飾容無戾色坦懷樂易不敢以言侮人老而疾甚囑子曰汝曹讀  
聖賢書存心行事無愧屋漏天地自爲錫福每見富貴家子孫驕奢橫  
恣不數年而覆亡隨之遺玷泉壤取笑鄉里可不戒哉子祐謹受教能

讀父書歲貢生次孫鳳立成進士令赤城時以覃恩貤封文林郎

馬竣字逸民家素貧竭力事親一切家務必稟命而後行罔敢自專起居飲食尤能曲體以博老人之歡和睦鄉里長厚可法嚴戒子孫午夜篝燈談忠說孝亶亶不倦長子正午成進士誥封承德郎著有傍溪茅屋遺稿

何可儔廩監宗伯子素性慨直治家有程式一以勤儉爲主且樂善不倦見義必爲每製衣合藥以濟人鄰里通緩急者視其力不能償卽不取索見饑者給之食寒者與之衣衰老無養膳者輒周以資糧又施義塚七畝永遠認糧雍正元年河決派幫夫料合州受累求免無計可儔獨援前免河夫碑記毅然倡請上憲得以永免至今蒙麻其材略又有過人者後以老人祝萬壽賜黃衣榮身享年七十有六

張有恆字見可號聖基累世業儒家敦孝友祖守謙父本名重燮序二老俱臥病有恆朝夕侍奉親進湯藥經年不少怠篤愛幼弟有序訓課遊泮有恆山居終歲不入城最厭脂韋陋態嘗館某家一少年某以獻媚謁貴矜能有恆正言教之某怒而詆詈有恆辭去絕不與較自補弟子員及入貢苦志讀書王唐諸先正文尤所精研入闈十五科雍正丙午

房考得卷賞之評其文有兩點棋聲之致然以額限終不售年七旬而卒子鸚薦雍正己酉舉人

張本說字燕公貢生明進士如芝四世孫廩生瑀子弱冠補郡庠生食廩餼有文聲屢赴棘園以數奇不售康熙戊戌膺歲薦又十年授林縣司訓辭弗就爲人春和靜穆無疾言遽色與人無面抵亦無浮謔雖口不可得言而胸中確有涇渭其叔父庠生瑀早亡奉祖命承祀盡哀盡禮事嗣母葉氏左右就養無方內外皆以孝稱事聞撫憲以孺慕性生旌其門學憲臨汝諭各縣舉孝廉方正之士闔學悉推讓焉乾隆二年舉鄉飲酒禮延爲大賓年八十有二卒

李惟勤字業廣明經李嶽生子懔遵庭訓以勤儉和讓爲本鬢齡游泮篤志舉業數赴棘闈不售遂設教里中詠藝傳經深得古人分年日程法及門獲入鬻序者指不勝屈如馬正午尤以科第著名至家非素豐每好施與鄉鄰婚嫁殯葬貧無以舉惟勤輒慨然捐囊以助或竭力籌畫視人之患難若身受然里有唆訟陷人者惟勤力辯其誣侃侃不屈或諄之曰汝行直竊恐不利人口惟勤正色曰吾特患人不爲善耳怨我詈我庸何傷他若家敦禮讓耿介持躬闔內外肅然有矩矱里人奉爲

典型年八旬以歲薦終兩逢鄉飲舉大賓道憲李公州守朱公咸欽其德執爵而獻見者榮之

李齋字聖符號與孟州增生庠生如樞之長子當束髮受書恪遵父命以忠信孝友立品爲務父嗜酒教嚴不拘寒暑命其侍立酒後作詩爲之記稿時而月評言某某心術品行宜法若某某心術品行宜戒深夜立盹不離左右父病早夜調護不一假手婢僕或勸之休曰此非他人所能代也及沒哀毀竭情寡母高年融融色養務得其歡心兄弟式好從無間言析居讓產每以閔牆是誠言動謹飭惟恐與人齟齬至戚朋往來然諾無欺喜勸人孝友及聞橫逆不平事輒形於色拍案呼曰夫夫也獨非倫類中人哉胡悖理若是其意氣磊落然年近八旬一言及父母哀痛動人偕弟生員弘捐貲築北關西關斷處以接來脈他如不能安葬婚娶者無不助之橋梁道路亦無不助其修建巡憲李公聞其孝友親詣其家贈言褒獎州主朱請鄉飲饌賓撫憲旌其門原在修志之列州主張閱卷慕其端正提出立傳

嚴體仁吏員居平昌關生員爾翼子年六齡父母俱亡無何兄育仁亦故體仁事嫂如母撫姪如子善持家業不蓄私財姪成立育仁所遺田產

仍付姪自甘淡泊另創業成家積有餘財輒思濟人街鄰蘇貴卿貧不能婚助以十金並不責償路遇貧人胡上公欲鬻子女度荒體仁施錢五千俾爲謀生之具上公骨肉得免分離泣謝而去關西建木橋渡淮無阻並留田一分囑子孫爲永遠修橋之費州西有母猪河係往南陽大路每被河水沖刷體仁獨力修治二十餘里遂成坦途生子三人長端次敬三方俱入太學孫學山亦列膠庠天之報施善人殆不爽歟柴攀桂居游河店天性醇厚好施予廣行善事鄉鄰求無不應有姪延祚貧不自給桂贈以田莊每年計可得租三十餘石莊左右有東嶽廟及祝佛寺僧乏香火各施田一分可值三四百金不等凡橋梁道路不惜重貲修建以濟行人種種陰隲不能殫述里人徧爲勒石以昭其德李備字我皆生未週生父吉喪三年免懷時母李氏病篤備籲天祈佑家人尾而見之皆驚歎泣下卽日母病頓愈人尤奇其事以爲孺誠格天有如此者長就外傳質最魯百徧不能熟一藝讀書常竟夜不寐雖母諭以少休弗輟用是卒底於成無墜家聲伯父貢生嘉乏嗣備過繼先意承顏一如所生嘉老得痿痺病與其妻程氏晨夕扶持不少廢離凡澣濯汗穢皆身臨之不以委家人父母卒喪致哀葬務期竭力每值父

母忌晨及己生期必祭且痛哭食未嘗飽平生喜讀帝君化書於戒淫諸篇尤三復焉途遇女婦俛頭趨過友有以色誘者忿然峻斥之不復與言其賦性醇厚廉介不近名不炫異臨財無苟得議論不苟嘗至老不干吏庭制臺旌閭鄉飲僕賓年七十有三卒其季子亦復妻劉氏割股瘞翁病人咸以爲仁孝聚於一門云

李見龍住五紀屯少孤採樵爲生勤儉善生理漸致豐厚樂善好施生二子皆聰穎表表出衆人以爲積善之報也未幾見龍得嘔血症二子皆夭或阻之曰爲善不祥可以已矣見龍曰吾命也安之而已豈可因之隳乃志乎自是益修其德不吝重費建修大小橋五座平墊大路三段建廟塑神者八座施義塚三畝舍茶三年他如助人婚姻周人困乏善事尤多旣不索償復不對人言恐貽受者羞宅心忠厚天性然也壽至七十而卒里人爲之勒石撫憲賜善人碑其事俱載彰善錄

胡琰生員爲人誠實居家孝友父養中年七十因痛長子瑛病亡抑鬱成疾旋患瘋狂琰遍訪高醫調治罔效晝夜遊行踰山涉水琰呼天號泣朝夕追隨勞頓憔悴俱不知迨後狂惑益甚力大於少壯毀人房宇敗人器具琰鬻產賠償服罪鄰里爲之滋擾不寧悉憐琰之誠孝並無怨



言父病歷七載不愈瑣事之備嘗辛苦久而弗懈父沒哀毀骨立喪葬盡禮自是足迹不履街市且撫幼姪如子教以義方或不率偶加撲責扶杖流涕其存心友愛如此

葉振麟字開仙嘉善令葉蘊次子性嚴正敦倫慕義兄振珽係前母所出析產村居家漸蕭條母久喪無力以殯及父沒振麟家產漸豐慨然自任曰父母大事弟當措辦敢諉兄乎遂獨出資費將父並前母殯葬盡禮兄沒念其子孫貧無以養又分給田產使得贖足及遇人貧寒施穀給衣廣行陰德里人陳爾寧郭華泰尤蒙厚惠嘖嘖稱頌不衰早歲補弟子員博極羣書屢躋鄉闈不遇歲薦後絕意仕進嘗偕二三老友登眺放歌悠然有超世之概年近六旬連舉二子長夢龍庠生次夢熊太學生

孫佑封翁字萬受號四休居士明臨晉令格之六世孫清贈文林郎禾之子也幼聰慧貌岐嶷出就外傅時明經蔡及申見而奇之因以女妻焉歲己巳補博士弟子員丙子食廩餼屢赴棘闈以數奇不售乃益研究經史教授生徒諸生之遊其門者多所成就如張子大成袁子淳程子璫皆著名庠序間而翁三子竹立鳳立玉立暨族姪仲煜則皆口授一

經不假外傳者也翁之伯早亡伯母張止撫一女歸於金張唯壻是依  
所有田產悉與之親友中有不平者謂翁曰子胞姪也且承令伯嗣祖  
遺田產安得盡歸金壻翁曰此伯母志也人之愛所生孰不如我我第  
守本分家產耳假令金氏子姊爲兄又安所藉口乎迨後金姊沒產無  
子遺翁仍迎伯母養於家孝敬備篤鄉里咸稱道不置姊之子葉某少  
失怙恃族中無所依翁撫而痛之飲食教訓愛如己子年弱冠授之室  
葉得至於成立者翁之力也建昌李公爲南汝觀察慕翁之賢乃命二  
子受學焉他如金陵劉公鐵嶺李公皆以師席之尊敦通家之好晝日  
三接無一語及於私是以當道皆器重翁於書無不讀立身行已一  
準諸道雖以歲薦終然古之所謂鄉先生者在斯焉歲丁巳翁次子鳳  
立以癸丑進士知赤城縣事遇覃恩誥贈一代妣封一代翁與大封翁  
俱勅授文林郎語曰天之報施善人不於其身必於其子孫其封翁之  
謂乎

蔡中字庸可州庠生世居城南當谷村至性純篤克砥孝行生母早亡父  
娶繼母徐氏生二子一曰正一曰直中異母弟也中雖分居各藝凡事  
必先意承志務博父母歡父母故中教二弟讀書先器識而後文藝正

補弟子員膺歲薦直亦品行端方爲鄉黨望重直故中命次子曰良過繼承祀仍分產與良以爲事親讀書之費良亦列膠庠中之孝友仁慈真可謂順父母宜兄弟裕後昆者矣事聞撫憲雅彰善賜額旌之以爲閩里式鄉飲酒禮行紳士咸推爲介賓云

文學

晉

王讚字正長義陽人博學有俊才辟司空掾散騎侍郎

明

何弈家字成大號石城洛文仲子也生而敏異十歲能屬文大宗伯陳公經邦大器異之十四食膠庠試輒首拔聲動兩河間顧屢試不捷因長笑曰天能奪吾科名能奪吾老蠹魚乎乃益肆力於古文詞以及陰陽醫卜百家之書著竹如草六卷行於世舊信陽志皆其所論定焉尤精於天文有遠識崇禎間嘗觀天象顧子若孫曰吾老矣數莫我何爾輩其不免平靖關古冥阨塞也舊道通楚路僅在石罅中不便輿馬江黃間貴客爲燕都捷徑大關之弈家爭之不得因著平靖關議乃云不數十年民力盡於此矣其後輪蹄日夜不絕長吏叫詘其言若持左券

云諸觀察及刺史重其行誼皆願爲納交某某寢邱大猾也觀察使劉公謂弈家曰以千金易翁壹言貴其罪弈家堅辭不受臨終以學行訓其子不及其他子煥然以學行名

劉蓀芳號航石永泰長子家學淵源天資英敏髫年食餼試多冠軍諸先輩競以大器異之謂拾青紫可垂手得詎數奇不售一編風雨萬卷牙籤適同君家劉蕢之遭際也且天性孝友父疾告天身代撫諸弟有田荆姜被之風後以明經領武進知縣唯懷奉祖訓廉靜冰操日爲前令補苴夙逋寢食未遑六載艱辛心血俱枯生平詩文甚富於書無所不窺續修舊志出其手

李察倫字涵赤號丹嶼呈章仲子生而純懿篤於孝友弱冠爲文瀛博學使君試輒居一二名以數奇屢躋棘圍僅領歲薦課弟輔倫亦得領歲薦講授生徒從遊者日益衆申郟兩邑皆受裁焉生平無厲言遽色潛修株守不樂仕進不干顯達晚年留心古文詞下筆有左遷標格詩歌尤稱醇雅著有苦海賦訓人年六十六卒

戴玘字去瑕冠之曾孫天資敏異爲文獨出心裁不蹈襲人一字平生著作甚富爲後學津梁以壽終

王補之字山甫宮庶祖嫡後裔天資穎悟博聞工書家無擔石晏如也年方弱冠補博士員卽講究古人經世之學以遠大爲期州守陳公器重之延爲師課士康熙庚午續纂州志多出其手至修學宮魁閣獨力任修道憲項公彭公聞其才每以公事下詢凡宜興宜革言必中肯迨赴鄉闈不售以恩貢司鐸商水約束士子敦倫紀砥廉隅士習爲之丕變委縣篆有循聲上游嘉之後以老告歸

劉宗泗字磐濱家故貧乏楮冠鶉衣落落然自行其志不以徇人少聰慧好讀左史及秦漢諸古書力弗能購恆借諸人補博士員旁涉詞賦詩歌喜與浮屠羽士及星卜家遊旣而虞其雜也曰聖賢名教自有樂地焉用此外教爲途決然捨去講學里塾得濂洛關閩大旨遊其門者甚衆會兩親偕逝久弗克葬每對人言輒潸然泣下州守盧公聞而憐之然而家卒貧甚州守雅重文名命其來謁更周之宗泗囂囂然曰貧者士之常烏敢爲馮婦之請哉終弗往屢赴試竟數奇不遂於是嗚咽歎歎益自放於山水間每粗豪不拘繩尺嘗借題寫懷連成數藝多奇氣性嗜酒有留飲者輒盡量爲歡藐視富貴人不知有僮僕囁嚅態流俗笑以爲顛嗚呼宗泗特曠達不羈者耳安可目之爲顛哉夫世之所謂

不顧者大徑庭矣巍帽華服詡詡然鳴所長以欺人便便焉熟其機以逢世嗚呼此宗泗之所不屑爲也

王臨字智宜別號凜淵其先世宮庶祖嫡左參將軍延世皆以忠節文章彪炳宇宙然世爲清白吏家無餘資臨嘗疏水自甘苦志力學足迹經年不入市言則訥訥然不輕出諸口至經史諸書罔不參考博稽而四書諸家講義辨析尤精且於書法詩詞兼擅其妙一時請業問字者履滿戶外其評閱藝文遠近人士無不欽服時康熙戊子科領鄉薦信陽四十餘載不舉一人至臨始開之而命多偃蹇累赴春闈不第鬱鬱終老焉以故鄉里讀其詩文覽其筆迹至今尤慨然太息云

### 武功

清

余廷俊明威將軍余進昇之第三子少負大志勇力過人年十六入武庠順治二年貝勒王南征路經長臺關訪求善射之士以備任用廷俊謁王王試其能左右射大加稱賞隨給劄符授千總職銜及攻湖南辰州府苗寇廷俊有奪纛先登之功擢沅州府鎮標守備兼中左兩營事順治十八年正月初九日遇覃恩賜封誥榮及所生康熙二年陞福建興

重刊信陽縣志卷五  
化府遊擊引見稱旨恩賜頂袍奉命渡海隨征臺灣累建軍功至大別山之東以力戰亡於陣主將重其忠義以禮優恤之

王文興閩人也以軍功起家康熙八年移駐信陽開墾入籍時吳逆不臣順承王統兵進勦聞興驍勇且諳水師疏調赴楚隨征興矢志立功攻打洞庭鹿角窰斷糧道毀賊船冒險衝鋒恢復岳州直抵長沙衡州等處旋撥雲貴督營隨征連夜渡江殺敗賊衆恢復貴州思南等處王喜其屢建戰功報部議敘康熙二十二年授參府職銜興以吳賊既滅敵愾功成念雙親俱老呈請終養情詞懇切大憲題允予告還家仍以原品食俸父母繼沒興亦哀毀病卒論者謂興忠孝本於至性云

許克濟福建泉州人隸海澄黃公麾下爲右營都督康熙七年移居信陽開墾入籍閱數載朝廷以臺灣爲瀕海欲撫而有之水師提督施聞海澄公推薦提調克濟赴閩從征濟身長八尺膂力絕人且生長泉州稔知臺灣形勢先取廈門金門銅山等島續取花嶼貓嶼將軍澳等島前後克捷計收島三十有六焚賊船擒賊將臺灣底定濟之功居多云捷書上聞加功十九等授左都督銜給與拖沙喇哈番世襲因缺少人多實補陝西靖羌營遊擊康熙三十一年蒞任康熙三十五年予告尋卒

於家續奉恩旨念征臺功臣出力王家不忍廢沒命有司領帑建第子  
作楫以襲職食俸終身

舊志曰余以選舉既溯美申伯之遺化徵累朝之純粹矣若邁左文而  
右行後才而先品此尼父所深歎其難矧當濁世之末流乎然自文武  
憲邦而後代有其人要以氣節文章並重海內者爲人倫冠冕中原文  
獻於是乎在於都鑠哉澗水賢山秀色可餐後之視今猶今之視昔百  
爾君子可不勉旃

續志曰語曰十步之內必有芳草十室之邑必有忠信矧以元舅陶淑  
之遺而謂虛無人焉已乎乃摛採數十年來哲彥何晨星耶今舉其論  
定於蓋棺其實崇之祀典與確信之睹記或矯矯素絲風勵百世或洋  
洋彩筆藻繪一時以至功在封疆節成致命者若而人皆足砥頹風而  
光史冊矣抑何讓於比肩接踵歟唯天生才不盡後之君子搦三寸之  
管以隨其後可矣

流寓

晉

祖遜字士雅范陽人輕財好俠慷慨有節尚與劉琨俱爲司州主簿情好



網繆共被同寢中夜聞雞鳴蹴琨覺曰此非惡聲也因起舞遂琨並有英氣每語世事或中宵起坐相謂曰若四海鼎沸豪傑並起吾與足下當相避於中原耳及京師大亂遂率親黨數百家避地淮西以所乘車馬載同行老疾躬自徒步藥物衣糧與衆共之又多權略是以少長咸宗之推遂爲行主後人遂以遂所寄迹處名其山曰士雅云

唐僕僕先生不知何許人居光州黃土山三十年嘗餌杏丹乘雲往來刺史李休光以爲妖叱左右執之龍虎忽見其側先生乘之而去須臾雷電大至碎庭槐十餘株衆皆奔潰後有客於義陽郊行日暮投宿道旁草舍見老人與藥數丸食之便飽旣明辭去見老人乘五色雲去地數十丈客遽禮之至安陸爲人述其事縣令以爲惑衆繫之客向空祝曰仙公何事令受不測之罪忽老人坐五色雲自北方來縣令再拜問其姓氏曰僕僕野人也乃釋客今城東有僕僕塘卽其地

張懷素不知何許人寓居申州時廣平高正臣習右軍書法睿宗甚愛之與懷素有舊正臣嘗爲人書十五紙懷素乃戲換其五紙令示正臣再看不悟客曰有人換公書正臣笑曰必是張公也乃詳觀之得其三紙客曰猶有在焉又觀之竟不能辨正臣嘗許人書一屏障逾時未獲其

人出使淮南臨別大悵惋正臣曰僕故人在申州與僕書一類公可使  
往求之

舊志曰古君子重去其鄉賢者之爲寓公也多在匪鶉匪鳶匪兕匪虎  
之時士雅睠懷於茲亦非如浣花草堂陽翟別墅彼固將侈力王室不  
使神州終焉陸沈著鞭不先遂爾賈志惜哉僕僕野人近於幻懷素髣  
髴正臣儻亦有猶賢之意乎志之固愈於名不稱者



人物志一之二 照錄乾隆志

義母 孝婦 烈女 節婦



義母

漢

范滂母滂見收母就與之訣滂曰仲博孝敬足以供養滂從龍舒君歸黃泉存亡各得其所惟大人割不捨之恩勿增戚戚母曰汝得與李杜齊名死亦何恨既有令名復求壽考可兼得乎滂跪受教

范本汝南人  
志汝南人伏差  
必

有仍所之自

晉

韓氏朱序母序鎮襄陽苻堅將苻丕苦攻之初丕之來也韓自登城履行謂西北角當先受敵遂領百餘婢並城中女丁糾築城二十餘丈賊攻西北角果潰衆便固守新築城丕遂引退襄陽人謂之夫人城

明

何氏大復先生女適參將袁燦數年無嗣勸夫置妾夫不欲氏擇良家女數人侍夫生子三人撫育不啻己出燦卒於官子皆幼苦心教誨俱爲諸生以夫貴封恭人屢經藩臬有司表閭

孝婦

明

袁氏瑤女指揮王詔妻詔以冤繫獄償餉甚多袁晝夜苦心經營佐費卒出夫於獄夫卒事姑耿氏盡孝課子祖孀讀書登第歷官庶子終雪夫冤年七十八卒

王氏庠生楊徽聲妻奉姑蕭氏以孝聞蕭久持齋素一夕病篤思肉氏不忍姑老毀戒自割左股啖母病隨愈兩臺題旌

饒氏黃慶先之子婦也年二十值姑病篤刲股禱救里鄰舉其孝州守給匾旌表

清

趙氏農官永清女余備妻姑薛氏病篤藥醫罔效氏割左股烹食姑病旋愈有司表閔

烈女

商召南申女者申人之女也既許嫁於鄧夫家禮不備而欲迎之女與其人言以爲夫婦者人倫之始也不可不正傳曰正其本則萬物理失之毫釐差之千里是以本立而道生源潔而流清故嫁娶者所以傳重承業續先祖爲宗廟主也夫家輕禮違制不可以行遂不肯往夫家訟之於理致之於獄女終以一物不具一禮不備守節持義必死不往而作

詩曰雖速我獄室家不足言夫家之禮不備足也君子以爲得婦道之儀故舉而揚之傳而法之以絕無禮之求防淫慾之行焉

出劉向列女傳

明

某氏婦不詳姓字明末城陷於賊遇婦將辱之大罵不從賊加以炮烙罵益甚時方懷姙腹爆如雷而死

以上齊志

貞烈姚女許聘陳時未字勢宦某伺豔其色欲污之不可得遂誣陳時及女父姚天眷爲僕致成獄女知身存難免魯污遂自刃於公堂死時白日無光烈風突起後天眷叩闕上聞旌之此崇禎末年事也塚在州指南指南院西有新舊二碑

明

張氏生員張英女甫五齡生員余之績爲長子余懋委禽焉年及笄未婚而懋沒氏聞訃投繯祖母解救得甦誓不易志往執婦喪奉舅姑歷三十餘年無少懈學憲湯給匾表閔六十餘歲卒

張氏貢生張景杖次女許聘吳士楷未于歸而楷故女年十八請隨母往弔遂留夫家執婦喪禮悲痛哭泣至於喪明乾隆三年詔建坊旌表程氏許聘潘洪洪未及娶而病卒氏聞訃奔喪矢志靡他泣血三年拜墓



釋服撫繼子以承夫祀奉事孀姑克盡婦道今年五十一歲里人欽其貞孝云

節婦

明

周氏指揮王璽妻夫卒年方十九舅姑以家貧無出令再適周矢志不從竟以節著

耿氏璽弟指揮王瑀妻夫卒年方二十生一子多疾氏斷髮自誓與媼婦周氏同心守節幾五十年事聞建坊並旌

袁氏指揮陳鎮繼室子歸兩月鎮亡於陣袁年方十八卽毀容矜節孀貧四十餘年卒

鄭氏生員孟樸妻夫沒年方十七無子以死自誓六十七歲卒有司表閭王氏生員周嘉賓妻夫亡年方十九績紡自給親族罕見其面年七十餘卒有司表閭

沈氏高述妻夫卒年方二十三子幼誓不易志子又卒辛苦甘貧五十餘年而沒

周氏生員李柯妻柯母齊氏胡氏早歲孀居旣而柯卒氏年方二十四一

子彌歲苦志撫育事兩姑孝謹備至里稱一門三節屢經有司表閭

周氏生員黃洛妻夫沒年方二十五無子矢節哭泣喪明六十四歲卒有司表閭

王氏黃燦妻夫沒年方二十遺一子守節四十餘年卒有司表閭

李氏胡廷瑞妻夫卒年方二十四無子守志年七十而沒

彭氏劉養性妻夫卒年方十九願與偕亡顧其子甫三月所親力勸乃起而鞠子子年十四度可自立適其姑卒舅娶再醮婦強之拜氏掩面號泣曰失節之婦吾何忍見之遂閉戶雉經死

李氏生員張大信妻並妾邱氏其弟生員大教妻章氏俱青年守節宮庶王公祖嫡作贊以表之

辛氏生員蔡人俊妻人俊病氏躬侍湯藥不暇餐沐及俊卒乘夜自經屍側家人驚救移時張目曰我何用生爲言已絕粒至困斃姑持糜哺之強進少許旋復不食如是者五十日躄踊哀號聲徹閭巷路人爲之流涕竟以哭泣而死事聞建坊表閭

何氏監生王鳳徵妻僉憲王納言孫媳檢討何洛書之女年二十無子而寡庶出子嗣祖方穉祿夫死之日欲自盡或勸之爲庶子慮乃進粥餼

訓育嗣祖克致成立撫按交題建坊旌表歲給廩米贍之終身

何氏御史劉尙質繼室學憲何景明孫女事姑敬慎循循有禮年十九而寡無出黃鵠矢歌闡範整肅懷如也撫育前子永泰登賢書永豫食庠

節越三十餘年卒節孝之聲無間中外云

李氏適曾壽年十九夫沒遺男映芳方二歲氏誓從泉壤翁姑指遺孤勸止之嗣是饑寒交迫侵侮並至氏備極拮据及公姑繼逝並有公之父貢生希堯遺殯兵荒之際三葬疊舉前後成禮觀者驚歎口授映芳經書有聲膠序事聞按臺給匾旌褒

張氏適庠生李呈秀爲繼室撫前子振倫如己出及生子匡倫甫十月秀卒氏年二十餘矢志撫孤日勤女紅教育二子側室張氏無出感其苦節誓與俱守崇禎癸酉賊破南關張氏自縊死辛巳城陷氏亦被難一門雙節至今稱之

張氏本農家女諸生湯文灼妻文灼病篤氏以死許之夫死氏盡以衣飾散給中外公姑母氏爭勸阻之不聽越七日縊夫柩前年甫二十餘王氏生員胡翼子之母夫亡時氏年二十翼子纔四歲內營衣食外持門戶艱苦備嘗翼子就外傳訓課甚嚴稍不率則號泣曰不如早從亡人

於地下矣翼子學成有聲氏年六十餘卒冰蘖之操歷數十年如一日  
柯氏遼州牧李呈章之原配高氏其側室也同夫之任遭流寇猖獗自度  
難支呈章與二氏訣曰我有官守宜與社稷爲存亡汝輩各攜子歸里  
爲宗祧計無以我爲慮二氏泣下曰君死社稷忠也獨不聞婦有殉夫  
之義乎願生死無相離也章是其言但慮倉皇求死不獲其若身名何  
二氏哭別就道家居一載章遇難信至二氏躡踊哀泣相向投縵諸女  
戚解救而婉勸曰汝忘夫遺歸之意乎欲各保其子也若憤不顧子不  
亦重傷泉下之心乎遂勉進水漿艱辛教子越數年信陽城陷二氏據  
地大慟曰避遼州之難而強生蓋爲子也今子可自立正我兩人見夫  
之時矣攜手墜城而死子三徵倫察倫柯出輔倫高出能讀父書

李氏明經李察倫之女年十七適石儀鳳春元石元聲之子也城陷氏公  
遇難父家業灰燼紡績供夫讀書二載而夫遊泮歷三年而夫故氏年  
二十二號天搶地以死自誓姑爲泣勸曰我不幸兒亡倚媳爲兒也爾  
忘姑之西山暮景乎母亦泣勸曰汝父無兒賴汝送終也汝忘父之悲  
同伯道乎且忘夫柩之未厝乎氏憬然有悟乃勉進粥餼殫力營葬侍  
奉孀姑贍養父母賴叔父佐其不逮凡生事死葬之禮靡有闕遺氏艱

辛六十三年內外無間言州牧學憲給匾旰宗伯何公爲之立傳  
張氏拔貢張宰長女年二十歸生員孫楫越三載夫病篤醫藥罔效割股  
禱救竟莫之起氏枕尸嘔血絕粒者數日父母解慰曰汝有娠矣寧忍  
夫爲若敖氏乎因稍進匕粥以緩須臾未幾生女氏仰天大呼曰已矣  
吾望絕矣可從夫於地下矣父母見氏號泣幾絕復哭勸曰汝念遺腹  
而強生獨不念老親而遽棄於心安乎何不歸依父母撫育此女以俟  
其長成也氏泣而歸及女長適武舉金國祥爲室氏以苦節壽終閨學  
具呈公請題旌

胡氏生員王士禎士弘之母當流寇陷沒州城氏夫縶城傷足寸步維艱  
且賊尾其後氏盡出所攜衣飾僱難民負逃脫夫難於危急之際閱數  
年而夫故氏年未三十時舅姑垂老兩子俱在沖齡兼值荒歉之年氏  
忍死支持饑寒備歷生事死葬婦道克全教子業儒和熊助學茶苦三  
十餘載二子一孫咸列膠序節孝並篤允協輿評道州給匾旰閨年六  
十七卒

謝氏左氏皆貢生蔡屏周兩媳也謝年十六歸蔡之三子生員蔡嶠生一  
女甫二齡夫故氏年二十二絕粒誓死其姑泣勸曰汝夫止此一點血

汝死女安生乎抱女持糜勸之進食氏哽噎勉從後女長成適戴生二子女亦寡攜子歸謝母女雙鬢禿禿相守既而山居遭火延及夫柩氏覆柩哀號願與俱焚火忽反風自滅左年亦十六歸蔡之四子蔡崑生一子周歲夫卒氏年十九一慟幾絕抱遺孤誓夫柩前矢志與娣婦謝氏同守姑病二氏焚香籲天各願減算以益姑姑隨愈得享壽考人稱兩媳節孝所感崑子名淑尼讀書入泮

李氏生員鄭端之母年二十八夫故家業貧寒上有七旬公姑下遺三歲孤子氏力供菽水事二人甚謹及公姑捐舍拮据營葬克盡其禮端就外傅以紡績供膏火卒成佳士名列膠庠兼撫兩孤姪成立完婚猶如已出屢經道州給匾旌閔八十四歲卒

胡氏劉蓀芳元配侍御胡公秉性孫女氏通文墨熟習列女傳辛巳賊陷信陽子穢甫十歲氏攜子率僕婢逃難以賊衆擁街巷不得出乃語一老僕曰事急矣子母度不兩全以子屬老僕他遁遂自盡子獲免卓識烈行蓋久而彌光云

高氏已故庠生李翼倫妻奉事孀姑孝敬備至辛巳罹城陷之變氏有女三人少長俱未婚母女無計逃生同投井中死節母烈女出於一門里

人哀之

清

曹氏年二十適李金蘭父家夫家俱業農貧民踰三載生一子甫二歲夫患癩癘氏紡績佐藥餌竟弗起氏年二十四絕粒誓不欲生氏父鄰嫗共指遺孤諭以承先啓後之大義氏勉進湯水竭力營葬家寒徹骨衣食俱取辦於針黹越明年子陡以瘋癘氏撫膺慟哭頻呼絕望兩字氏父將兒出瘞氏以留守一夜給之屆三鼓氏自經於兒側矣氏生非詩禮之家長無節義之訓矢志從一視死如歸紀之以闡貞德

周氏繇祖長女廩生劉彥芳子庠生劉杞之妻年十六于歸十九夫故哀慟踰節兩目喪明里人咸義重之後歸養父家守節三十九載至五十有九卒

陳氏兵憲巡道陳公聯璧女生員危山斗妻年二十七山斗卒號泣終日不入水漿殮棺後自縊幾絕祖姑排闥救之時翁姑俱老長子琦甫六歲次子瑜甫三歲三子琮尚在姪翁姑泣諭曰翁老子幼徒死奚裨陳遂以養老撫孤自任後翁以痛子得魔症亂命他適陳曰翁忘前日訓乎柏舟之操益堅翁病篤湯藥親嘗奉侍惟謹既而翁沒姑亦相繼云

亡喪葬盡禮教三子成立先後入泮苦節四十餘年而終雍正十一年  
建坊崇祀 以上舊志

尹氏生員尹相湯女危山斗次男生員瑜妻年二十八瑜卒誓以身殉姑  
陳氏曰我昔欲殉爾翁舅姑責以養老撫孤遂不敢死爾盍效我乎尹  
如所命克盡孝慈後姑沒拮据喪葬既而子拱辰亦死攜幼孫晰淖依  
姪映辰度日年七十六歲卒雍正十一年請旌與姑同坊崇祀

劉氏劉玘女年十九適庠生袁悌生子履中甫五歲時方懷妊而悌卒氏  
絕粒不食願以身殉姑婉言勸止未幾生遺腹次子履端乳名曰守以  
見志焉家本赤貧紡績度日奉姑至孝養葬盡禮撫育兩子有義方之  
訓苦節五十三載卒雍正十二年事聞建坊崇祀南道崔琳爲之作傳  
席氏肆筵女生員高仁妻仁故氏年二旬有五翁姑早喪子甫六月誓不  
改志竭力事祖父母撫子成人守節二十九載而沒雍正十二年建坊  
崇祀

葉氏生員葉莊女年十八適生員張珺事翁姑至孝五載珺故乏嗣氏三  
日不食姑命以夫姪承繼始進水漿撫養教訓不啻己出守節六十五  
載而沒乾隆三年建坊崇祀



陳氏吏員陳洪範之女劉洛源妻夫故時年十九事姑以孝撫子以慈苦節三十三載而卒乾隆三年建坊崇祀

饒氏饒鐸女年十八歸生員張有庠庠病篤氏禱神願以身代庠故哀毀絕食翁姑婉勸止遂以子職自任生養死葬竭誠盡禮衰年禿獨茶苦終身乾隆五年建坊崇祀

胡氏郁文女適張有謨謨故氏年二十四與饒氏爲妯娌同懷冰操各以節終乾隆五年並建坊崇祀

李氏生員李延申次男李吉妻年十七適吉生子備甫七月吉故時年十九矢志從一撫育遺息教以義方年六十卒學憲給匾旌表

余氏宋質妻生員余希孔之女年二十有四夫故守節孝奉老姑教子入泮八十四歲卒州守表閭

杜氏吏員王靖妻靖故氏年二十五遺二男長二歲次月餘氏身任紡績撫子承家守節四十四年卒

任氏年二十二適生員鍾百川未四載夫故乏嗣別門無可繼立義不欲生因家貧不能具葬晨夕紡績積微資卜吉葬夫棺出卽絕粒不食七日而卒

陳氏周其煥妻陳尙貴女年二十二夫故遺一子名勳氏欲殉夫翁姑指藐孤以勸乃不死孝養尊闈喪葬以禮後勳入太學年三十病故氏痛夫失嗣七日不食卒

蔡氏福建衛千總王榮妻康熙八年隨夫移住信陽生子鸞僅一週榮故砥節撫孤畫荻以教後鸞入泮食餼登歲薦皆氏義方遺澤苦節六十載年九十卒

陳氏年十九適王濟民爲妻越十一載濟民卒遺四子俱未成立氏備歷辛苦以撫孤幼稍長延師訓課子弼孫睿俱入庠守節六十五年至九十五歲卒

譚氏年十七適楊澤生一子甫二週澤故氏年二十七歲氏念姑老子幼矢志不移壽至八十八歲

陳氏天培女生員李貞遠妻氏年十九夫亡無子撫姪李錦爲嗣愛如己出善事翁姑人以孝稱苦志四十餘載乾隆三年建坊旌表

王氏貢生王銓女劉廷秀妻年二十三秀故無子氏誓不他適孝養翁姑克盡婦職守節三十餘年乾隆三年建坊表閔

葉氏生員葉振琦女適郭象儀年二十有二夫故無嗣氏欲殉夫姑與母

泣勸乃不死立姪以續夫祀貞操歷三十餘載乾隆三年建坊旌表

黃氏黃道女適周文爽七載爽故矢志守貞奉六旬孀姑撫三齡弱息苦節四十三年孝慈並著乾隆三年建坊旌表

蕭氏生員蕭定漢女適儒童蔡淑程一載程故氏事孀姑苗氏左右就養立姪爲嗣教訓成立家遭回祿伏護夫柩風迴火滅咸以爲貞節之感迄今守志三十二載乾隆八年事聞建坊表閔

鄒氏呂國林妻國林與鄰人呂國璽相約採樵國璽晨往喚國林知其己出鄒氏尙寢遽入室求姦鄒氏喊罵不從國璽奔逸鄒氏忿號三日自經死事聞旌表

熊氏庠生張秉性妻賦性賢淑子正度七齡秉性亡氏年二十九欲以身殉父庠生熊耳諭以養老育幼悉賴爾一身力止之氏感悟守節事翁姑惟謹病篤氏禱天祈愈旣而偕逝氏竭力營葬如禮教子讀書正度獲列饗序至氏勤儉持家和睦周親族黨稱爲女宗年五十九歲卒里人請旌州守張公區其門曰節著松筠

任氏年十七歲歸余成龍越八載夫沒子翼方七歲氏甘守冰霜養老撫孤無何翼方亦亡慟不欲生親族勸慰立姪鶴爲嗣氏乃稍慰勤儉治

家孝事翁姑教鶴弱冠入泮氏年七十八歲卒

危氏父履安夫劉信俱州庠生結褵二載信亡年十七遺孤繼曾方在襁褓柏舟矢志布衣蔬食留甘旨以養舅姑既而姑逝舅娶繼姑蔡氏生子伸尙幼舅又逝氏哀毀骨立祭葬盡禮尤善事繼姑毫無間言命子繼曾與夫弟伸同學攻書嘗於寒燈紡績之餘揮淚以教曰吾姑媳二人孀居惟期汝叔姪發憤無墜劉姓科第蜚聲也無何繼曾故遺二孫俱幼相依爲命苦節四十二年而卒

張氏貢生張正己女年十七歸生員周時遇克執婦道夫病篤祝天泣禱願以身代及亡哭泣哀慟水漿不入誓必死其姑陳氏百方勸慰始進飲食然己哀慟成疾尤勉事翁姑朝夕罔懈沒後衾棺窆窆之事皆氏備辦子伯祿稍長挑燈課讀稍懈卽揮淚斥之及伯祿入太學忽一日氏沐浴更衣焚香拜祖辭家人謂伯祿曰爾父去世吾年二十五歲今又歷二十五載爾今成立宗祀有賴可以報爾父於地下矣言訖臥床瞑目而逝人皆驚異

劉氏劉興旺女年十六適張銅彈父家夫家俱佃農貧寒一載夫故號泣絕粒誓以身殉翁姑泣慰之不聽殮之三日竟自縊柩旁氏以青年內

則未嫻能曉大義視死如歸此閨門正氣也紀之以維世風

楊氏劉卜世妻原籍湖廣寄居信陽劉甫周求姦不從投繯畢命事聞旌表

郭氏貢生郭塚女適生員曾肯樓夫沒氏年二十誓以死殉姑嫂防護甚密因營葬夫柩柩甫出氏於寢所以被蒙首用繩扼喉而絕顏色如生夫兄生員肯堂以次子衍椿承祀學憲府州牧共旌之舉人王臨爲之作傳

符氏胡祺妻祺故志在殉夫營葬後拜別姑與母欲自盡因防護甚密不得間遂謬爲安居狀密於牀第投繯而死有司以節烈旌其閨

劉氏生員劉英哲女適儒童蔡日恭甫四載夫故無嗣營葬後自縊死道憲李公嘉其貞烈撰文勒石以垂不朽

余氏州人余俊女歸吳必政結婚九載必政故氏年二十五時翁早喪事姑孝謹姑病九載氏奉湯藥如一日姑亡哭踊盡哀喪祭靡不盡力遣二子長錡次鎔俱幼擇師從學考課惟嚴鎔入泮錡早亡妻葉氏矢志守節事姑余氏能得歡心乏嗣以鎔子宗伯爲繼入太學未幾姑亡弟鎔並嗣子夫婦相繼俱沒葉氏哀痛不已幸遺孫昶方四月氏撫育成

立余氏苦節四十八年葉氏守節四十年一門雙貞後先媲美而葉氏零丁孤苦晚節益勵至其周恤姻婭和睦妯娌尤爲鄉黨稱頌云

羅氏生員黃瑄次子色煥妻也年二十七夫沒乏嗣悲泣投緘幸家人救之時姑丁氏年七十嫂嚴氏亦孀居共相勸解氏泣悟立生員色灼之子鑑爲繼氏與嫂日事紡績以養姑丁氏病篤醫治二載罔效氏忍痛割肉以進竟愈姑死之日鬻簪珥以營喪葬兼盡子職未幾嗣子亦故氏艱苦備嘗益勵貞操年六十有五孀居三十八載節孝兩全鄉里奇之

井氏柴蘊奇妻年二十二夫故家赤貧父勸他適氏怒永不歸寧戚黨有言及此者面詈之立夫弟負奇子爲嗣守節二十九年有司表之

張氏貢生張治女歸生員胡矇年二十有三矇故家貧氏甘淡泊勤紡績以事孀姑撫孤子守節五十一載年七十有四有司給匾以旌

周氏曾廷佐妻年二十有六佐故長子甫二齡次子尙在姪氏誓以身殉翁姑泣勸乃止苦志守節克孝克慈今八旬有奇州守表閭

薛氏吏員彭九乾妻生子甫二齡夫故氏年二十守志完貞教子成立今年六十有三有司表閭

楊氏忠烈楊公漣之曾孫女適生員潘性恆未數載恆卒遺一子氏年二十八守志撫孤既而子又沒僅存幼孫育之成立苦節煢煢迄於白首有司旌表

周氏常玉女適生員曹五尊夫故氏年二十有六遺子二長本初四歲次復初二歲氏矢志靡他養老撫孤守節三十四載學憲旌表

曹氏周繇祖長男庠生蕪毅妻適毅四載生子瞿估俱幼毅故氏青年守志至六十有五卒楊氏繇祖次男庠生蕪木妻夫因痛兄成癱疾翁年七十有三亦染瘋症氏侍疾維謹既而夫故乏嗣誓持苦節立姪瞿以承宗祀瞿入府庠復以病故遺妻王氏年二十七冰玉自矢一如其姑學憲以中閫三賢旌之

陳氏吏員蕭芬妻年二十三夫故守節迄今三十四年學憲有司表閭任氏貢生任先覺孫女生員任聲女年十八歸廩生王重九載夫故姑老垂白二子俱幼仰事俯畜竭力持家後姑卒喪葬盡禮爲長男擇配左氏八年而長男沒遺媳又寡氏備歷多艱以婦代子以母代父苦志四十年今六十八歲次男日新入太學

程氏黃法憲妻法憲故氏年二十九翁姑老子幼家甚貧砥志守貞養老

撫幼勤苦四十餘年鄉里敬之

危氏生員危映辰女適儒童張士未三載士故氏年二十二家貧甚上有孀姑下遺孤兒氏備歷艱苦奉姑教子至今三十餘年子積厚入泮李氏呈章曾孫女適楊恬生一女甫二齡恬病故氏年方二十二誓欲殉夫嫂李氏密防不得遂至百日治肴饌拜夫靈夜深自縊面色如生學憲表其閭

周氏周文美女余珮妻夫故年二十四遺一女誓死殉夫伯姑勸止之撫夫堂兄生員余琬次子以續夫後歷今守節三十三年

方氏世職方一虎女年十五庠生李穡爲子天眷聘娶甫三載夫故無嗣遺一女亦殤時翁姑俱患癱症氏晨昏侍奉十餘年翁姑卒竭力營葬盡誠盡禮人稱其節孝雙全撫嗣子緒延夫祀

曾氏父國侯許聘儒童朱姚濬未婚濬故時年十九氏聞訃引刀刺面誓不他適遂往執婦喪禮翁故後家業蕩然氏採茶樵薪以奉老姑貞範孝行白首彌彰乾隆五年建坊旌表

劉氏庠生劉長發女貢生陳疇子亮節妻年十六于歸未及一載亮節沒越月生遺腹女氏以子嗣失望欲投繯自經姑楊氏泣勸乃止躬勤紡



績奉養翁姑翁姑卒衣衾棺槨皆出其手苦節五十餘載宗黨稱之

陳氏天培女卞孝妻年二十五歲夫故懷妊未育族人爭析其產氏歸依父母踰月生子名學撫養成人退回分產大興家業皆氏苦節操持之力人稱爲巾幗中丈夫云

何氏建極女年十七歲適余象賢歷五載夫故氏剪髮毀容冰霜自勵孝事翁姑持家勤儉癸亥年姑大病氏割股以進姑病旋愈族黨稱賢今已五十二歲苦節三十一年

張氏余仁之妻年十八于歸四載而夫沒姑唐氏年老子玕方二歲氏堅志矢貞孝慈兼篤不幸玕及成人又以疾亡合族議立姪孫余大義爲玕嗣以承禋祀氏守節四十二年今六十四歲

王氏慶先女王治妻年二十三夫故遺二男長樂天甫四歲次樂禮甫二週姑年逾六旬氏養盡孝喪盡禮教子樂天充州庠生守節三十四年學憲有司給匾旌表

王氏王克讓女年二十歸生員孫大千越三年夫故氏上事孀姑下撫嗣子克勤克儉盡孝盡慈守節五十一年今七十四歲學憲給匾表閭

龐氏何呈休妻年十七歸爲繼室前妻傅氏遺子建極氏撫若己出氏生

一子建安甫二齡值夫沒氏年二十七時翁姑衰老二子冲幼氏以媳盡子職母兼父道勤苦四十二年州里共嘉其節

許氏適曾唯生子信甫七月唯故氏年十八誓以身殉姑力勸乃止事姑以孝撫子以慈苦節三十一年

張氏何出書妻歷九載夫故時翁亦新亡氏年二十五殯葬兩柩拮据盡禮遺有三子長敢測次敢量三文龍家計蕭然教以耕讀文龍入泮悉承母教苦節三十五年現今五十九歲

胡氏明御史秉性姪孫女年十六歸於生員李正祚克盡婦職夫故年二十四哀毀備至遺二子長錦次繡孝事舅姑撫育弱息持家勤儉與嫂陳氏同懷冰操陳氏子鈞夭痛不欲生氏以錦繼之朝夕溫慰未幾氏次子繡亦亡雙節共守一子同室棲息和睦無間錦入太學以次子振廷繼繡後皆氏義方之教云

陳氏生員陳力女監生柴建隆妻也建隆故年二十九遺子齊躬親紡績午夜教讀齊入太學恪守母訓氏益勵節操鄉里賢之

陳氏王翼妻家赤貧翼傭工爲生沒之日氏年二十六上有孀姑余氏年五十餘遺子國良甫三歲零丁孤苦躬親操作以養姑未幾其伯兄某

欲奪其志氏泣曰婦人從一而終義也若云再醮有死而已決不從命及逼甚卽自縊得姑救甦自是人不敢犯今國良年四十三歲尙未定婚母子相依只有茅廬一間衣不蔽體或日得一餐或竟不舉火乃苦節自貞始終不渝歷今四十三年現年六十八歲

余氏生員余琰女年十六適潘俊結褵十二載夫故誓以身殉或勸之則曰吾夫已死何以生爲得從夫地下吾事畢矣竟自縊幾絕其姑救甦慰之曰爾有子性繩可以相依爾死其誰撫之氏悟從姑命撫子成立以紡餘資爲子援例入太學守節五十三年壽八十

余氏生員余仲女曾任妻也年十五于歸宜室宜家閤族稱羨夫沒矢志守節善事舅姑遺子孔援甫五歲遺從師愛而能勞家貧仰事俯育之資皆出十指餘守節五十五載今壽七十八

李氏生員潘宗洙子鼎謙妻年三十歲夫故家貧矢志不他適教子珣讀書食廩餼守節三十五載

閩李氏鄉民李祥之女年十八歸閩恆心爲妻躬親紡績佐夫夜讀恆心得列名庠序閱八載恆心故時氏年二十五歲哀毀骨立不至滅性曰上有翁姑下有二子皆未亡人責也凡事先意承志務得翁姑歡使不

知有喪子之痛翁姑亡以媳代子葬祭之禮必誠必慎教二子有陶孟遺風長子章以夜讀致疾氏歎曰一領青衿吾福薄亦不能得之於子乎厥後章先亡氏感泣成疾年六十一而卒次子登以敦樸著聲於閩里間

楊全氏鄉民全選之女年十七歸楊士傑舉案齊眉與孟光媲美尤能佐夫勤讀士傑得早歲遊泮閱七載而士傑亡時氏年二十三歲伊母全羅氏孀居婦也慰之曰予早寡無子所以未從汝父於地下者爲汝在也今汝不幸亦寡然翁姑在堂幼子襁褓承先啓後皆汝責矣氏奉命唯謹事翁姑以孝聞撫幼子成立里黨言苦節者咸推全氏而伊母羅氏之教亦並彰云

全羅氏適全選全李氏適全聲選聲胞兄弟也李氏年十九聲亡羅氏年二十三選亦亡俱無子族中又乏昭穆相當之人可以承繼兩寡無依甘心苦節羅氏以夫喪過哀失明李氏事之如姑終身罔懈羅氏年七十有二卒李氏年七十有四卒用合志之以表苦節

蘇東侯妻楊氏家本望族年十八適蘇奉舅姑唯謹相夫子以順閱六載而蘇亡楊一慟幾殞以舅姑在不敢死且亡人所遺二子俱在襁褓中

氏上奉舅姑生事死葬悉以禮下撫藐孤至於成立長子華身列膠庠氏享年七十餘承先啓後雖大家龐氏不過矣

蕭余氏庠生蕭芑之妻結褵六載生子二長武備次奎光奎光當芑未故時已繼蕭李氏爲嗣李氏者蕭芮妻也芮與芑爲胞兄弟芮先亡李氏撫奎光得不死後二載芑亦亡余與李遂稱雙寡焉時老姑在堂二子幼弱仰事俯畜同心協力姑享大年終子亦相繼遊泮蕭之家業家聲賴以不墜里族羨其冰玉雙清因公呈請旌云

齊李氏齊蕭氏妯娌也生於名門均嫻婦道李氏適齊秉仁三載而寡蕭氏適齊天眷二載而寡歎曰吾姑生三子相繼亡其二姑老弟幼我二人又無子息何門祚衰薄至此極耶顧姑痛不可增夫祀不可絕擇族中昭穆相當者各立一子朝夕承歡以慰姑於暮年至祖遺田產弗與夫弟計多寡也娣姒同心始終一節洵巾幗中之雙玉云

胡蔡氏貢生蔡義之女年十四歸監生胡其永結褵八載生二子一女其永亡子女亦相繼而殤氏以翁姑在堂唯餘一媳子道之託誼不容辭乃朝夕奉侍就養無方及其沒也喪祭以禮胡族無應立之子謀立孫有族孫胡大鵬甫三歲撫養之年十八娶堂姪蔡薰之女爲孫媳閱四

載而大鵬又亡孫媳蔡亦守志不渝雖生人之痛於是爲極而再世苦節爲彌著云

葉王氏鄉民王仲立之女年十八歸庠生葉爾盛五載爾盛故氏以少年早寡又無子以死自誓姑勸之曰吾不幸喪子忍復令吾之喪媳乎氏悟曰吾過矣姑媳二人更相爲命慷慨就死置姑於何地乃立姪葉葵以繼夫祀其事姑也恪供子職色養兼至姑病竭誠焚禱厥後姑享大年人咸以爲純孝所感

宮葉氏鄉民宮士良之妻葉長清之女也年十七于歸奉翁姑甚得歡心相夫子以順爲正生二子而士良故事老撫幼氏以一身任之厥後翁姑沒二子相繼而殤復繼姪宮翰爲嗣撫之成立今已見孫鄉鄰公舉其事使編戶貞徵有所表見焉

余江氏原籍四川隨伊祖之任因家於息申人余某望族也聞其賢爲幼子武基聘焉年十六而于歸生子一佐夫勤讀武基得列名膠庠旣而武基亡子亦沒以姪余大來承祧氏義命自安守節三十餘年事繼姑尤以孝顯

張鄭氏州民張獻猷之妻庠生張溥之祖母也年二十六獻猷病故翁姑

在堂藐孤襁褓仰事俯畜氏一身任之嗜讀書頗明大義翁姑喜其能  
執婦道遂亦忘喪子之痛教子以義方威克厥愛曰勿令孟母專美於  
前也苦守六十餘年獲見諸孫成立年九十一以壽終學憲鄒聞之旌  
其門榜曰壹範堪風

重修信陽縣志卷二十六人物

人物志二之一

政事

德行

孝友  
忠義

善良





政事 以今縣境內人爲限

蜀漢董厥字襲義陽人丞相亮時爲府令史亮稱之曰董令史良士也吾每與之言思慎宜適徙爲主簿亮卒後稍遷至尙書僕射代陳祇爲尙書令遷大將軍平臺事蜀亡入晉爲相國參事兼散騎常侍

蜀漢樊建義陽人延熙二十四年以校尉使吳值孫權病篤不自見逮權問諸葛恪曰樊建何如宗預也恪對曰才識不及預而雅性過之後爲侍中守尙書令代董厥宦人黃皓弄權建不與皓和好往來蜀亡入晉爲相國參事兼散騎常侍

蜀漢郝普字子太義陽人事先主爲零陵太守吳來犯城守不降吳將呂蒙以譎詐取之遂入吳後官至廷尉

蜀漢費禕字文偉江夏鄆人也少孤從族伯仁至蜀先主定蜀遂留焉與汝南許叔龍南郡董允齊名與允俱爲太子舍人遷庶子升黃門侍郎丞相亮南征還羣僚於數十里逢迎年位多在禕右而亮特命禕同載由是衆人莫不易觀以昭信校尉使吳孫權性既滑稽嘲啁無方諸葛恪羊衝等才博果辯論難鋒至禕辭順義篤據理以答終不能屈權甚器之謂禕曰君天下淑德必當股肱蜀朝恐不能再來也還遷侍中亮

北駐漢中請祿爲參軍建興八年轉中護軍後又爲司馬值軍師魏延與長史楊儀相憎惡每至並坐爭論延或舉刃擬儀儀泣涕橫集祿常入其坐諫喻分別終亮之世各盡延儀之用者祿匡救之力也亮卒祿爲後軍師頃之代蔣琬爲尙書令琬自漢中還涪祿遷大將軍錄尙書事延熙七年魏軍次於興勢假祿節率衆禦之光祿大夫來敏至祿許別求共圍棋於時羽檄急馳人馬擐甲嚴駕已訖祿與敏留意對戲色無厭倦敏曰向聊親試君耳君信可人必能辦賊者也祿至敵遂退封成鄉侯領益州刺史當時功名略與琬比十一年使駐漢中自琬及祿雖自身在外慶賞威刑皆遙先諮斷然後乃行其推任如此十六年歲首大會歡飲沈醉爲魏降人郭循所戕諡曰敬侯子承嗣爲黃門侍郎承弟恭尙公主爲尙書郎顯名當世早卒祿長女配太子璿爲妃

今縣東部  
及羅山境

魏李通字文達江夏平春人也以俠聞於江汝之間與其郡人陳恭共起兵於朗陵衆多歸之殺周直陳郃又生禽黃巾帥吳霸降其屬歲大饑傾家振施與士分糟糠皆爭爲用由是盜賊不敢犯建安初舉衆詣太祖於許拜振威中郎將屯汝南西界太祖討張繡軍不利通將兵詣太

祖復戰通先登大破繡軍拜裨將軍封建公侯分汝南二縣以爲陽安都尉通妻伯父犯法朗陵長趙嚴收治之通妻子號泣以請通不可卒致之大辟太祖與袁紹相拒於官渡紹遣使拜通征南將軍劉表亦陰招之通拒焉斬紹使送印綬詣太祖又擊羣賊瞿恭江宮沈成張赤等皆破之遂定淮汝之地改封都亭侯拜汝南太守卒年四十二封邑四百戶諡曰剛子基襲爲奉義中郎將基兄緒爲平虜中郎將

按平虜今平壤西

部北

晉李重字茂曾江夏鍾武人少好學有文辭早孤與羣弟居以友愛著稱弱冠舉中正力辭之後爲始平王文學上疏陳九品以爲因革之理唯變所適遷太子舍人轉尙書郎時太中大夫恬和請制奴婢限數及禁百姓賣田宅重疏駁之以爲法碎難檢又司隸校尉石鑿奏鬱林太守介登役使所監求召還尙書荀愷以爲遠郡非人情所樂奏登貽秩居官重駁之請聽鑿先召登還詔從之太熙初遷廷尉平奏邯鄲醴等再遷中書郎每大事及疑義輒參以經典處決多見施行遷尙書吏部郎務抑華競不通私謁特留心隱逸由是羣才畢舉拔用北海西郭湯琅邪劉珩燕國霍原馮翊吉謀等爲祕書及諸王文學故海內莫不歸心

燕國中正劉沈舉霍原爲寒素司徒府駁之重論奏詔從之重與李毅同爲吏部郎時王戎爲尙書重以清尙見稱毅淹通有智識俱佐王以識會待各得其所於時內官重外官輕兼階級繁多重議之見百官志又上疏請命隱逸以朝廷政亂不能從出爲行討虜護軍平陽太守崇德修學校表篤行拔賢能清簡無政正身率下在職三年彈黜四縣弟疑亡表去官永康初趙王倫用爲相國左司馬以道逼成疾卒時年四十八家貧宅狹小無殯殮之地詔於典客署營喪追贈散騎常侍諡曰成子式有美名官至侍中咸和初卒史稱清雅無私推賢拔滯其言因革之理駁田產之制詞愜理當齊可聽云

各統詳文徵中按鍾武屬今縣境東南部

晉張光字景武江夏鍾武人也少爲郡吏世有部曲以牙門將伐吳有功遷江夏西部都尉轉北地都尉以百餘人戍馬蘭山北賊圍之百餘日光撫厲將士出奇兵破之梁王彤遣司馬索靖迎還長安表薦之授新平太守助雍州刺史劉忱討河間王顥軍潰被禽顥謂曰前起兵欲作何策光正色答曰劉雍州不用鄙計故令大王得有今日顥壯之表爲右衛司馬陳敏作亂光以順陽太守率兵詣荊州討之刺史劉弘稱爲南土之秀亂平遷材官將軍梁州刺史先是秦州人鄧定以流人保城

固爲抄盜梁州刺史張殷遣巴西太守張燕討定僞降賂燕金銀緩師而密結李雄求救遂進逼漢中殷與漢中太守杜正沖並棄官遁光究得阻兵緩寇之由斬燕以徇綏撫荒殘百姓悅服於是却鎮漢中已而賊黨李運楊武入漢中結流民楊難敵伐光爲參軍晉趨所誤被圍自夏迄冬憤激成疾佐吏及百姓勸之退據魏興光按劍曰吾受國厚恩不能翦除寇賊今得自死便如登仙何得退還也聲絕而卒年五十

五百姓悲泣有二子吳少辟太宰掾邁多才略有父風州人推邁權領

州事與賊戰沒其後義陽太守任愔爲梁州光妻子歸本郡南陽太守

應侯白都督王敦光在梁州能興微繼絕威振巴漢值中原傾覆征鎮太守外無救助內闕資儲以寡敵衆經年抗禦厲節不撓宜應追論顯

贈以慰存亡敦不能從

晉孟嘉字萬年江夏鄆人吳司空宗曾孫

宗以孝聞即俗所傳哭竹者也

少知名太尉庾

亮領江州辟廬陵從事後爲征西桓溫參軍轉從事中郎選長史卒其

弟晉書有傳陋亦有名入德行孝友

按鄆縣包今信羅兩縣之地如費於今信羅何屬信陽舊志于上四人向曾不收未識何據茲特補出以免遺漏

刺史裴邃北伐累有戰功與湛僧智胡紹世魚弘文並當時之驍將歷官衛尉卿太子左衛率卒官諡曰愨

梁朱詹義陽人世居江陵後出揚都好學家貧無資累日不爨乃時吞紙以實腹寒無毡被抱犬而眠猶不廢業卒至學士官至鎮南錄事參軍爲孝元所禮顧氏家訓

明張鼎信陽州人刑部主事成化十年言延綏甘肅甯夏三邊鎮撫不相統一宜推文武重臣一人總制詔從其請因設制府於固原以王越爲之巡撫總兵而下並聽節制三邊設總制自此始

蔡鼎正統初官廣東雷州衛指揮僉事守法奉公不憚勞瘁建衛治修鐘樓葺城浚隍整飭營所規制煥然一新見廣東通志

光祖官五台縣知縣耿介清廉勤於其職嘗增修廟學勒貪廉二箴于石以自警見山西通志

明岳東升字伯陽信陽人由舉人知寶應縣剖決如流公庭寂然人皆憚之用御史薦升戶部主事嘉靖中

清曹思鑑字鏡齋馮河村人乾隆中任汶上縣丞歷署魚臺鉅野蒙陰單縣知縣三十九年壽張奸民王倫作亂陷城連破堂邑陽穀趨臨清阻

運道思鑑奉檄守糧臺募勇嚴防餉得無誤總戎知其能調赴前敵有  
功事平賞不之及思鑑亦不自言也在鉅野時有兩姓爭獲麟臺者思  
鑑謂之曰春秋書西狩獲麟孔子隨沒此不祥地也爭之何爲兩造遂  
釋忿以其地爲間田宰單縣有焦倫者偕其孀來署控其叔父被殺思  
鑑詣驗訖察倫詞色有異命拘之偵查其家見血迹一訊而服蓋倫向  
其叔索債被詈忿而殺之合邑驚服公製秦鏡高懸匾額贈之後署曹  
單同知歲大饑有貧民十八人行掠富室以被裹糧去俱被獲重責釋  
之曰以數斛糧殺多命余不忍也已而十八人者以行劫在鄰邑就捕  
供及此案以失出奪思鑑職嗣純皇帝幸山東迎鑾蒙恩開復卒年七  
十一子四次恩貢生泗其孫瑞林字鳳山同治癸酉科舉人官郟縣教  
諭十八年誨人不倦自署楹聯云師弟何常弟不必弗若師師不必賢  
於弟子聖狂無幾惟狂克念作聖惟聖罔念作狂又有詩云名場爭逐  
記從前多少同人已佔先笑是一官不變塞頭銜依舊腐儒酸可想見  
其風概云致仕後講學課藝成就後進獨多一時稱教育大家與喻心  
地陳連川齊名

曹履吉字凌軒馮河村人幼貧力學邑名士張大同見而器之授學焉中



式乾隆甲午鄉試舉人乙巳大挑一等知縣分發山左分校乙卯戊午辛酉鄉闈衡文一本先正名程所薦拔多知名士歷任曹縣朝邑鄆城鄆城清平定陶荷澤等縣高唐臨清等州直隸州事曹有富室某惑於白蓮教積年窩匪謀爲不軌其姻懼累告密履吉率役往禽匪首及其黨八人檢名簿共數十萬人掘牡丹池得偽巡撫印十八顆計將發難各省履吉星夜晉省稟報時撫軍鐵梅庵長厚吏也見簿列名過多愀然久之因曰此案據實入告君當超擢知府而列簿者皆應誅否則誅只九人君雖不升爲德大矣盍自圖之履吉慨然請從輕擬鐵離席揖之曰吾今乃知子之心矣是獄止坐九人荷澤有婦人被強姦隕命臨終自言死於某窰匠手前任誤坐窰主履吉到任識其冤立出之緝正凶到案一訊伏辜詩民有曹公在邑公虛善斷攜一胡餅卽可了案之謠會歲饑放振舊例以秋末始以來春三月畢履吉以麥尙未熟捐廉充振展至麥收全活極衆後以獄中盜逸不獲被參勒令休致時鐵梅庵長吏部見奏牘抗言曰曹某慈祥愷悌民之父母也遂奏留調費縣數月以丁母艱去官服闋不復出生平篤於故舊同寅某以虧庫帑獲罪倡首傾囊欣助之業師張大同老而貧爲謀養贍終其身沒禮葬之

勒石爲誌晚年頤養林泉以詩文獎掖戚族子弟歲饑擇族鄰之窮乏者周濟之力不足或假貸以行其志年七十三卒子芝乾隆癸酉拔貢郭鑑庚字尊香原名聚奎城內人嘉慶庚午舉人已卯成進士授雲南呈貢知縣歷任大關匡城等廳縣事旋以憂去起復補四川高縣越七年致仕歸鑑庚居官廉正愛民如子聽訟以至誠開導不事鞭笞民感化之所任衙門陋規一切罷除不以官例累民因公赴鄉自捐夫馬力不給舊僕步隨任大關時年終費絀以花袍質肆庫得二十金以度歲清況過於儒生大關文風閉塞鑑庚捐建高塔龜山頂爲厭勝鄉試遂連獲雋又捐造黃果大橋利濟行人所費皆不費攝匡城時鄰邑昆明縣叙陡二村控爭水溝訟延三十餘年屢結屢翻闕不計其數圍聚縣署幾成大獄道光十四年鑑庚奉檄勘訊詣驗率兩村數千人往復指示一讞而定兩村德之各爲立生祠鑑庚紀事詩有云草草一言分水利九旬賺得兩長生雖自負語亦自道實也咸豐初起復赴都袁端敏公甲三語人云此河南生色官不苟進取者也及改授高縣地處川南與滇北大關鎮雄毗連實爲兩省門戶向爲囑匪出沒川省絲布南往滇中茶錫北來銀貨經行歲以數百萬計距城五里之黃水口尤爲商

旅必經宿站銀貨過境必須簽差護送甲衆巡邏時有疏虞鑑庚捐廉倡首建關于此置巡卒司盤詰而荏苒之警以靖以劍南舊有十二關顏之曰十三關築樓關頂祀關壯繆手書愛秋月樓匾額王籬東李紅樵繪圖題詩交相矜重邵蓮溪郡守謂可與李文饒籌邊樓齊名鑑庚於數十年後每談及此役輒自以爲生平第一快事後洪楊作亂餘孽四竄卒賴此關捍衛縣治獲全高邑缺最瘠苦鑑庚以費絀不另聘刑席呈詞案牘皆手自裁定批邵導窾無不悉當民意尤喜讀書公餘不廢所至以振興文教爲已任手訂書院章程親督訓課獎勵實學刊發景行錄爲多士標準加意寒素歲盡酌餽年米以資振勵縣試每場捐給飲食創舉賓興籌款生息爲寒士鄉會資已故高邑拔貢林雲瀚曾任觀城知縣有循聲母老家貧妻以賣飯資生鑑庚代籌銀百兩錢百緡爲置恆產贈之任高邑川督某旗籍性暴戾恣睢閱邊過境沿途供仗稍有不合輒撤懲不貸幕僚請厚籌支應鑑庚不應但囑照舊辦差掃除花廳壁懸名人字畫几置大復集遠谷集二部迎入獻茶某督入室徧觀古畫心目豁朗繼見大復集展覽朗誦莫置家人廚役紛紛請事上點開筵鑑庚戒勿爾移時伺督已餒乃以家鄉蔬菜數簋與香米

稀粥油餅進之某督食之不覺大飽食已傳見面獎謂不染宦場習氣猶有儒家風度隨命庖人停開筵席仍以前饌進並誠隨從郭令清廉好官勿相擾無敢譁者宦場傳爲韻事自此聲望日隆又爲普蘭巖詹岳亭兩軍門所雅敬闕巖致友人書謂郭先生事親孝居官廉交友信存心正而岳亭因公出省以室家相屬照料資助不負所託又閩縣郭古樵官四川初相見卽云我在家已聞君是好官得之自川歸閩者到京又聞君是清官得之自川來京者諸名流皆傾倒鑑庚若此獨以躑直不得長官意計榜已列名忌口譁之乃除去卸任大關士民越十三驛進省保留蒞高凡七年道府屢次推薦上峯徒溫語應之戊申擬以疾告士民聞之城鄉數千人奔赴公堂跪哭請留願年集三千金以助薪水鑑庚卻之曰如此是以愛我者污我也遣之不去乃爲強留一月出示阻其晉省保留祕牘告病卒抽簪去瀕行萬民痛哭遠送爲立去思碑以誌弗諼高民敦樸不解迎合二百年爲官立碑者並此爲兩見僅事也鑑庚性狷介絕請託僑寓舞陽有以千金請闕說訟事者一笑卻之里居屏迹公門尤爲官府推重歷主汝之南湖信之申陽兩書院主講南湖時從遊者五百人舍滿至無下榻處蒯觀察士薈於鑑庚恩

禮倍至道屬舊無書院假申陽書院以課士猶親致脩金按節資助拜謁之禮長官輒先施不以鑑庚爲簡錢調甫中丞大閱至申減從造廬請謁尤爲異數庚午重赴鹿鳴公年已八十有五精神強健視聽弗衰一時大吏如蘇庚堂河帥等贈詩豔稱者十有七人頗爲中州盛事鑑庚稽古功深至老弗倦自周秦以至清代詩古文詞手鈔數千頁所著海粟齋詩鈔初續兩集計二十八卷尹性龍李子衡兩監司任選訂傳青餘蒯士薌兩方伯贈刊資江西蔡梅菴太史徵詩海內選刻其詩六十餘首直隸遵化州孫澗字詩樵能詩未遇與公素昧生平自廣西懷集縣寄蜩華吟館詩一卷無信鑑庚題詩卷後有云人地兩無瓜葛分如何過愛寄詩來亦奇事也詩鈔以外刻書十種如景行錄關聖文蘭巖詩鈔春草詞急救方字學舉隅四聲便覽未信草韻字同異考辨正字略等書皆刊自官署清代藏板本邑城上奎樓傳觀察製文泐碑並書郭先生藏書處匾額以示旌異此外有全唐詩選選賦誘讀詩韻匯成並集名人書札鴻爪錄七冊皆以無力付梓未能公諸同好卒年九十有三鑑庚家代有儒行祖某歲貢生著有過庭文集子世惠世衡皆廩生孫家瑤光緒己卯解元甲午進士授中書謹言慎行恂恂矩矱文

章亦得雅正之遺不失家學

陳夢蘭字湘浦都司應元第三子生而英俊過人髫齡知名羅邑黎世序  
襄勤公許爲大器尙給諫開模見而奇之卽以女字焉弱冠補博士弟  
子員以優廩生領道光癸卯鄉薦咸豐壬子捷南宮預館選迴翔郎署  
洵陟西臺同治己巳夏簡授湖北荊州府知府尋以兩屆安瀾功賞鹽  
運使加二品銜並給三代二品封典聲績日隆駸駸將大用忽以積勞  
致疾卒於任遠近聞者莫不悼惜夢蘭天性純樸外和內肅事應元先  
志承意視聽常在形聲外居喪用古禮祈寒盛暑未嘗離苦塊音樂宴  
會概行屏絕處兄弟成其美而匡其不逮視姪若子善則相勗乏則相  
卹而有過又未嘗或貸也黎氏裘氏諸甥幼孤貧倚以居飲食教誨數  
十年如一日自奉儉約每餐不過二簋一裘葛閱數十冬夏而樂善好  
施脩俸所入分潤戚友隨手輒盡地方公益力所能任者知無不爲持  
躬嚴謹寡交遊重然諾非端人正士未嘗與共往還尤不喜言人過稠  
人廣座中有訐某短者則徐曰某之作某事大可法發某議大可採一  
座肅然平生與人無忤里有無賴酌酒持刀登門叫罵戒家人勿與較  
越日無賴愧悔介鄰人踵謝夢蘭一笑置之其清德雅量有如此者官

刑曹九年執法平恕而不撓於權勢一佐領殺人擬抵管部令改讞公力爭不可卒論如律某伶以絕藝譟輦下因罪繫獄掌憲委幹司鞠之迭更十餘人某岸然曰若吾熟識若吾至交安能屈我掌憲怒改委夢蘭厲聲指示之曰此信陽陳某汝識之否某伶色沮戰慄一鞠而伏居臺諫能持大體絕不驚赫赫名所陳皆有闢國計民生分所當言雖權要不避其守荊州也勞來匡植百廢俱興然所最繫人思者莫如築萬城大隄一事川江自夔宜建瓴東下一瀉千里荊州地勢外傾而內陷適當奔激之衝萬城大隄綿亘二百餘里爲下游數十州縣生靈保障隄日圯以卑江日淤以高瀕江城鎖危如釜底夢蘭蒞任親詣履勘深以爲危尅日鳩工全隄加高二丈餘厚維倍或尼之則曰吾非慮之過但爲久遠計未可苟幸及吾身無事而遂已也其年伏汎江果暴漲溢出舊隄外九尺卒以新工堅實得無恙人以此服其先見江漲正盛時沙漠上下數百里驚濤駭浪攢注隄身且大雨兼旬不止內河復漫溢橫流表裏衝刷險工迭出夢蘭坐鎮衝要設法搶護誓與隄爲存亡念餘晝夜廢寢忘餐迄水退回署鬚髮皓然方事之殷人心異常震恐紛紛遷徙紳民多勸夢蘭節勞勿蹈危地不爲動適南岸公安隄潰水驟

落吏入報僚屬皆賀夢蘭蹙然曰吾荆之免幸矣顧公安亦吾民奈何應弔而賀也聞者感泣是役捐款二萬餘緡吏請按例征土方銀彌虧空以恐重民累罷之且爲之振卹流亡使勿失所荆沙之民是以大和迨沒荆人哀痛如失慈母柩還之日輻餞泣送道路爲塞有徒行送至河南境者沒後三十二年光緒甲辰鄂督張之洞豫撫陳夔龍以夢蘭功德在人先後以入祀名宦鄉賢請同時奉俞旨後有里人因公至荆州訪當時隄工陳迹尙巍然爲一方屏障其中賢士大夫語及夢蘭築隄事與其他治績無不欷歔感慨如其初沒時蓋流風善政入人深矣壽僅五十有五治世鴻猷未竟大用惜哉其他詣行政績詳年譜暨鄉賢名宦錄妻尙氏治家整肅服御儉約夢蘭宦京師尙氏猶紡績以佐饗殯迨守荆州佐績賢勞多資臂助焉子六長長麟次寶麟幼瑰異童試冠軍未冠沒三貴麟歲貢四嘉麟通判俱詳德行傳五惠麟舉人六斌麟主事均詳政事傳

張特書字聖修道光戊子舉人住澄清坊天資穎敏過目成誦幼有神童之稱於書無所不讀尤熟四史在京師曾與南人賭背書南人以經請特書曰經乃五尺之童皆應熟讀奚足奇無已其背史乎兩漢史佶屈



齧牙特書背誦如流名動輦轂後官山西甯鄉平魯等縣知縣護理朔平府知府任平魯最久地處晉邊與內蒙毗連土瘠俗陋民不知書特書籌設義塾數十處苦無書可購乃專人還鄉飭賣私產赴漢購書運至任所捐廉延師以教之迨識字者漸多然後教之孝悌禮義導以睦嫻任卹變鄙野爲文明政化大治民風於變至今邊氓猶尸祝之孫廷憲文名籍甚中咸豐戊午舉人未及出仕而沒

全凌霄明港人道光中任甘肅河州巡司境有七星渠淤廢已久凌霄率同委管自備資斧不受舊規鳩工督修不三月而歲事灌溉田疇數百頃七星之外戈壁數百里有天井山異常險峻盜賊窟穴其中時出掠新舊寧安恩和鳴沙四堡居民苦之凌霄籌款購置軍器帶領弓兵冒雪搗其巢賊皆遠遁民皆安枕去任時恩和堡紳民爲立德政碑並贈以七絕十首一普天同是太平民海宴河清二百春何乃銀川聞嘯聚路旁猶有拾遺人二霏霏雨雪朔風寒立馬南山一命官斗酒羔羊全不受只留清白在寧安三獻策胸藏百萬兵昔年有志欲平英掃除賔海猶能爾何況割雞在武城四長槍大戟一齊操十六弓兵各佩刀聽得鎗鳴弦落處荏苒無不望風逃五不辭艱險不辭勞六十年華意氣

豪從此月明無犬吠河南一帶頌聲高六五十年來河伯災挾渠善政自龔開時人漫說當年惠雨露於今潤澤來七不在黃紬被裏居焦勞惟濬柳青渠入鄉看到泉流處鄭白從來亦不如八豈是官卑好自專爲民常不愧青天代庖越俎能如是仕宦之中有幾員九別駕不能驥足宣琴堂指日定超遷遙知臥轍攀轅者願借寇君再一年十逐寇修渠已政成仁心一片福蒼生他年報最歸朝去黃閣東邊聽履聲

陳秩五字惇齋清河村王家岡農家子年已逾冠未嘗入塾嘗隨父納稞至田主家閱讀書聲暮之側耳傾聽孜孜忘倦自是暇卽詣塾戶隔外竊聽遇塾師講書至佳處輒手舞足蹈塾師知之間曰爾亦願學乎曰願師商之主人主人曰曷試之以論語上卷授之終日不發聲而顛倒翻閱不止師曰爾旣願學何又不讀秩五曰讀吾不能能依樣畫之遂使畫一日之間學而一册正文朱註及卷數頁數等字默寫無遺縱橫成行主人驚謂塾師曰此子腦力迴異尋常若能開其知識將來進境匪伊所思君悉心教之火食束脩我胥擔任至紙筆費每年讓租穀數石以助之師欣然諾之不五年入泮聯捷中式道光乙未恩科舉人丁未科進士禮部揭榜秩五短衣往觀江浙少年見其襁褓擁擠人叢中

厲聲曰爾何人答曰河南應試者曰既是河南可往後看秩五笑曰不才已徵倅中式第五名後榜無須再看不知兄台榜次何處其人慚而退後以卽用知縣簽分陝西歷任洵陽永壽同官等縣知縣所至裁陋規剔弊竇政簡刑輕四民愛戴暇輒微行鄉村訪問民間疾苦凡病民者悉予罷除利民者振興不遺餘力所至民安所去民懷幸同官地處陝北民貧俗陋滿目荒涼乃招集流亡勸課農桑整頓書院獎給膏火捐設義塾普及鄉鎮不五年風俗丕變稱上理焉民國初同里黃鉞宰同官訪秩五政績其父老言之卓卓猶追思莫置云

周守典字承休號文山出山店人道光己酉拔貢咸豐辛亥舉人以辦本村團練保舉知縣出宰宜興子身赴任不以家累自隨吳中糧賦甲天下而宜興居首守典蒞任卽減丁地銀價每兩五百文裁浮收剔弊竇政肅刑清宜民感德立生祠者三時王節愍公藩吳以治行第一首列薦剡適髮逆猖獗毅然請纓克復堅城要隘迭著戰功後剿賊至張渚鎮以軍少爲賊衆夜襲被執不屈成絕命詩八首遺訓數條遣僕逃出賫送家屬古稱慷慨捐軀從容就義守典有焉死事地宜興張渚各有專祠著有文珊詩集付梓板以兵燹焚毀故流傳者頗少

李裕澤字問樵世居邑北徐家堂幼穎悟入塾有神童之目弱冠以童試第一補弟子員秋卽捷於鄉是爲咸豐辛亥恩科也明年春闈報罷歸里益自勵適值洪楊之亂逼近豫邊土匪四起裕澤倡義團練鄉勇聯絡百餘里匪徒遠避庚申苗匪竄擾豫境民不聊生河南團練大臣毛文達公委裕澤督辦汝甯九屬團練督辦講明武備訓練民團措置有方卒能肅清匪亂合郡獲安敍功以知縣歸部銓選咸豐六年大旱饑州牧董募捐擬放粥振濟裕澤建議謂粥廠之設惟衰老弱病者宜至少壯男婦可自營生若以一飯之故紛然遠來離故居失常業齧集露宿久之必生疫厲拯之反以誤之不如確查極貧之戶計口給予執照俾數日一領振糧歸而自食爲尤便董牧聽之如議舉行全活多而流弊少饑民德之又咸同十餘年間邑中迭遭髮捻匪害死難紳民殉節婦女所在多有裕澤恐事久湮沒請於州牧孫自任採訪之責共得男女一千八百一十二名呈准旌表於同治壬申建忠節總坊於縣治白馬橋表楊先烈沒存均感同治甲戌成進士歲逾強仕已五年殿試二甲授職部曹自念匏繫都門何若出膺民社少展措施因呈請改歸知縣原班光緒戊寅選授甘肅徽縣地貧民少讀書下車勸課農桑栽植

木棉儲社穀聯保甲示諭教令八條俾共遵守又創義塾多處刊發弟子規與訓蒙詩時詣書院以裴氏先行後文之義訓勵諸生按月課試擇優獎給膏火以示鼓勵期年之間教養兼施風俗丕變循聲四布方裕澤之初至甘也謁甘督左文襄公詰以棄京官就外官何爲答曰京官功效難見澤之改外亦欲有以自見藉圖報效耳左公鼓掌贊賞諄諄以好官相期許至是聞其政聲益大器之嘗批答其稟牘有仰卽益自淬厲上追古賢不僅希志循良之語計最特章保薦奉旨交軍機處存記錄用一時詫爲異數辛巳調補省垣首縣皋蘭公事繁劇酬應紛紜事上治民均無遺議癸未大計卓異逾年陞署河州牧又逾年真除河邑當兵燹之餘漢回雜處頗難治理裕澤乃除盜賊以安良善懲誣告以儆刁頑興義學以廣文教旌節孝以維風化多購經史頒發書院捐給諸生膏火俾住齋肄業選士紳令徇城鄉講聖諭以厲愚民捐廉六百緡發商生息以作講生常費適年歲豐稔集紳耆議補城垣建樓櫓費幾萬貫民皆樂輸十三年夏陞任涇州直隸州知州未及赴任疾作卒於河州任所年五十有八發引之日紳民輻餞哭送者數十里不絕裕澤少負不羈才中年練團剿匪險阻備嘗出仕以後教養並施民

風丕變聽訟則發奸摘伏判決如流治獄則務求平允至監押人犯專飭長子開昭日往監視力杜家丁獄卒尅扣虐待其勤政愛民精細過人有如斯者至往來尺牘無不手自裁答暇輒讀史論文至老不倦著有敬業堂文集河池學治錄訓蒙詩集各種待梓子開昭秉性剛直治躬簡樸解人急難力持大局光緒興辦學校公推開昭充學董整理公產稞租廓清典押拖欠諸弊捐雙柏寺家廟田產八石充學費州庫存稅契平餘銀萬三千餘兩某知事解任將挾去開昭邀紳學界力爭交還作實業基金呈省備案輿論翕然旋被選省諮議局議員有聲年六十二歲卒

謝伯春字仁圃邑增生道光丁酉以第十名舉於鄉選授考城縣教諭時捻匪肆擾屢圍縣城幾殆伯春幫同縣令督率民兵竭力防禦晝夜梭巡撫循士卒鎮定人心令賊無隙可乘城賴以全以功保獎知縣同治丙寅選授四川榮縣知縣之任適值境內教匪嘯聚黨徒甚夥圖謀不軌伯春親率兵役出其不意直搗巢穴捕獲匪首數十人誅之得匪冊數萬人對衆焚之曰此皆鄉愚受人蠱惑吾不忍以陞官故多行殺戮也丁卯充四川鄉試同考試官戊辰調鹽源知縣以親老道遠不果行

辛未丁父艱回籍終制起復到部授東城兵馬司未幾卒於任享年六十七伯春品端學粹人爭師之教人不徒以文必以行本邑後進多賴成就者詩品超脫著有憩雲山房詩稿待梓庭訓夙嚴子孫率其教皆有成立論者以爲焚册隱德所致云

張培中字樹滋蕭王村人父以家貧棄儒而農培中獨嗜讀書時向父問經隴畔鄉人迂而笑之族兄召南授徒鄉塾令就學不責束脩日往返道遠恐誤學午恆忍饑不歸長工試帖併力詩古文詞道光己酉登賢書大挑一等分發東河借補臨清州直隸州判職閒署冷培中安之終日飲酒賦詩以自娛衛澣汛地植柳成陰遊人嚮集名之曰張隄煙柳在任既久同官涖任者就訊地方利弊無不爲剖析指導藉資興革邑向有童男娶長婦之風往往遺羞幃簿搆訟敗俗培中與當道力商懲革之人以其廉明遇事多來赴訴輒婉謝曰有地方官在我官河不能越俎人悲曰好官不聽訟良民該死矣培中性至孝以早失怙恃未獲盡養父母忌日恆先後數日憂思不食而喜著述不留稿謂古今多至文何必以此汗人目晚年其子葆荃輯其詩若干首乞署名答以曇花意不能久聊一現耳年七十卒於官遺囑不受賻不作佛事櫬歸時邑

民多揮淚送出境長子葆真字心佛孝友性成不慕榮利癖吟詩有憶  
蕤山房集三子葆荃好學手不釋卷入泮後屢試不第遂灰心功名工  
書善畫索者接踵所著有說夢軒詩鈔季子清運字季鶴五歲卽能成  
高柳花飛盡深閨人獨眠二語爲老成所驚賞稍長涉獵羣書目十行  
輒成誦年十八以第一人入泮明年食餼願以才氣過高恆以踰程爲  
衡文者所擯中年憤朝政不綱每借詩文以抒懷抱改革後友人要主  
河聲報文苑念詩學失傳以扶衰自任常寓喪貶於文字中一紙風行  
爭光快靚其澤畔吟三十首尤爲人所膾炙著有螫園藝稿一碧山房  
詩鈔詞草各若干卷女菊韻緞香皆能詩

嚴法貞字文波世居平昌關同治中以從左文襄平回疆奏保知縣留陝  
侯補歷署三水定遠城固甘泉咸陽延川懷遠等縣知縣所至政平訟  
理循聲卓著其署城固也邑有古礫壩上築五門堰民資其利天主教  
購壩擬填平築教堂水源將絕民拒之構訟累年法貞至召神甫諭之  
曰教所以利民今建堂禍民非貴教本旨曷改圖神甫悅服罷訟舉人  
趙應元以圖產誣控孤姪非兄血胤私以三千兩銀票進法貞陽應之  
堂訊時法貞擲其票案下斥之曰汝旣爲兄爭血胤行賄胡爲者應元



大震服罪判定詳革應元舉人閩邑歡誦任滿調漢中發審略陽前四  
川鹽茶道盧子元者炎暑於棕牀上吸鴉片命妾乜氏燒食盧以煙籤  
置盤側將以其身傍盤橫臥適牀突欹而下坍籤鏗棕中其末向上直  
貫入盧脅下登時氣絕孀訟妾通僕謀殺宰莫辨獄成擬斬法貞奉委  
覆審詳細研訊疑之開棺復驗果得籤脅下妾冤以白上峯歎賞委署  
甘泉甘泉地僻民窮法貞勸民墾植躬親利導行之三年民以殷富庚  
子之亂兩宮西狩關中大饑諭行各縣發倉振濟陝撫岑春暄總核名  
實各收令以吞冒賢辦理不善獲罪者數十人時法貞署咸陽課爲全  
省最保獎同知賞戴花翎辛丑咸陽大水城門九而淹頽者七舊存城  
捐七千緡命蕭紳聚星領款修理蕭另募於民而吞沒舊款舉人趙鈞  
揭發法貞抵蕭罪蕭抗訴於岑岑信之譴趙並責法貞法貞持之力卒  
查實論蕭如律追款修城豁民捐焉其風節峻整所至民安所去民思  
多此類晚年補扶風縣知縣未及赴任卒

路玉階字岷山城內鎮遠坊人性倜儻工詩文善楷書與胞兄金階互相  
切磨弱冠均有聲庠序以咸豐辛酉選拔朝考授知縣分發安徽到省  
爲各大憲所器重提督李兆受愛其才延入西席尋補盱眙縣知縣疊

結疑案兩造帖服有片言折獄風旰晷臨洪澤湖盜匪出沒爲患玉階假賣卜私探匪穴又捐廉購眼綫緝獲巨愆多名盡法懲治闔境肅然政聲大起計最第一遷懷遠縣下車清理積案有某命案株連多人提訊仍無確供乃云殺人者究有正凶只可瞞人不可瞞神當備文申請城隍處決次夕帶案至城隍廟諭云昨夜神已示夢將署判於正凶之背因飭各犯沐手禮神褻衣面壁立息燭待神書判移時然燭驗背有一犯背多黑色厲聲曰殺人者爾也一鞠而服蓋預以鍋煙塗壁復以煙水令各犯沐手殺人者心虛畏神書判故以背抵壁迨然燭出驗又恐背觸壁垢致露破綻復以手拂之故黑徧於背也人皆服其神明而盜仇之愈深適京餉過境被盜劫萬餘金嚴緝不獲遂撤任繫獄責償幸經兆受幹旋省釋自是流寓皖垣筆耕糊口鬱鬱數年卒

楊宜三字兩田廷棟曾孫歷官湖北江陵縣典史長樂縣縣丞隨州祝林總分州皆有聲其官長樂也地方凶歉請振或謂宜遵例詳侯藩憲批准宜三曰如此則饑民皆在溝壑中矣徑自開倉發放事竣當事者果責償宜三以己廉俸抵填焉長樂人尸祝之其從弟宜園亦有盛德爲時所稱

周儀字鳳廷號四生任新疆瑪拉巴什通判新撫陶模奏保候補直隸州知州以邊防功饒應祺中丞保升候補府加道銜歷署寧遠疏附等縣事在疏附同城副將徵民間草料纏頭苦之訴於縣儀以停徵商之副將不聽遂稟省撤副將任逮署期滿纏民爲送牌傘立去思碑儀器局宏綽負抱深沈中道而沒未竟其用輿論惜之

何傳中字執齋明大復十三代孫父文升事親至孝事詳孝友傳傳中幼聰穎言笑不苟有小復之稱家貧從王惟适學不收束脩傳中立志苦讀及冠入邑庠以廩生中式河南光緒丙子科鄉試丁丑會試聯捷成進士觀政兵部歷升郎員傳中博學善誘人爲諸生時設帳鄉里桃李滿門如李聯奎李聯暉李國光陳澤遠四孝廉艾祥清席崇光陶海秋張海洲諸明經皆其最著者在部清廉勤慎爲禮部尙書崐岡所器重壇陵工程暨慈禧六旬慶典皆倚之以辦平生尙俠義急人難羅邑趙春堂赴京中途爲盜所劫主僕旅資無措相識無收卹者傳中獨周以衣食資以饋牽俾得返里乙未新進士王伊初釋褐力窘不能謁師告貸同鄉京官無應者傳中贈以三百金伊始得修贄稿禮感之終身以丙申五月卒子久清能世其家

嚴祖慶字子修世居平昌關幼有壯志讀書不治章句遇忠孝賢古名臣循吏事嘗反覆玩味不置光緒己卯舉於鄉丙戌成進士以知縣分保陽歷署蠡縣靈壽等縣事祖慶每到一任首問民間疾苦務爲民興利除弊其聽訟也片言折獄案無留牘署蠡縣數月後因案親詣距城十五里之陳村勘驗畢擬歸有父老具衣冠請見曰民等久未逢賢父母矣自公來吾邑始覩青天城東豬龍河爲患例由官督民修民力疲困河仍歲決經公履勘計工賦食事半功倍河慶安瀾巨匪徐防輩頻年肆擾民不聊生賴公親率兵役逮捕懸賞弋獲匪首誅之境內又安至聽訟則片言折獄其冤嫌久訟歷任未結法理難平者無不曲盡情僞鬻服衆志以息訟累德莫大焉民已老矣猶及見賢明父母之莅吾鄉何幸如之皆再拜稽首而去解組踰年奉差吳橋道經蠡境暮宿逆旅忽聞叩門聲啓視乃五六村叟持雞酒數事捧獻曰聞公奉差戾止追維德政前治吾邑遺愛在民特獻微物聊表去思之忱祖慶笑納而慰遣之因占一絕句有叩門勞父老饋酒並雞豚之句庚子補容城卸署靈壽趨省晉謁途遇潰兵劫掠頗受驚抵省患病卒壽僅五十有五李樹敏字文卿城內人光緒丙戌進士幼以孝友稱於鄉及長劬學以帖

括空疏無實用獨於學庸誠正修齊之學古今治亂興廢之故洞究其源委服食儉約絕不沾染時好歷任侯官浦城詔安等縣升永春州直隸州署福甯府知府入民國解組歸卒年六十八歲初以卽用分閩任尙幹鄉保甲局委員有豪室林某以花會窩賭用三十六字射覆中者酬之如字數居民趨之若鶩多爲破家歷任不能治樹敏以重金購緹捕得之置諸法害始息總制邊有互鄉化爲仁里之褒擢補侯官侯官爲閩首縣邑令向以奔走屑憲爲能其詞訟則諉之幫審樹敏莅任終日坐堂皇判案三五起自午至夜不休閱兩年結懸案百餘件臬司張徵服觀之歎爲難能署道何成浩失去棹屨中押文牘之金條獲賊臬憲援盜過貫者死例擬誅之樹敏爭之曰律文盜過貫死者指結夥執仗撞門入室之強盜而言今以金條押文牘本近慢藏小人見財起意是謂之竊烏得當以死罪改報遣戍總制獎之曰古云宰相必用讀書人是之謂矣浦城爲閩鄙邑四十年無登科者樹敏興書院置學田優給士子膏火嚴定課程文風大振其秋浦人羅得元竟以第一人冠閩榜詔安俗強悍喜讎殺往往兩造各糾衆千百人械鬪殺傷不報各以死亡相抵成風氣樹敏編保甲設鄉長令互相勸諭又請撥省軍三百

人分紮城鄉專司彈壓敢有聚衆鬪毆者分別科罰終其任無一死於械鬪者其知永春刑政清簡文化大行屬邑德化縣有同治間亂民陳拱之餘黨王僚陳餘倡小刀會潛據山險謀不軌以黃綾票相號召散布黨羽各處樹敏密聞於上檄調營兵出不意搗其穴搜獲僞印冊簿等火器無算散其積以犒軍禽首從五十餘人在事文武擬駢誅之援肅清匪犯例請獎敍樹敏持不可詳請殲巨魁釋脅從報可案結僅戮首事者二人餘分別徒流地方以安權福甯府察吏安民三八理刑訟獄多不之縣而之府增置捕艇二艘清海盜又請廣府學額二名後再任永春六年奉行憲政舉凡學堂警察實業監獄振卹無不次第舉辦憲政編查館論政績列入優等者三最優等者一奏獎鹽運使銜將去任糧書楊星虧欠正雜各款四千餘兩署借券乞恩藩檄嚴追幕僚請移交後任代徵樹敏曰去後徵不如去後思之爲愈也乃傾囊墊繳焚其券餘欠在民者並爲詳請豁免其勤政愛民類如此至今閩人談其政績猶稱道之不置云子三長聯鈺次聯瓊廩生三聯琦附生兵部員外郎孫六人培源自由縣縣長達河南農工銀行行長

王揚曾字紫銘城內人好學能文不利有司同治初捻匪攻城揚曾率壯

丁登陴拒守賊退復督工修城賢勞卓著嗣晉豫旱荒赤地千里饑民流亡入境覓食城關者數萬揚曾奉州諭與士紳籌款振濟全活無算於掣划街建草房二十餘間并置人看護以處饑民中孕婦之暴露及患病者地方至今稱之光緒初遵例納粟以通判分發直隸候補委辦定東陵升祔及京通倉海運武烈河堤工正定府貢院等差迭蒙保獎加二級以直隸州知州升用己丑春代理元氏縣事次年冬代理無極縣事時溇沱河決爲災揚曾請發庫帑以工代振直督李少荃傅相亟獎之飭改代爲署照所議行民沾實惠款不虛糜全境以安其秋禾將熟蝗蝻大至蔓延七十餘村鄉民奔走呼號醫瘞署前揚曾自爲文率衆禱於城隍聲淚俱下觀者無不感泣詰朝蝻盡死論者比之韓文公潮州驅鱷云交卸後回正定清理積案數讞大獄復委代行唐縣篆丁酉署理廣平府同知政聲卓著其年秋乞假歸到家七十六日卒子二長子煦另有傳次子熙邑廩生癸卯科副貢侯選直隸州州判民政部錄事歷充縣兩等小學校校長教育會會長經濟事務所副董農會會長熟悉地方公事諳練國家掌故地方有大建設紳學界多借重之郭之全原名之俊字友琴世居城南青石橋幼喜讀書有大志爲人精幹

工詩文善書法同治癸酉拔貢聯捷舉人光緒三年援例授內閣中書  
充本衙門撰文國史館方略館校對十二年考取軍機章京歷充方略  
館協修纂修及總校十九年軍機大臣禮親王奏保以侍讀補用分刑  
部敘次員外郎軍機處領班總理衙門行走恭親王奏保以四品京堂  
用慈禧皇太后迭賞御筆福字京內外大員多相引重二十六年拳匪  
肇亂內廷端王莊王及首相剛毅等咸崇奉之全獨以妖孽不可信  
極力諫諍弗納八國聯軍犯京師兩宮西狩之全隨扈西安奉旨以御  
史記名隨簡授廣東廉州府知府時廉州巨匪翁光甲聚亂有年郡城  
危如累卵道途行旅絕迹日甫暮城外三五里烽火頻張皆賊登臺拜  
會者之全接篆卽傳見紳耆招練團勇籌餉備械親督痛剿擒斬渠魁  
直搗其巢敘功賞加二品銜旋兼帶振新八營統領肅清多年積匪先  
後斬馘五千地方以安人民復業事聞奉旨以道員在任候補不論題  
選咨留遇缺卽補嗣復拿獲著名海寇鄒糖糕八傳旨嘉獎合郡人民  
愛戴如父母紳商贈牌匾以頌德者數百家二十九年九月丁內艱回  
籍民人祖餞跋涉百餘里廉紳見之全川資匱乏饋以贐儀辭弗受歸  
里後應北洋大臣袁項城電召入幕襄辦軍務以在廉積勞過度感患



痰疾至津復發卒於督署壽五十有七沒後兩廣總督岑春暄聞之深爲太息爲之專摺奏請卹典謂該員抱恢宏遠邁之才具封疆大臣之略肅清積匪積勞病故大才未竟大用深可惋惜奉旨追贈內閣學士加禮部侍郎銜給予蔭生知縣其長子傳文已保知縣以次子傳珩承襲世蔭均早沒之全胞弟之琦性至孝以讓敘知縣充山海關鐵路局支應委員拳匪之亂路局被劫員司皆逃琦奉委代理總辦奮不顧身維持錦關路綫照常通車保全難民無算保管路款鉅萬解送北洋論功保奏在任候補直隸州選授四川璧山縣未抵任卒

陳惠麟字心孚夢蘭第五子幼岐嶷嗜讀書過目成誦諸子百家類能得其大要尤精於繪事以憚南田爲宗性和易近人及爲政亦本此常度絕不務赫赫名年二十補博士弟子員有聲庠序光緒乙酉舉於鄉旋授光山縣教諭集士子橫經講學成就獨多劉中丞樹棠以才具優良勤求上理保奏得旨以知縣銓選邑東境金關鋪瀕河渡口爲光羅六縣往來孔道僅有窳敗不堪之民船一艘水漲時任意要索行旅苦之惠麟商於羅邑令張協中籌捐官船一艘遠近稱便庚子謁選赴都適拳匪搆亂兩宮西狩惠麟亦南旋中途屢與匪徒相值幾遭不測經惠

麟陳說大義匪卽引去明年出宰江西峽江縣峽鄙邑也迭經咸同兵燹地多空曠民不知書縣治又無城郭蒞任首建學校辦警察復於隙地樹桑以資提倡風氣爲之一振峽境濱江贛水暴漲則人畜漂沒爲患乃創設義渡局施船十餘艘民人德之爲立長生祿位牌於局中又捐廉建恤命亭一所以爲旅櫬歸依之地峽有錢糧分櫃設於水邊鎮者徵收員某虧公帑無力歸償代爲填補而不責報典史某沒不能成禮爲之處理身後一切其子不能扶柩歸復助以二百元峽人亟稱道之惟居官耿介積爲上峯所不憚甲辰夏縣治何君都吳謝二姓因爭柴械鬪互有夷傷府飭門子密查婪索不遂又爲所訶逐挾嫌以殺傷百餘命捏稟府爲所動電省撤惠麟任士庶譁然嗣省憲察其枉復飭回任民心始定由是遂萌去志然於民事仍勤勤懇懇如初至時越二年乞假歸去之日邑人祖餞江干途爲之塞歸里三年清帝遜位民國成立遂不復出於鎮西三里許構茅屋數椽闢地半畝顏曰勺園蒔花種竹吟咏其間著有惜陰書室詩鈔及筆記若干卷卒於民國六年壽六十有九卜葬於鎮北六鳳礪

陳斌麟字繩武夢蘭第六子天性誠篤有大志刻苦讀書無間寒暑嘗不

遠千里負笈從師期繼先志弱冠以州試冠軍院試第一補博士弟子員文字雙美爲學使馮聯棠所嘉許戊寅丁內艱服闋肄業大梁書院甲申以歲試優等食餼恩正五次秋闈奔走泥淖苦志勞筋銳氣不少減至甲午登賢書戊戌年已四十捷南宮觀政戶部分廣東司以醇直存心不尙阿附實地任事一應稿件手自裁擬歷任長官深倚重之司署十餘年公見外無私謁庚子兩宮西狩斌麟由房山楊村奔赴行在遇拳匪脅至祖師壇百方恫喝不少屈旋以黃表置其掌上焚之灰起匪謂神佑釋之脫險抵西安辛丑隨扈回都論功賞花翎四品銜因變法改度支部通阜司正主稿掌貨幣製造循名核實詳訂章程規模大具各省造幣廠成立部議選司員之幹練而有操守者充各省幣廠監督斌麟奉派福建並先赴長沙收東湘廠事宜旋改派湖北造幣廠監督斌麟嚴督工司考其勤惰而進退之凡購置之核銷質料之配合成色之較量無不力求實際武漢金融資以充裕成績卓著爲各省冠部議天津幣廠密邇京師較鄂廠爲尤重丁未調會辦天津廠務兼鑄銀幣駐廠五年興利剔弊國脈流通辛亥世局改革請假回籍不復與聞政事民元民軍據羅山二年白狼擾信光五里店適當其衝斌麟糾族

鄰籌辦防務布畫簡當人心以安自是兵匪連年葺寨垣辦民團凡公務興作必首先捐資數百緡以爲之倡五里鎮得未至邱墟民國壬戌享壽古稀年七十卒斌麟一生刻勵克承先志官部曹十餘年進秩四品掌幣政兩三省歷膺督辦所至重廉介持大體輿論歸之子二善恆善祝

王煦字昇初揚會長子年二十三補博士弟子員中式己丑科河南鄉試舉人三赴春官不第以謄錄充會典館協修保知縣分廣西充撫署文案主稿改委襄辦省垣警察成績昭著柯逢時中丞奇其才調督辦對河警察局對河者附省要區地衝而民雜號難治煦申規制嚴考察捐薪金充巡士犒賞人感奮樂爲用連獲巨盜以功保加同知銜癸卯鄉試調充同考官所拔皆知名士尋委權興業縣改武宣武宣匪區也是時朝廷方嚴失守城池革職拿問之令煦請於藩司張庭燎方伯籌餉募敢死士數百人勤加訓練卽令調查戶口搜緝匪類又清理訟獄以伸冤抑招集流亡以墾荒蕪境內大治某村素窩匪上峯密檄痛勦煦上言良民被脅者多當分別玉石一面馳諭村民擒獻渠魁自贖兵不血刃而事平保全至數百戶已柳州駐軍譁變將出竄距縣境僅百里

僚幕等勸煦他避不應乃皆遁去煦激厲兵士督隊馳至邊要扼守部署甫定變兵果蜂擁至聞有備改道他竄省軍乘其後剿平之撫轅得報有王令膽識俱優才堪大用之褒是役出發時身曝烈日中暫歸忽大雨滂沱衣甲盡溼以是致疾久不愈遂請假回省養疴次年奉派赴慶遠屬驗烙槍械力疾任事故於河池州差次

劉子榮字鏡珊世居城內鮑家街生而聰穎博覽羣書工楷隸能文章性方嚴嫉惡如讎所與交遊者皆一時知名士弱冠食廩領南汝光道朱壽鏞創建豫南書院拔充齋長領袖羣生光緒癸卯舉於鄉適國家廢科舉頒學制本縣創設高等小學於申陽書院又改試院爲兩等小校子榮兼任校長手訂管教章程成就英髦以數百計旋任縣勸學所長整頓學款拓充教育論者以爲信陽學界之先導焉宣統己酉經豫撫保送考取內閣中書民國元年選充省議會議員所提議案皆一時應興應革他人所不能言者如整飭官方核減軍隊裁汰吏胥肅清土匪平均銅元價值劃一丁地銀價改正食鹽商運皆其犖犖在人耳目者然詞鋒所及不少假借以此積爲權要所忌突於會場遭狙擊傷及髀骨昇赴官醫院剝骨撥彈血殷重得見者股栗而子榮談笑自若謂爲

三千萬同胞流血雖死何憾其壯烈之氣不屈不撓如此二年授任獲嘉下車首除陋規嚴緝捕親理訴訟判決如流又開永利渠約長十四里溉農田千五百頃民利賴之四年二屆考試知事及格分四川宰夾江夾鄮邑也子榮興學育才通商惠工行之期年民馴化之泊卸篆適川滇軍興道梗淹滯於夾衣食莫給鬻書爲活軍事粗定夾人追思德政爲醴金三百資其行歸途三遇盜劫又感受風霜患病幾殆抵里家益窘九年奉檄南召到任連年水旱大饑流亡載道乃請准內政部發振糧三千五百石並籲請南洋救濟會撥振款七千二百元華洋義振會撥款三萬元募款購小米一百石前後救活災民十二萬口民慶更生頌聲載道秩滿回省旅棗蕭然十四年卒於開封旅次所著有壺園文稿七峯舒嘯館詩草申國舊聞辛亥日記壺園判牘蜀遊筆記西蜀聞見錄藥爐滂餘都數十卷

李炳堃字旭初開昭長子生而瑰異好讀書爲祖裕澤所鍾愛少長卽研究經史之學入開封明道書院肄業庚子辛丑科鄉試房薦未售次年偕胞弟世鈞入邑庠遵例報捐度支部主事畢業國立法政專校奏獎副貢以員外郎用分發北京地方審判廳候補推事入民國考取三屆

知事及格分雲南署鄧川縣事八年調陝西歷署西鄉巴鎮寧虢等縣平生思慮周密遇事統籌終始鉅細不遺必澈底計畫成敗而後著手以故用心過勞而氣體亦爲之損耗焉任鄧川八閱月折獄治匪成績卓著國府明令褒獎授七等嘉禾章鄧與賓川毗連河流爲兩縣最大利源兩方爭持動輒聚衆數千人互相械鬪炳堃會同履勘累年懸案數言解決永平隊長誣稟苗人不軌槍殺多命炳堃攜一徒手差役步行往查得苗人柔順狀據實稟請銷案上憲深爲嘉許其宰西鄉也適駐防川軍改編某團閉城執械搜查官民宅署槍聲隆隆全城鼎沸炳堃關說軍官迎旅長入城鎮壓患立弭次年川軍西歸限期索開拔費交通斷絕秩序大亂炳堃一面籌款一面會同旅長沿街查詢撫循兵民其倡亂者感於炳堃平日之恩禮無不頽首受約以去嗣某軍至巴鎮騷擾亦如西鄉上峯知炳堃之能復調署巴鎮炳堃躬率民團彈壓某軍聞風撤退地方寧謐西鄉境內廣種罌粟居民乏食炳堃親赴各鄉調查存糧之戶除留足自給外按路遠近劃一糧價出糶由縣發給碾商印照以現金向糧戶糶穀入市發賣全活無算時禁煙功令森嚴而政出多門軍政紳役無不資以爲利乃至剗苗者收稅者派畝捐者

各委員同時並至縣府幾無所適從炳堃面陳當事者謂煙苗已至成熟之期暫緩數日陝南立致數百萬餉需人民生計亦不至斷絕轉瞬間禁令決可實行不然徒以便貪污而斂民怨耳不聽卒釀煙戶抗官之慘禍而川軍之駐陝者果勾結各縣收括煙款數百萬計某某縣長有利用時機自收煙款鉅萬以去者獨炳堃潔已一無所預人皆服其先見與清節云十年胞弟世蓮病沒漢中請假回籍家居不預公事而地方慈善公益竭力不肯後人十四年十二月信陽戰事吃緊炳堃以事急於二十七日率街鄰慰勞西城駐軍次晨諸軍潰退各城被劫獨西城倖免未幾鄂軍圍城居民米薪告絕炳堃與同志數人籌款於城根開辦粥廠每日就食者千二百餘人圍解始罷十七年長臺等處民匪激戰地方公請某軍剿匪須出發費五千元無著公議貸天主堂神甫款異日由地方歸還縣長某不肯署保炳堃曰民命危在旦夕早籌一時之款卽早出一時之兵此何等時縣長乃袖手耶某軍長以爲然勒令縣長負貸款責卽刻出兵匪始遁其臨變能斷如此年五十八卒蘇裕孚字景韓蘇家樓人光緒癸卯舉人天姿穎異博極羣書能文章掃去一切門面語詩亦俊逸改革後歷任河南固始陝西華陰佛坪等縣



知事所至推行新政興利除弊務持大體不矜苛細勤緝捕聽斷明敏在固始任內有巨紳兄弟爭產涉訟裕孚理論情遣皆感泣去在佛坪獲著匪蒙頒獎章早年逝世士論惜之與邑名士李芝軒陳春畦董次義交最密唱和頗多著有然非子吟草太華遊記行世

德行

孝友  
忠義

善良

三國吳孟宗字公武江夏鄢人少從南陽李肅學其母爲作厚褥大被人問故母曰小兒無德致客客多貧故爲廣被庶可得氣味相投矣仕吳爲令每得食物必以寄母不敢先食母嗜筍尙未生宗入林哀泣筍忽迸出聞母病犯禁委官晉武帝時爲魚池監作鮓寄母母曰何不避嫌遂還之宗常爲光祿與朝士大夫會有強之酒者飲一杯便吐半是麥飯上聞歎息曰清德如此耶

晉孟陋字少孤江夏鄢人嘉弟也少而貞立清操絕倫布衣蔬食以文籍自娛口不言世事時或弋釣孤興獨歸雖家人亦不知其所之也喪母毀瘠殆於滅性不飲酒食肉十有餘年親族謂之曰少孤誰無父母誰有父母聖人制禮令賢者俯就不肖者企及若使滅性無嗣更爲不孝也陋感此言然後從吉由是名聞海內簡文帝輔政辟爲參軍稱疾不起桓溫躬往造焉或謂溫曰孟陋高行學爲儒宗宜引在府以和鼎味溫歎曰會稽王尙不能屈非敢擬議也陋聞之曰桓公正當以我不往故耳億兆之人無官者十居其九豈皆高士哉我疾病不敢共相王之命非敢爲高也由是名稱益重博學多通長於三禮註論語行於世卒

以壽終

清杜文秀杜家畝嘉慶時人母鍾氏秀平時奉之孝一日母病醫藥罔效文秀禱於神誓終身齋戒並割股和藥以進母飲之曰是何異味秀不敢言母隨愈享年七十七秀亦七十三今其子孫蕃衍

岳景唐字紹齋城東北岳家樓人道光甲辰科舉人性至孝父喪毀形骨立及葬景唐傷於哀猝死家人惑於堪輿家犯重喪之說亟移棺停山麓景唐甦杖而省墓親父棺一慟絕

姚柱林字砥齋城內監生性孝友道光初年經商起家疏財仗義凡修橋聘喪助貧濟孤諸善事爭先恐後有爲報施之說者雅不欲聞柱林髫齡失怙事母氏許溫清定省終身不減孺忱母終飾葬如儀經費弗攀兄弟長兄早逝乏嗣僅遺寡嫂劉氏每一念及淚輒涔涔下謂寡嫂無儻石之養大宗無應祀之人皆吾責也慨分私產八十餘石畀之擇子姪輩之醇且哲者其賢爲嗣厥後寡嫂享壽八旬孫曾蕃衍有聲庠序皆柱林友于克敦之力也

何文升字秀三家貧居白馬山中樵采度日事母至孝每日鬻薪於市必購糖餅一歸奉母一日至市餅罄文升蹙額賣餅者詢得其故奇之曰

吾閩人多矣類皆懷餅飼兒者子獨以奉母異哉乃爲作餅與之嘗爲人傭工食輒舍肉遺母以爲常母晚年患癱瘓夜須人轉側妻袁氏左右伺應一夜數起雖祁寒盛暑未嘗倦厭適袁氏在產蔭倩鄰媪代執役者三夕母謂曰吾三夕無汝苦甚矣文升卒年八十一袁氏七十有六子傳中光緒丁丑進士歷官兵部主事員外郎

汪永延字壽民歲貢生性至孝著有文昌四字孝經弟子規旨已付梓其父循菴於咸豐五年病甚劇醫云必嘗糞甜苦方可卜其病之吉凶延爲嘗之

蘇應瑞字兆豐邑增生太子城人性醇厚事親孝咸豐季年其父體仁遭捻匪害自愧事親無狀誓以身殉數投水遇救未果哀號兩月以憂卒陳友賢弟友益吳家店人家素貧協力貿易後漸發達建置田宅延師教子賢子芾棠廩生益子佩歲貢生晚年食指日繁子姪輩析居賢與益終身同居不忍析離食必同席寢必同室友于純篤愈老而彌切各享壽八旬餘相繼卒

王懷川字兩帆增廣生城內人性和易近人不妄言笑不苟取與鄰里無少長悉敬之幼事親以孝聞胞兄沒孤姪永暄兄妹四人撫若己出飲

食教誨恩勤逾父母及長擇配士族而身任其費無吝色以筆耕積有薄產讓與之姪蒙其教養食餼領鄉薦官甯陵縣教諭懷川設帳授徒多所成就後遠於醫理活人甚衆晚年舉一子名永藩廉介有乃父風曹暹字海門蕭王店人邑附生家貧力學常偕伯兄肄業汝郡南湖書院會伯兄卒扶柩旋里喪葬訖仍詣院時屆歲除同舍生皆請假回籍獨暹一燈熒然呻唔不輟以是見知於廩鹿儕太守府試拔置前列補充博士弟子教授鄉里誨人不倦不以束脩厚薄分爲人和平正直負一鄉重望沒後數十年里人思之

沈本恕字心如衛東村平河店人幼好學能文章性和易與人無忤事母至孝年五十餘猶作孺慕與寡嫂同居始終敬禮不衰鄉里皆薰其德而爲善良焉

蘇允安衛北村蘇家樓人事母極孝光緒二十三年父病劇或謂子捨身天目山白龍潭可愈允安信之該山險惡由山巔投下全身無恙父病亦尋愈

許大倫綽號大忙人以其終歲勤動除夕猶工作故以爲名住譚家河性至孝家貧親老日採樵夜織屢販菽米以養親愧乏雞豚之奉暇則捕

魚蝦以代之而已則背親啖糠粃光緒初年母病劇百方調治無效大倫午夜焚香告天願以身代仍無效情急乃效古人割肝醫親於無人時以利刃洞胸割肝一葉量絕於地弟大度歸見之急扒雞皮貼洞口以布束之煎薑湯徐徐灌之移時復甦囑弟烹肝進母母病尋已逾十餘日傷痕亦愈惟雞皮原有雞毛永遠弗脫是殆孝能格天割肝未至隕命傷痕雞毛長存永表孝思不匱云

葉正春孝思純篤奉事老親敬謹弗衰母故事老父尤謹侍寢幃房解衣滌器二十年如一日鄉鄰欽仰咸稱孝子云

汪燮字信夫光緒壬辰入泮孝事雙親厲行善事著有關帝覺世經梓行於世其母病危燮憂甚割股以進母病尋愈

何傳濟字春圃游河店人家赤貧方孩提時父文蔚鬻其母郝氏於江南鍋客傳濟少長問父兒母何在父漫應之曰已死問墓何在曰被暴水衝去傳濟疑之轉詢之姨得實傳濟卽治出門行裝父問何往傳濟答曰兒將尋母言已淚涔涔下父無以應傳濟至江南偶入客肆同座一人敘及舊事卽昔日之鍋客也遂與客偕見母留其家讀書積數年文蔚忽遭回祿家私蕩然赴江南尋傳濟傳濟以出母義與父絕不便同

居因與左近覓館教讀以脩金供父甘旨仍以暇時奉母晨昏未逾年父死傳濟權厝父柩於其地而自歸家就館兩年以所得資負父骨歸葬葬畢復至江南奉母母沒始歸信陽時年已三十餘矣年四十一入泮又二年食餼未五十卒

高念勳八甲村人業農生平孝行惟謹光緒庚寅母周氏病篤勳侍湯藥無間晝夜醫藥無效乃割股以進母病尋已

沈國瑞字新亭清河村南王家崗人教諭汝南孫幼侍母疾割股啖之愈長奉老親愈形肫篤後母卒祭葬盡禮兄老無依瑞收養於家及兄病故殯費皆瑞任之又立兄子爲己子年四十餘生一子能克家晚年精通醫術濟世活人鄉里咸敬慕焉

胡源澄胡源廣胞兄弟也居平昌關孝友成性家產豐裕終身不忍分居臨終遺囑合葬生同居死同穴須臾不忍離也

沈有庚字芳圃本恕從子性孝友少孤母張氏撫之成立自少至長無違命兄伯仲皆早逝事兩寡嫂始終盡禮與弟延庚同居十餘載和好無間延庚卒遺一女爲擇佳婿奩具與己女等與人交出以至誠處姻族一視同仁戚某家貧醫年失恃招至家飲食教誨迄於成人使復其所

其他義行多此類子四啓瑞啓鎔並有聲庠序

陳善初字芷泉邑附生性繕直嚴正不合流俗義所不可雖勢豪不爲之屈兄弟四人以出繼三房所得較薄坦然處之不校也諸兄弟皆客寓異縣本生母首邱念切善初迎養家中沒後喪葬竭力擔任不復少存諛卸族人重其行公推爲族正勸善匡過於修譜建祠等事尤多規畫年六十五卒兄善均字古枏附生嗜學工詩吐屬風雅早年與潢川李笙堂選拔商城黃枚岑太史聯詩社文譽斐然後遁居黃城山下足迹不履城市年六十卒詩稿經兵燹皆散佚

張宗齡李家寨羅家灣人父長病五年宗齡奉侍日夜無倦容鄉里稱爲孝子

周開照出山店人字子明性孝友事奉嗣母克盡子職母病親侍湯藥晝夜廢寢食歷數月無倦容並禱於神設義渡船橋呈縣立案母病果愈董用富五倫幼子善拳術性至友愛昆仲六人約世同居家有董家堰田稞九十六石鑿一塘面積二十畝以資灌溉遇旱亦熟規定每歲正月初二清理稞務公平分配子孫守其法至今八代親屬百餘人公宅在吳家店東街一鄉稱大家焉



劉士秀六區廉潔鄉人生有至性父早沒家貧奉母甘旨無缺侍母病躬親湯藥衣不解帶及沒廬墓常繞墳巡視悲泣三年無笑容制滿猶不釋服遠近皆稱孝子

董明善吳家鎮人素行孝友民國二年八月十五日夜白狼襲陷鎮寨槍聲四起居氏擾亂明善父年已七十二子數歲家人張皇無計父促明善攜孫速去曰余老矣死何足惜勿戀也明善不可強拽其父至僻巷某貧嫗所稽首哀懇嫗以被覆父榻上稱有病嫗諾之方出見胞姪奔逃被匪傷血流滿面又挈至徐姓飯店囑爲保護急奔歸將子及家人安置暗處而自赴一麵房卸衣毀容爲之工作匪去一家皆獲保全人以爲有至行尤有急智云後父病明善伺奉湯藥不離左右喪葬哀禮兼至其家亦日臻富有

周葵字際嘉住南馬家販今五區和鄉邑增生歲貢其功次子與兄附生焯相友愛終其身同居不忍分析葵品行端方設館授徒終日端坐如神一時知名士多出其門享壽七十九歲

張齊字橫齋馮羅店人兄弟三人早已析居弟洛夫婦雙亡遺子振機五齡齊撫養成入爲之授室齊有五子置田產百餘石願與振機以二股

平分振機不肯鬻主張甚力振機推讓再四親族公議爲振機提榷八石餘作六股勻分鄉里傳爲佳話長子振家邑附生有乃父風

熊體義字宜亭西雙河人幼失怙事母至孝冬溫夏清無或缺母壽八十餘卒體義廬墓側寢苦枕塊朝夕號泣邑進士八三野老郭鑑庚贈以聯云主人自是文章伯洛邑從來天地中同治間湯銘盤降乩書云宜亭先生五倫乃絕無僅有之人也其爲神人欽敬如此弟體仁精醫術懸壺施診極貧者兼施衣食錢財不取償不受報難兄難弟人無間言潘遵法字兩亭清河村大廟畷人與弟遵汝遵泗均以孝友聞遵法性曠達以候補按察司司獄宦遊湖北無所遇改習醫工鍼灸施診不受謝年七十嘗跪老母前以博歡笑遵汝治家勤儉建宗祠修族譜終身侍母不肯遠離遵泗積學未售設帳授徒以倫常教人館中有佳肴必留以奉母或邀兩兄同享宗族稱孝鄉黨稱弟三人殆一致焉其母壽至九十七歲遵法等均年七十餘始終

潘星光字梓丞原名立言大廟畷人邑附生幼失怙事母至孝嘗割股療母病刀痕宛然行年三十小試不利同學席崇喆於除夕夢見天榜有潘星光名是年州試時崇喆戲改填立言試卷爲星光字樣及試列前

茅入郡庠人以爲孝行之報

余玉岷字仙峯大廟暇人爲人品行端方任地方紳士三十餘年出入一無所私尤能友愛兄弟遇事同商有聞必告出同行食同享五十餘年有如一曰迄沒時弟雲峯哭之有如親喪人以爲兩難

夏澤雲劉家河人武庠生夏慶芳子不事詩書深明大義家貧能事其親母病不食雲亦不食早晚出入必問母安否民國某年其子曉堂投筆而逃雲尋之至應山境花山被匪擄罵不絕口遇害

以上孝友

明張橋世居馮家莊性淡泊樂善好施一生義行極多萬曆三十六年自樹碑敘其概略謂余家世積德懼滿盈之不祥辛勤中所博錢穀施之寺觀十之二施之乞丐十之五施之橋梁十八九迤州而西環店之四路一木一石姑且勿論卽難大之投若出力外惟是勉強而後卽安云云今其碑尙在

計所建石橋本店關王冲將軍廟黑溝冲葉家河溝店西大塘梢千工堰徐家販邊山方家溝二十里大路口共九座磚橋龔鬍子冲關王冲共二座行路之人至今豔稱之橋官太醫院判吏目與妻陳氏俱年近九十方沒子三綱寧夏中衛鎮撫司鎮撫孫四

長如芝天啓辛酉科舉人崇禎辛未科進士如蕙與如芝同榜舉人崇禎甲戌科進士入清官至太僕寺正卿有傳見政事三如葵四如芹恩貢宣城知縣有傳見政事曾孫冠如蕙子官貢會昌知縣啓宸如芹姪歲貢察歲貢如芹子其裔孫季元清季附生

侯始覲信陽人多善行族繁有少婦新寡者覲聞之必使僕婢頻頻問饋爲之策長遠令婦可以溫飽人問之覲曰婦無夫已不若人再無養何處求人不由我不矜恤也族婦有守節二十年者覲必約鄉里舉報賴以建坊者不下十餘家後生子爲總戎覲受封焉見徐澤醇善行錄

周汝平字淮東諸生任俠能詩有膂力喜赴人急見竹里談錄

清初陳有德五里店人敦崇信義質直不欺力行善事一鄉歌誦有楚人應山籍某甲經商五里店與有德至好每臘終營業結帳輒祕封其贏餘屬有德保管回籍度歲至次年燈節後開市復來領取歲以爲常某歲交有德八百金歸次年不復至詢其親屬人無識者閱二十餘年一日有德飲於他所遇一少年貌似某甲問其籍與姓則與甲同問識甲否則曰吾父也有德握之而喜攜至家敘舊交餉以酒肉出金歸之封識宛然蓋某甲歸卽死其存金迄未以告人也少年請剖分之卒不受

舉此一端可概其餘後其子孫代有興者爲邑望族人以爲厚德之報郭聚學字誨博進士聚奎堂兄廉州太守之全曾祖也榮贈二品封典聚學忠厚正直樂善好施見義必爲抑強扶弱爲一方之望乾隆時青石橋地處山隘烏道紆迴集市素冷落乃定公秤公斗出納不准絲毫短折凡負物劣重來售未罄者以時價悉購之以息行商往返負擔之苦所購菜蔬柴草酌給窮戶不取分文遇有鼠雀紛爭秉公處理決不准依勢凌人逞強鬪毆偶有宵小入市輒給錢數百飭卽出境不准逗遛盜風頓息人稱樂土遠近趨就遂成鉅鎮焉汝郡費太守廣吉聞其德行可嘉贈送德乃福基匾額臨終預有鳧鳥由西飛集庭堂翔鳴移時仍復向西飛去數日無疾而終人以爲鳧鳥來迎云

楊廷棟字弼亮城西黃龍寺人其先故楚籍清初有名思生者生子彬廷棟父也遷邑南夏涼村而至黃龍寺構地定居有中人產廷棟以守兼創置田數千石遂爲邑西大家平生疏財仗義里中貧不能娶死不及葬及臘盡不能度歲者恆酌其所需而資助之不責償亦不望報嘉慶初教匪過境遇之應以詭詞得免邑曹履吉以廉吏罷官以親友之借貸無以應商之廷棟慨然資數百金竟事不索息履吉以是重之訂姻

好焉子三長連元舉庚申武鄉試次連甲國學季連魁武庠能文其孫  
涵清萃清文清席祖業服用儉樸而推解尤廣咸同間髮捻披猖居民  
逃避涵清兄弟捐貲築寨筆架山以資捍衛時湖北應山巨室郝姓佃  
戶雇工暨桐汝息各縣與邑東北尙家河等處難民先後轉徙黃龍寺  
山谷者不下數千人皆乏食待斃涵清與諸弟傾所儲倉穀兩千餘石  
計口分配山材任其砍燒迨倉穀罄後復四出告貸節次振濟寒者衣  
之病者藥之死者施以棺木舍義地六塊免致暴露嬰兒無依者七人  
雇嫗育之事平資遣回籍鄉里高其義難民息邑舉人張士杰文學鄒  
大邦增生楊敬修附生邱澤銘樹楊善人碑以紀其德焉涵清性尤友  
愛萃清承祧二門以已分之田數十石付之俾與己產均等云涵清字  
春圃年七十一卒子世和附貢生亦多義行萃清字潤之

陳文誥字聖俞世居平昌幼失怙母撫之成立文誥念母苦節竭誠致養  
逮其沒歲時致祭未嘗不痛哭流涕嘉慶初爲母請旌表購地樹坊並  
建祠堂朔望薦香置祭田四十畝以爲時饗及子孫讀書之費治家專  
本朱伯廬格言又重修陳氏宗牒以篤族誼平昌西臨淮水橋船損壞  
行人病涉文誥捐修板橋一座附船一隻外施橋地十畝資以歲修並

贈養河夫免致別有需索守祠住戶某暨債戶織工鐵工並助以資本令毋失業鄉里稱爲陳善人年七十二卒寢疾時召家人取所藏債券不能償者焚之曰吾家雖不大富然固不需此而彼無債累可活矣嗣子樂韶性謹厚動止有常跬步必於禮祭品必親視而後進夙善理家米鹽日用無鉅細皆登記布衣樸潔無或垢污督僕耕作雞豚畜養以時竹頭木屑未嘗拋棄經常橋船檢點修補躬自監視事親孝尺布寸縷必稟命而後行母或盛怒起敬起孝下氣柔聲務求霽威而後止待人以誠於戚友尊長雖私室稱呼未嘗敢褻也孫志豪性豁達器量淵涵喜怒不形於色口不臧否人物素喜賓客處人羣中泛應曲當交久而敬無戲言無惰容以是賢者皆樂近之不肖者見之輒爲斂迹年二十七補縣學生員不樂仕進惟專塾聘名師課諸子弟殷勤教誨不厭不倦上承先志並拓修祠堂增置祭田四十畝橋梁又益以貲產令可持久其他義行甚多論者謂能承乃祖攸行云

周萬福字全堂柳林人爲人謙謹恭恕制行不欺嘗買蠟燭歸秤之逾量持退還行戶疑其嫌少添兩枝萬福曰非也我無須如此之多特仍付君賣脫耳六十後乘輿過杜家阪街輒下輿夫固請勿下萬福曰我適

欲理髮事訖仍步行出街始登輿去晚年以子立宰貴封文林郎子爲製命服寄歸生前未嘗一御道光二十七年卒壽八十四立宰嘉慶戊辰舉人大挑一等分福建補寧德縣知縣歷署壽寧甌寧崇安等縣四調同考官在寧德修復文廟書院百廢具舉循聲大起全堂嘗馳書諭之曰周氏歷代以耕讀爲業今汝得官如不好做可棄之我家不愁沒日子過切不要壞良心立宰復書曰官真不好做兒不敢棄只格外謹慎遇命案更加仔細遵奉嚴命萬萬不敢做壞良心的事旋以萬福年高請終養歸

劉德潤字兩村賦性正直持已勤儉家貧以營運糊口咸同中邑逼賊氛軍書旁午知州宮國勳辟充會計司軍需德潤感激知遇盡瘁圖報國勳亦倚畀之如左右手事無鉅細悉就諮商德潤爲之細心清釐竭誠獻替以故餉無虛糜斗大一邑不復知有大軍之擾國勳又以德潤一人過勞增辟其父與弟共爲襄助是時餉局設城隍廟中其父出入必誓於神以爲德潤兄弟勗又以其暇設廠煮粥振濟難民閭境感頌其德德潤父子兄弟均年登耄耋子孫蕃衍能世其家

陳策洋河人慷慨好施見義勇爲於本鎮捐款創修文昌閣殿廊門廡共



二十餘楹結構宏敞並施田地爲香火資於本街砌石路九條

西巷口西塘坡口

藥巷口強巷口東岳廟前

重修雷家營蔣家堂北河小明塘石橋三補

修徐家臺陳家營石橋二其新建之石橋則有漂清岡雷家河二河販  
喝牛店田波販周家堂雷家營東陡溝河皂角潭上河劉家井周家販  
毛狗販上下河北販東西榛茨園南共十六座其他郵死濟生敬老賙  
貧種種善舉尤不可枚舉後其子孫蕃衍爲邑東北望族

趙鵬翮乾隆時人住衛北村見城北十里河山水衝刷驛路崎嶇行旅苦  
之慨解私囊捐修石橋平治道路易險阻爲坦途行人德之爲之勒石  
稱義士焉

周源頤乾隆時太學生住阜陽村性孝友好慈善寒施衣饑施粥賴以全  
活者難以數計遇鄰里鼠雀之爭排難解紛墊錢息事臨終將借券悉  
勾銷焚之鄉人嘖嘖稱善人焉

陳休仁乾隆初年人住和孝營篤厚仁慈博施濟衆獨立捐修和孝營之  
磚橋暨雙溝喬家廟蔣八里廟等石橋功德遺澤強半猶存至今稱道  
弗衰

李見龍衛北村人乾隆時以樵採起家樂善好施凡鄰里饑寒者推解與

之橋廟傾圮者捐資修之晚年乏嗣篤行益力河南藩憲趙旌以樂善不倦匾額並著於彰善錄鄉人德之爲立善人碑

張綬佩字宴亭東雙河響山人乾隆辛巳進士充八旗官學教習授雲南蒙自知縣署魯甸分府所至有政聲致仕歸適福文襄康安南征過境氣餒薰灼僕從尤騷擾所乘轎極大以三十二人舁之所經棚欄牌坊皆須拆去地方患之知福曾受業綬佩咸往請教綬佩曰勿張皇我往解之遂迎謁於明港驛相見之頃握手道故異常歡洽隨陳地方瘠苦之狀並謂城內坊表極多拆之匪易復之更難且申南山路羊腸尊與實難通行福立命改轎入城一切供張大減騶從無敢譁者官紳德之至今傳爲美談云有易經註二卷已刻行世今佚

嚴德一字尹池平昌關人性瀟灑工詩不事煨鍊純任自然鑽陳姓有園名管春德一以詩調之曰爲愛春光欲管春管來獨自媚芳辰不如不管任他去散入天涯處處新語雖恢諧而具民胞物與之思可以規其志矣子法謙道光癸卯舉人全家居鎮上德一獨自卜居郊外山水清妙處構屋數椽闢地爲園徧植花木備一小奚奴司灌溉時吟嘯其中客至躬自析薪淪茗縱談今古不倦唱和尤多暇則攜筇杖戴簪笠綸

詳往來儵然自適人望見之者以爲神仙中人年九十卒詩稿甚富皆散佚

嚴紹曾字敬庵世居平昌關生九歲而孤其大父繡巖邑廩生教之嚴長卽能文試輒冠其曹院試發併而迄未得青一衿晚年其長子祖慶捷南宮歷宰大邑次子與孫輩亦先後食餼遊庠鄉人趨向作賀紹曾雖色然喜然終以平生不遇言次仍爲之鬱鬱紹曾貌嚴毅而和易近人與人語唯恐傷之下至販夫走卒亦由由然不忍去然絕不可干以私遇有不平義形於色鄉里有糾葛多就之一言而解市井無賴聞聲斂迹去族中躡弛子弟畏之甚於父師家僅中貲而好施與費不必多人恆賴以濟遇歲歉勸紳富出穀以糶而身爲之倡以故穀價常平不虞艱食近村亟賴之一言一行遠近奉爲規範沒後垂三十年人猶稱道之不去口云

萬幾字惕齋當谷村人附生好讀書精易數家赤貧藉硯田爲生爲人慈祥愷悌誨子弟循循然以孝弟爲先其好善之誠雖一細物不肯戕遇惡人則侃侃正論不少避忌里有地痞王麻子者自髮捻中歸跨大馬挾兩衛兵到處索供給幾面責之王露刃相向幾起而去因命數力人

禽之送官正法輿論大快咸豐十一年髮軍犯境幾年八十矣路遇匪索其衣鞋以刀置項上脅之幾曰汝何爲我豈畏死者遂釋去人問之曰先生懼乎曰彼習而爲惡亦人耳何懼爲年九十餘卒

李秀章字禧庵南鄉磨盤寨人嘉道間移居城內平生仗義疏財拯饑溺如不及親黨待以舉火者十數家解衣推食不分遠邇家貧死不能斂者贈以棺一具楮五斤在城外曾家園捨義地數畝聽貧人叢葬女不能嫁者助以奩資每歲與藥肆約訂藥單三百張以給疾瘍之無力償藥費者於城南隅劉家塘設義塾三以惠寒士於漸河橋梁寺設三義橋以濟行人小商販則貸以資本不取利虧者復貸之至再至三無德色每年終備州票二百串以贖極貧之戶其來求助者另給以錢米早晚登城下瞰附郭居戶有突無炊煙室無燈火者必謹默識之於除夕前三日內用紅紙裹鈔票二張親身由門縫或窗隙遞入初不告以姓名往往風雪暮夜至手足癱瘓猶不歸也咸豐初髮捻猖獗難民鬻集城廂秀章於劉家塘營茅屋十八間居產婦三十餘人飲食藥材胥取給焉六年歲大饑一日秀章自城赴鄉路經八家畝見有饑民母子二人擁一少婦而泣者問之則以一家六口不能俱活鬻婦爲某富室妾

將送之往不忍故泣也秀章乃出貲贖歸復厚卹之令得完聚是時匪益熾秀章佐地方官辦團練壁畫精詳屢著勞績七年秋大府檄赴柳林助剿秀章率精銳三百據險死戰一晝夜幾殆援至始解論功賞五品服年四十八卒彌留時猶誡子孫毋苛待佃戶婢女不准價賣作妾其家世世奉爲成法子五長樹蕓廩生寶豐縣教諭四子樹敏官至永春州直隸州知州署福寧府知府孫聯奎舉人聯輝舉人山東費縣知縣聯琦附生官戶部員外聯璜廩生曾孫桂芳自由縣知事達留學美國農工銀行行長人材蔚起爲邑望族

王敬紹字衣庵歸德教授金印季子附貢生中年因貧棄儒業魚鹽累費鉅萬樂善好施見義勇爲粵匪北犯捐銀三百兩繕城防豫撫英賞義固金湯匾旌之又捐鉅金令長子顯曾籌辦團練匪逼城敬紹偕官紳櫻城拒守偵匪懈令顯曾乘夜督隊出襲擊之於下關匪大敗東竄豫撫邊奏獎州同並頒給有勇知方匾額亂稍平設南城義塾施東關外義地捐建城南綱領橋並他處石橋木橋多處歲大凶設粥廠施棉衣婦女就食者遇胎產多暴露街巷造草房二十餘間於犂棧街爲產室計口授食弗令失所親友力不能嫁娶者量其所需以助之貧民有鬻

妻女求活者則出貲贖歸令完娶終不洩己姓名晚年怡情翰墨手不釋卷耆德高行閭邑欽仰沒之日婦孺皆感泣會葬者填街塞巷敬紹少子揚曾官無極行唐等縣知縣臨洛關同知有政聲諸孫入庠食餼登賢書比踵相接人皆以爲義行之報

陳榮林字顏香世居洋河鎮陝西候補府經歷咸豐季年捻首陳大濬南侵邑東北蕭王店蕭曹店龍井等處淪爲匪區響應正陽陡溝蕭文信人心搖動逃避縣城公推榮林主辦團防募二百五十人分守五門昕夕籌畫勞怨不辭並解囊助餉歷數年如一日又以洋河扼賊來孔道爲縣屏蔽倡議建築寨隍招集流亡歸里復業協力守禦無事則散處爲農有事則登陴固守屹然爲東北重鎮全縣大局恃以不搖邑舊無試院每逢縣考於縣署大堂下搭蓆棚藉資蔽覆士子自攜几案偏促如轅下駒寒熱風雨苦不可言榮林承父龍光遺志與弟炳林捐款鳩工建考棚七十餘間合邑頌仰事詳教育志今其子孫蕃衍多能繼其志云

蘇振儒字純齋太子城人生性和易氣度淵深待人接以至誠雖至暴悍見之無不肅然改容咸同間髮捻蔓延邑境振儒辦團練編保甲築寨

堡嚴斥埃和輯鄰村抗拒強虜難民保全無算村舊置鄉約一名因所轄過侈飛糧無可稽查往往爲之破家振儒爲言於邑宰析村而兩之其患始甦地方每歲報夫蠹役劣紳相緣爲奸鄉民譁謬轉輾無已時振儒爲設調劑之法公私便之生平好讀書以家累不得已廢學延聘名師於家以訓子孫族戚子弟爭往就學成材極衆邑中識與不識皆目爲長者壽九十七卒

伍蔭南字西崖馮家莊人同治初以典史分湖北候補歷署京山宋河巡檢耶縣典史代理荆門州事居官廉惠非義不取所至有聲然孤介寡合直道不容沈抑下僚二十年終無寸進平素好讀書喜爲舉業所從遊皆名下士卒以文章憎命屢躓名場晚以貲郎進非其志也卒年六十一其兄茂桂字秋亮官山東濰縣縣丞廉平有守上流推重委署濰縣事未任卒

周澗居仙石畷樂善好施凡困窮請助者無不遂其願道咸間冬多大雪深山巖戶每因乏火無糧餓斃澗多購火鑪置竹筒閉紙煤灰遇雪久必使數人負鹽米火鑪等物分途赴山尋施活人無算鄉人德之至今猶傳頌焉

陳鍾秀衛西村陳家寨人武庠生性好善咸豐六年歲饑施粥施衣全活甚衆鄉人德之爲立善人碑於嵩林山之大路旁

馬昂樂古城寨首主辦團練時髮匪過境擄南北良家子弟修成滿髮與匪無異後雖逸出沿途捕獲誤殺者衆昂樂詳審真僞存活甚衆捐修馬家橋董家橋兩座又施義地十餘畝鄉里稱之

歐陽虔銘字玉亭城內人性豪爽樂善好施爭先恐後咸豐十年捐資創修東岳廟之五聖殿爲置衛東村田稷十八石又施自置八甲村田稷十四石五斗一併交付東岳廟炎帝會管業永作香火之資又施奎樓文昌會歲修田稷八石十一年於小南門外灑河施木質雙橋一道約百餘孔又施渡船一隻捐自當田稷六石督制錢四十緡交橋會經理收租生息以作橋船歲修及船夫工食往來過渡者不准索船資遺澤至今猶存又捐修東關外天心廟東首大路二里餘中鋪石條以利行人又捐修城內櫻桃園甬街道中鋪石條百餘丈其他慈善事業難以枚舉年四十餘無子曾納一妾入門帶淚痕詰之知爲因貧鬻身以活其夫與子女者亟還之並資助焉晚年更置妾舉二男名繩武繩寬均能承其家壽七子孫繁昌



萬懷章字德齋衛東村人生性亢爽拯濟孤貧樂善不倦咸豐六年歲凶慨捐錢八百串在城東販施粥活人無算每屆年終散米貧民賴以度歲又施田稞二十四石充紫霞觀香火當髮捻之亂懷章倡辦民團捍衛鄉里遠近趨歸胥賴保全其他義舉筆難盡述長子世英另有傳少子世清中光緒壬寅併科解元

陳夢樓字望湖都司應元第四子性嚴毅見義勇爲咸同間荏苒滿地五里鎮當髮捻竄擾豫鄂皖之要道而陡溝土匪蕭文信承捻匪陳大清僞命糾衆南犯圩堡率多附逆本鎮居民逃匿南山經歲不敢歸流亡轉徙十室九空蓬蒿沒人骸骸枕籍夢樓目擊心傷糾集紳民倡議以爲非聚民不足以抗賊非築寨不足以固守詢謀僉同立即規地址廣勸募率族人慨捐地畝拆屋宇以濟磚石之不足申約賦工遠近爭赴工未半偵知四眼狗率匪數萬竄至乃嚴飭守備雜置木料門車棹案之屬於堵上伏人於內手刀矛礮石瓦礫以待賊至圍數匝見寂無聲息皆愕然曰此案有人勿輕視踰日聞追兵將至解圍去寨獲以完鄉人至今猶歌頌之光緒初以佐職需次湖北歷任鄖陽縣典史鶴峯州州判署公安鄖陽等縣正篆所至民安所去民懷年未週甲卽致仕歸

優游林下近二十年多爲地方造福鄰里以糾葛就質輒片言以息事應辦公益則提倡不遺餘力平時不與官府通請謁或以地方興革大事就詢則敷陳利害規畫詳盡務期利國利民蓋德意之被鄉里者深矣卒於民國三年壽七十有八

姚紹唐字子勤信陽城內舊族嗜讀書善屬文胎息於金黃陳管諸大家不利小試乃入太學觀光棘園屢膺房薦同治癸酉科主司賞其文擬中高榜旋以額滿見遺咸同間髮捻犯順大軍雲集知州招紹唐勸辦城防糧秣等事事平敘功以主簿候選加六品藍翎紹唐視之淡如惟以地方公益爲己任如修葺北門月城暨弔橋監修文廟書院以及董建忠節總坊整頓書院學租創設義倉籌辦粥廠等等公益類皆涓滴歸公務濟實事善不近名德不求福地方歌誦之紹唐天性篤厚事親孝待弟友而治家訓子則最嚴膝下五男三女十二孫其子與婿大半有聲庠序孫輩樸而質者服先疇秀而文者食舊德咸遵遺訓無敢踰越蓋致力於身教者晚年厭囂隱居山莊以栽花種竹爲暇娛以教讀課耕爲職業時而攜筇隴畔與老農共話桑麻時而開軒面圃與嘉賓歡聯詩酒讀史論文至老弗倦焉光緒甲申卒於山莊壽五十有九邑

廩生萬紹章銘其墓曰國之棟梁伏於草莽圭璋重器不遇大亨達人明德其後必昌繩繩緝緝積厚流光賢山弈弈灑水洋洋幽宮永奠山高水長

陳志善字性之住馮河村同治初年匪氛不息避亂無地獨捐巨資建築公義寨爲一方之保障鄉人賴以全活者萬計平素急公好義諸如此類享壽八十二

李炳文字虎臣住宣賢坊爲人任俠好義濟困扶危同治初申南驛路之十三里橋係三孔長五丈餘高二丈南鄉第一鉅橋也年久失修被水冲塌滯礙交通山水暴漲望洋興歎值兵燹之餘民生凋敝工大款鉅實難募集炳文慷慨貨產數十石獨力捐修鳩工庀材設寓督工揮金如土未半載復修青石平橋較前巍峨大工告竣不耗民財而行人稱便一勞永逸至今猶鞏固焉

劉師善字舉齋世居東郭五里墩弱冠入邑庠屢躋秋闈乃援例由附貢報捐候選訓導性倜儻豁達大度樂善好施老而彌篤每逢年關凡親鄰貧乏者分送錢米歲以爲常兩河口爲東南要道向無集市師善於三河交會處捐地數十畝開街道開市屢招商賈不數年而成巨鎮焉

該鎮瀆臨澗河春夏水漲望洋興歎師善施渡船一隻木橋一道名曰雙義橋利濟行人慮不能持久更捐田稞十四石永作歲修往來稱便至今猶利賴之嘗註太上感應篇全部復採古今諺語先正格言彙爲四卷名聊助一善錄梓行於世以勵世人遠近稱爲劉善人云其孝友尤屬特性胞叔連陞不善持家經分祖產百石因循典盡臨終家徒四壁師善代辦身後祭葬如儀叔遺四子無依悉收撫之飲食教誨不辭勞怨陸續將叔氏當出田產代爲贖回交諸弟自行經理鄉人稱之而師善無德色晚年倦勤家務移交子輩悉召佃戶暫欠債人等將欠無力償還者悉予勾銷豁免享壽八旬無疾而終訃音所至人盡悲傷咸謂善人已作古人矣

陳吉麟字筱雲荊州太守夢蘭姪也少業儒英敏過人咸豐辛酉髮匪卒至吉麟不問家室急奔先祠囊負神主以逃夢蘭聞而異之旋守荊州召之之任派管中關稅務辦公精細詳明夢蘭益奇之遂助資捐分廣東補用通判到省歷膺優差悉稱賢勞爲各憲所嘉許倪中丞鮑岑尤器重之擢署花縣正篆該縣爲髮匪起事之地俗素獷悍固巖邑也下車首捐囊金百五十兩交公正士紳籌辦冬防民賴以安口碑載道迨

光緒丁亥解組歸來頤養天年厲行善事凡貧難嫁娶者資助之幼失怙恃者教養之濟困扶危排難解紛胞姪某無恆產分潤之以田房金岡澗河慨施渡船以濟人其他放粥舍衣施義地掩客柩捐助宗祠補修橋梁種種義舉筆難緬述晚年連舉三男五女壽臻耄耋人咸以爲義行之報云

吳斗南字午峯吳家店人同治壬戌恩科舉人授密縣訓導子三心溥心錦皆名諸生心霽入武庠且究心實業以鹽商致富斗南教子成名優游林下不樂仕進專務公益凡信陽西北大小石梁獨力捐修者不下數十座時人以爲慈善大家云

李瓊林字瑤圃由廩貢捐授寶豐縣教諭課士有法文風丕變光緒丁丑晉豫大饑流亡載道勸助邑令籌振施粥救活饑民無算因母憂解職服闋不求仕進家居督課子弟庭訓綦嚴輕輒呵斥重施夏楚子弟皆奮勉先後入邑庠者八九人兩子領鄉薦四弟成進士一門科甲稱極盛者瓊林之教也性方嚴疾惡如仇土劣咸嚴憚斂跡不得施姦詐爲地方害所交皆端方知名士宏獎後進藻鑑多英俊大有北海開樽座客常滿之概歷任觀察州牧欽其練達凡政有興革悉咨之期補缺漏

晚年多辦地方公益如籌填倉穀修復西關城垣暨瀕河坡巖等義舉  
恆倚李兆祥唐香圃爲臂助故鄉里稱二李云

李兆祥字麟閣家貧力學及長入庠領同治丁卯科鄉薦任陳留教諭值  
捻匪攻城令尉皆遁去兆祥獨集士紳率鄉兵嬰城拒守匪竄去論功  
優敘俸滿選授衡水知縣政尙廉平聽訟發奸擄伏兩造輸服以繼母  
病棄官歸養優游林下邑有大興革地方官紳咸取決一言以定從違  
光緒中縣城西南隅傾數十丈款絀工鉅紳商公議加丁銀委兆祥與  
陳筱雲李瓣香陳正甫督修奔走炎風烈日中數月弗懈事集而民不  
擾又歷辦地方振務及倉儲凡經手出入款約數萬無絲毫染人尤重  
其廉德年七十七歲卒

龍化堂龍家岡人其先於清初由麻城遷信陽三傳至化堂祖在舟父正  
紀均享壽九十餘世業農有善行化堂質直好義負俠氣同治初捻匪  
初平鄉鄰胡永貴等數十人以嫌疑犯被捕將論死化堂據理申辨卒  
予保釋光緒三年地方旱荒化堂籌積穀設粥廠活人不可勝計自以  
平生未嘗學問引爲深恥極力教訓子孫學書學劍各因其材並勗以  
積德行善及致身報國潔己愛人之道光緒九年卒子二長應翔次應

蕭武庠生孫九人道修精岐黃敏修高等警察校畢業官至河南省警務處處長曾孫二十餘人多服務政界

杜文錦杜家販人性伉爽忘勢利重性分其弟文鳳家產廢盡文錦按年供給難飽谿壑仍需索不已文鳳沒爲之備衣衾棺槨俾得斂葬文鳳長子不能娶命之同居爲授室文鳳三子爲人牧牛患癱瘓症使人昇入醫院調治得愈又收養文鳳四子自孩提至成人另資以娶親安家費遺之至鄉鄰有急難事隨時拯濟乞丐老疾者則施與加厚遇大雪時則羹飯必就火取溫而後與之其親親仁民有如此者妻馮氏性淑慎勤儉持家相夫有禮文錦喜嗜酒醉輒怒罵不休夙鍾愛次孫應安馮氏時其盛怒卽命應安向之陪禮卽轉怒爲喜文錦享年七十七馮氏年八十

蕭宣蕭曹店人家貧不苟取與以賣豆腐爲業西村有富紳陳德善者臘盡策蹇偕一僕荷擔入市收債囊金五百餘過宣門置囊案上購豆腐納僕擔中令先歸已略憩索茶飲畢匆匆起去逮至家晚餐後檢行擔不見囊始大駭正張皇無計忽聞扣扉聲出視則蕭攜囊至原物存焉陳大喜亟取三十金酬之蕭變色曰吾若受此何如勿還君何不肖待

人之甚也拂袖徑去陳惶愧追之還而謝焉與訂交爲之游揚於邑宰以蕭曹牙行畀之不數年富甲一鄉其孫玉佩列薦紳稱望族焉

沈連鉞邑東北沈家灣人父廷璧慷慨好施治家有道生子四孫十四曾孫三十二皆恂恂能守禮法享年八十四母周氏年八十二連鉞居長性孝友佐父持家政俾諸弟得專心向學父母卒時連鉞年已六旬餘哀毀擗踊甚於孺子兄弟議析居連鉞於廬舍則選其舊者曰此吾素所慣居出入覺便也於田園則取其磽者曰此吾幼時所經理釣遊頗適也至於周卹親里則不遺餘力置產未嘗爭價糶糧未嘗親臨嘗有佃戶於分稞時盜糧僕人以告連鉞禁勿聲至今傳爲美談年五旬祇一子本泉患痞疾妻梁氏以宗祀爲憂勸置妾不允梁氏稟明翁姑爲強聘戴氏爲妾俟入門始以告後生一子本萬能克家連鉞享年八十二梁氏享年九十一戴氏享年九十四

何有玉公道鄉人大復後裔生具快氣樂善好施咸同間髮捻猖獗本鄉爲鄂豫土匪出沒之區居民轉徙失業有玉招集流亡各復其所給牛種施振貸全活人以數千計又練鄉勇建築天相便民春臺永寧等寨藉資保衛凡諸義舉無不慨然肩任以一身係地方安危者垂五十年



至今地方賴之

孫正權母子河西孫家寨人爲人平恕從未與人爭競有田四頃自耕而食兄弟四人和睦無間其教子弟耕讀各安其業婦女終歲勤織紡無詬誶聲七世同居一家丁口至百餘人鄉里皆稱善人

劉應章洋河人性好善光緒乙未大荒鄰境饑民鬻集洋河店各廟廊下臥滿時交嚴冬風雪大作應章每日施粥一次全活無算子學詩入武庠人皆以爲善報

尹兆彤字蘭洲洋河人性慷慨好義咸豐初髮捻猖獗邑東北盡爲匪窟兆彤與本鎮陳孫蔡諸紳協商創築寨垣地方資以保障光緒三年兩河大旱饑民流入邑境者無慮萬數千人兆彤助陳友芹開粥廠於洋河躬綜其事入沽實惠迄事無一人敢營私者年七十二沒子三季子樂孔尤孝友析居時以邢家台白鹿河兩處上產讓其兄而自取其瘠薄者地方稱之

尹樂庸字朗山洋河附生志淡泊敦氣節設帳鄉里善誘人賴之成就者頗多信陽協尹嘉賓延至署教其子後調南陽鎮約與同行樂庸不可人曰子不可以爲異日進身地乎樂庸曰非吾志也卒辭不往南汝光

道朱壽鏞聘以教其孫閱三寒暑每日授課畢危坐冥思成易經解義一節年七十二卒子三季守祠能世其學門人劉子榮爲作墓誌銘銘曰得氣之清得坤之貞不貴而壽不富而文出其緒餘沾丐後人高山仰止視此貞珉

陳貴麟字叔良夢蘭第三子幼聰敏過人博極羣書詩賦制藝冠絕羣倫年十九補博士弟子員次年食餼光緒癸酉應拔萃科宗師賞其文首場擢第一覆試預日聞父訃奔喪士論惜之自以文章憎命絕意進取多行陰隲性和易近人接戚里尤厚待以舉火者常數家歲終擇鄉里極貧者周錢米以度歲解衣推食視爲故常嘗有貨產於貴麟者交割已數年其人窘益甚貴麟謬曰汝尙有尾款奈何弗盡取乎另畀錢百餘緡其人資以活又有爲貴麟董買宅事浮冒開報者左右請詰之則曰彼爲饑寒所迫吾有餘何校爲一笑置之夙精岐黃延者雖午夜必往著手成春向不受謝族中卑幼病者常守視不去至瘳乃已晚年以歲貢就職訓導歷任長葛光山等縣教諭視之淡如也辛亥起義以避兵故卒於黃家院年六旬有九長子善楨附生嗜學能文下筆千言立就鄉試累薦不售年未四十卒

周志霖字霖溥邑北阜陽村人祖父源頤及其弟晃頤居家孝友敦任卹每歲終春間施衣振粟鄰里賴以生活者甚衆交口稱善人父郇南清附貢生講學力行存心濟世於阜陽店創開市場以便農民髮捻之亂倡修五紀屯寨垣保障一方工竣餘款儲爲東西兩義塾基金以興學明倫端品正俗訓後人志霖秉承遺教幼失恃善事繼母得其歡心以孝稱於鄉里咸同中姊丈夫作賢以禦匪陣亡助姊撫孤成立葉氏姑母孀貧嗣子臨野力不能養迎歸生事死葬更爲請旌立石以表其節嫡堂兄沒以兩子一女無怙恃託之均爲婚嫁如儀並佐之立家成業戚鄰無資營生者解囊助之無力送死者具棺葬之皆承父郇南志也光緒初父老矣志霖建東義塾於何家堂以慰其心父沒復建西義塾於蓮溪寺以竟其事今何家堂女校蓮溪寺初小校卽其遺址皆志霖堂構力也五紀屯街每藉迎神賽會魚肉鄉民志霖請縣示永禁演戲斂錢刻石以垂久遠又以時修橋廟建義渡恤老憐貧瘴惡彰善地方賴之子二綿瑞縣教育會長純瑞縣自治籌備員孫七人皆能自立甘家駒一名世昌字昂千廩生八甲村人疏財仗義好善樂施凡鄰里貧乏者施米助錢率以爲常捻匪之亂民無寧居家駒拓修盧家冲郭家

寨爲仁義寨以寨內無水復創修附寨捐貲鉅萬鄉人賴以保全同治甲戌捐修石堰河上下大石橋兩座又於四里橋街南大路施鋪石條里餘以利行人鄉黨義之

陳嘉麟字季猷翰林夢蘭第四子性孝友心慈善成豐末十二歲時夢蘭官刑曹隨侍京寓凡炊爨洗滌之役無不躬親夜與叔良三胞兄挑燈伴讀聲煥煥徹曉夢蘭顧而樂之同治初捻匪擾豫南合家避難羅邑嘉麟趨歸侍母摒擋薪米供菽水悉承母意母教棊嚴稍拂輒朴責長跪受杖移時嬉戲左右故作呱呱泣或爲彩衣舞以博母歡族里翕然稱之處伯仲無間言平素善柳書工詩文積學未售援例籤分江蘇通判以諸昆季方努力名場辭不赴專任家政鉅細處理公允尊卑秩序井然彬彬有義門風俾心孚繩武諸昆季無內顧憂專心進取卒登科第皆其力也平生樂善好施光緒四年淮南大饑流亡載道慨捐鉅款以工代賑招流民浚濠築隍並修瀕河渡口坡巖全活無算次年大水寨垣沖圮者數十丈獨力捐修財力告罄鬻產以竟全功見義勇爲諸如此類光緒壬午秋赴鄉收租不肯以一餐累個人一日而徧十餘家遂中熱病卒年僅及壯子三次善同三善棣長子善澧質直好義鄉鄰

有大疑難輒慷慨剖析無少避忌當時或有不能堪事後無不心折俯首就範地方公益慈善慨捐鉅貲如築新寨砌河坡修龍津橋善舉纍纍民國三年春狼匪自商城回竄信陽沿途裹脅良民官軍追剿之於東雙河俘十八人以爲匪也將置之法已押赴市曹矣善澧適在城聞之疾謁胡永奎團長力白其冤盡釋之善澧並資遣回籍及卒族里皆扼腕太息曰吾儕不復聞逆耳之言矣臨窆至有慟哭不能起者

黃玉清字寅階黃家院人生性倜儻不矜小節幼聰敏喜讀工書童試屢前列以身弱不任塲屋之苦而罷家本素豐而尙義好禮無驕倨氣平生好施濟雖千百金可一時而盡族里有困乏年終量予振卹平時呼助無不應者常年置備棉衣藥物棺具時其所需而濟之於街首東岡暨老鶴廟河上董家灣施義地三處以待死無葬所者佃鄰盧瑞隆王平義王權吳應榮鄭金中等積欠鉅額錢穀玉清並予注銷不責償戚家董姓者借欠數千緡逾期伺玉清外出將其本灣良田十二石署契作抵送交其家玉清歸聞之立馳赴董宅將契退還並當面銷燬借券歲時復資濟之令毋失業平生好客座上常滿而遇寒士尤極力扶助家中專館聘名師課子姪讀及戚族中之聰俊者成就頗多處地方力

主和平鄉里有爭輒以仲連自任爲調解往往糜酒食費金錢雖暴夫無不就範今其子孫蕃盛猶其遺澤云

陳庭模字政夫洋河店人性慷慨積學未售援例報捐中書科中書急公好義不樂仕進於地方慈善公益行之尤力同治初捐修信陽試院廣庇多士光緒季年捐設兩等小校培植青年耗金鉅萬無吝色又監修州牧衙署堂壁崢嶸修築西關城垣金湯鞏固經營累月無倦容他如北關外玉皇閣前石橋東關外小街北頭石橋馮河之大石橋以及二十里南北之石橋洋河上下之石橋與顧家店黃泥溝小洋河等處石橋先後傾圮庭模皆獨力捐修完善惠溥行旅至費金多寡弗計也曩曩鉅工嘖嘖人口咸稱慈善大家晚年積勞喪明聞有橋梁坍塌者猶必捐資遣人修復其樂善不倦有如斯者至饑施粥寒施衣猶屬餘緒焉公子三長乃訓甘肅會甯知縣次其訓四川琪縣知縣

陳晉基原名庭藹字鳳階洋河人舉人連川次子幼負大志卓犖不羣及冠入庠食廩饋嗜學五經熟澈胸中欽定書經傳說彙纂全部數十卷默誦不遺一字以命途乖舛九試鄉闈不售秉鐸鄉間成就獨多及門弟子入泮補廩者十一預優拔科者三列仕版者五教人先行後文故

出其門下者率恂恂矩矱不失爲端人正士平生刻意作人孜孜向善並著家法六則以教其家子弟嘗謂事當棘手時當平心靜氣以處之將利字圈套打開自然脫無所累以之應物則縝密周詳具一段怡然渙然之致雖兩情牴牾亦自冰釋一著血氣便成決裂矣其學純養粹可以概見子璐訓附生璋訓優貢琮訓拔貢著有唾餘集藏於家

鄒連奎字麗五城東五里戴家廟人少倜儻不喜讀書惟日與諸弟習騎射能得其祕訣嗣弟連第入武庠以傷力致殘廢連奎痛弟甚遂廢業性剛直有卓識每與鄉里排難解紛片言卽決無不心悅誠服咸同間洪楊之亂賊謀圍城數十里剽掠如洗鄉民紛紛逃難齧集城下城已閉不得入擁擠踏斃者不堪言狀多日圍不解連奎在城中襄贊防務進言於邑宰曰城堅守有備賊知難犯所以久圍不去其計不在破城欲擄附郭之人以厚其勢耳曷若開城納難民使人無可掠賊必立解而去宰用其說難民盡入城賊宵遁未幾僧格林沁率師過境南下連奎被推爲地方籌支應徵發不擾論功獎敘辭不就退爲農夫終其身年六十五卒

祝如楷字煥亭邢家臺祝家灣人生而英武精騎射有百步穿楊之技以

扛重過額折臂遂輟武試仍設館教騎射從學者歲常二十餘人光緒間送武考十餘次每次獲雋常三四人子玉樓入武庠生平慷慨多施見義勇爲築附近橋梁多處並修本族祠堂所建天良寨工程完善地方至今資以爲保障年七十五卒子一孫男五均能世其家

李汝礪字禹門先世居明港李家樓至汝礪家中落遷居城內幼從喻仲翁學家貧甚勢難卒業喻知之免其束脩及冠入邑庠仍以筆耕資日用科舉既停改業陶猗術昕夕經營晚年累貲鉅萬由是廣行善事寒施衣饑施饈米死者施醫藥棺木凡義所當爲無不踴躍從事地方公推爲慈善會會長振務委員會主任廳事充紅十字分會會所不取儼金樂善好施至老彌篤壽七十五卒子孫繩振方興未艾

郭之翰字西園監生世居青石橋爲人忠厚和平宅心正大在申城以南紳耆中負重望焉光緒三年河南荒饑民遍野其來自他鄉者旣嗷嗷待哺而境內饑民尤衆每擁集州署大堂途爲之塞州牧張公嗣祺任之翰襄辦振務盡心贊佐席不暇煖施錢施粥各協其宜遇饑民老弱待斃者親加調護懇懇勤勤以此全活甚衆性慷慨見義勇爲生平樂善好施排紛解難有王彥方之風遠近悅服其家居尤篤友于之誼自



擔家務而供諸弟讀書勞勞者垂數十年有弟三仲之全叔之琦均有傳見政事季之馨字古香湖北候補縣丞凡諸弟蜚聲騰達克展厥才皆之翰培植之力居多戚里至今稱之子三傳先傳賢傳箴能世其家卒年六十三歲

陳體仁和孝營人性慈善好施與冬輒施棉衣臘盡春初煑粥以食餓者捐修和孝營北首石橋一座明家莊磚橋一座

今已改

喬家廟沖石橋

一座雙溝南首石橋一座均立有碑乾隆中南汝光道曹繩柱贈樂善好施匾額

劉煦峯字玉山城內增貢生性雅靜尤好作功德事咸同間髮捻擾亂圖窺信陽煦峯襄辦團練防衛城池事平敘功保獎直隸州州判劉銘傳中丞邀至幕府幫辦文案晉保通判因親老不願遠離改訓導加國子監典籍銜平生博覽羣書能文工詩著有青照樓詩集遭兵燹散失子少山能世其家

齊登泗龍井人光緒初附生爲人直爽率真逢鄉里糾紛輒以片言解之地方官有就詢之事常以野服入見時稱曰道德先生其子昆鍾於書無所不讀不獲一衿年四十焚其著作喟然曰吾將見八股文章之無

用也已果如其言

蕭玉佩字韞齋衛北村蕭曹店人性篤實負俠氣蕭曹地當北鄙時承捻匪肅清之後俗尙武力喜爭健鬪以玉佩爲鄉望所屬遇事成就取決玉佩濟以和平接以信義鄉鄰有爭端是是非非各持情理之平無所左右其不能以理遣情恕者則委曲調劑至再至三或合兩造相見以杯盤或邀多人周旋以玉帛務令化悍鷲爲馴柔鮮隙毋致崩裂而後已以是鄉里大和遠近聞而歸之其後玉佩卒繼娶陳氏青年守志詳人物門列女

陳庭蘭字少渠洋河店人父鑑林廩生雅負文名庭蘭孝友端方與兩弟庭蔚庭萱同居相規以正式好無尤與人交道義外無雜言喜讀書爲文卓有見地孤行其是不就尋常繩墨卒以此見擯有司生平落落寡合終日杜門不出究心經史而喜誘掖後進於寒素尤所矜卹壽八十餘子正訓方訓皆附生爲時推重

薛學敏字敬卿城內人性誠樸幼好讀書有大志篤於內行邑宿儒梁幹園極器之因童試不利遵例報捐巡檢指分湖北旋丁外艱爲繼承舊業計不得已棄官就賈非所志也舊日師友當時名宿朝夕過從文酒

之會月必數次以故門前常多長者車轍而善交久敬遠近豪俊亦益歸之專館延師嚴教子孫垂二十年親族中子弟俊秀者悉令附讀成就極多視姪輩猶子或爲士或爲工商各因其材之所近早爲之計伯兄望卿服官安徽病故任所本籍產業典質殆盡學敏代營葬事收卹遺孤爲之授室並設法補助復其固有季弟克卿夙患精神病不能治生學敏代經理田宅二十餘年並以便宜爲之易置溢於其舊生平仗義疏財廣行陰隲親友中貧困者年節酌送錢米其貧不能葬及無力嫁娶者輒隨時扶助各副所望至地方公益慈善大之如築路修橋小之如施茶施衣施藥等行之數十年未嘗倦厭亦不自以爲功其子孫至今率由奉爲家法焉學敏一生勤儉耐勞早起晏眠不染城市習而見事尤有遠識信陽舊戶向以經商爲逐末薄之而弗爲光緒初市面營業純係外籍獨學敏與邑人吳言泉志同道合提倡商戰常謂此後寰海大通華人非兼習工商不能立足逢人解說久之風氣漸開從者日多至清季本籍商人居然特樹一幟皆學敏爲之先導也子二長繼逢附生宣統紀元舉孝廉方正次承謨任邑商會會長

吳長惠字仁齋爲人忠厚仗義疏財辦樂善局借字捨藥施棺施衣並捐

款興學家產因之廢棄過半其子執權亦無怨言享年八十卒

郭家興字詩舫青石橋人好善樂施於光緒庚子在青石橋街南頭捐修大橋一道往來稱便鄉人感之勒碑頌德焉

萬世英字西園懷章長子解元世清之胞兄也性慈善尙氣節光緒季年國築京漢鐵路至境附路居民不堪其累世英仗義首向鐵路當局請示條規各相遵守京漢沿線得以不擾鐵路經過多掘墳墓無主者白骨暴露世英憫而施義地以瘞之並創設孤魂會與友人劉範九同捐鉅資存放生息永作春秋薦祀之底款中年精研岐黃濟世活人對於貧乏者加意診治不取藥資又置田稞十石收租盡數充作施棺施藥之用仁風廣被沒存均沾鄉人德之於宣統時爲建德教碑於東五里墩以誌紀念云

郭之炎字靜函五里店人光緒丁酉科拔貢朝考二等性謹厚和易家貧力學常徹夜誦讀不眠與人交久而能敬受人委託必忠於其事未嘗有人已之見朋友有困乏輒與通有無未嘗取償佐毅軍幕府十餘年機要文書悉出其手宋宮保慶深倚重之庚子之亂從馬宮保玉昆駐防天津規畫悉合機宜歷獎知縣分省補用加直隸州知州銜入民國

任封邱縣知事年未五十卒

余碩輔字弼丞六區人聰明特達少年卽負清望十六歲入庠十九歲食餼科歲兩考試輒冠軍秋闈房薦十餘次備中數次卒不售爲人平易不立崖岸人樂就之設帳里中遠近爭赴對及門未嘗有疾言厲色善氣所熏陶羣焉習與之化論者以比郭林宗黃叔度光緒末以恩貢就職直州判分發廣西監城門稅務及大融江卡務數年告歸著有遊桂詩草民國三年宋匪至其鄉被擄其長子伯勤往代匪義而釋之年七十四歲卒

陳恕修字乙垣友蘭子幼有文名弱冠入郡庠旋食廩餼平生喜培植人材與同志結淮陽文社入社者多通顯續修陳氏族譜建三星堂宗祠附設初小學校籌基金置學田族人賴之光緒末贊助友人立車雲山存古小學聘孝廉馬楓丞主講成就後進甚多又創辦車雲宏濟茶社首以祠產校產入股爲提倡邑西茶山日新月異皆其力也夙精岐黃堪輿諸藝地方養生送死爭借助焉民國初籌備續修縣志以款絀中輟賣志歿年六十一歲

陳式憲字雲波五里村人性疏放具俠氣不問家人生產夙好客座上常

滿吹竽彈鋏無不兼收室中終日備嘉肴設果茗聽客自來去飲啜不計誰何家本素豐以是中落精針灸術著手卽愈有叩門延請者雖午夜必往而於貧民尤加意體卹不斯須緩並助以藥資及贍養費事後並不索酬蓋亦仗義疏財好行其德者

王品蘭字端峯世居五里村父錫命事親孝有俠行咸同間以武庠禦匪於福山寨名大震富豪李某豔乞丐陳姚氏色強納爲妾氏弗從錫命力阻李而縱氏使去鄉里多其義品蘭九歲失怙母張氏茹苦守節教之成人及長入泮食廩餼科舉制廢畢業開封師範校歷充城鄉各學校管教職員成績斐然民國初任縣勸學所所長以學款支絀先自減薪減費爲各校倡梳剔積弊實行預算不三年款大裕更添設師範講習所及圖書館以廣師資淪民智一時學風大盛迨卸職增置學田兩區並餘款一萬有奇以乙丑年卒

陳嗣華字桐邨五里店人家赤貧苦讀能文童試屢冠軍以罪誤爲主司所黜憤而投筆入毅軍幕府十餘年民國初任朝陽鎮守使署祕書殷軍門貴亟倚重之後以改調軍需處處長非所好謝去殷挽之力卒不肯留平生重氣節嚴操守傲骨嶙峋不爲勢利屈非其義一毫不取民

國八年任河南吏治調查所調查員委赴南陽屬考察吏治內鄉縣知事某猾吏也聲名狼籍聞其至懼甚密派人囊金三百迎之境上嗣華大怒以聞於上峯而某以有奧援僅得申飭而已嗣華遂拂袖歸家徒四壁日嘗不舉火族人贈與不以其道不受也晚年依教讀爲生勸善規過懇懇懇雖頑梗子弟無不感之貧家孩童受業者輒不取束脩年六十一病卒卒之前一日猶與生徒講究文藝督催功課里人皆太息曰吾鄉失一善人矣著有詩文集若干卷藏於家

樊尙中字正甫五里店人附貢生候選訓導善書里中匾額多出其手性和潔治家有道尤好善行常購善書千數百部送人並備棺木以濟貧不能斂者里人至今稱之撰有十字迴文詩傳誦於時子丙吉孫松松皆邑名諸生

甘以敬字周原城南孫家冲附生性質樸疏財尙義兄弟六人以敬少出繼二叔父爲嗣析居時自以所得加於諸兄弟五倍於義不可請剖作六股均分彼此互讓再三其母析產爲七命以敬取其二不得已揀其田之最薄者居宅不與焉生平新知極富銳意提倡實業無識者頗迂之光緒辛丑開銀礦於柳林黃家灣以距京漢路綫過境爲所阻又集

鉅貲試采盧家沖煤礦邢家岡鐵礦皆以經理非人資盡中輟旋又募股種桑白鵝灣種茶甘家沖及震雷山其茶社名曰元貞奔走數年成效大著至今信陽本山茶產額歲增皆以敬倡之然其家亦自此中落矣晚年因所如不合疾世憤俗精神爲之失常年五十鬱鬱卒

劉文光字煥堉劉家灣人性孝友家貧嗜讀終日手不釋卷睡夢中嘗作呬唔然數奇試輒不利兄弟以其讀而不治生也迂之求析產自是遂倚教讀爲生活夫以筆耕妻以針耨有所得輒以奉親而自養則雖終日不舉火書聲自窮廬出淵淵然未嘗輟也一日妻告無米文光讀自若妻嗤之曰諸兄弟躬耕自食家有餘糧而吾家徒壁立乃日夜埋頭鑽故紙賒賒不休奈此噉噉數口何文光不之應讀如故晚年遷居灝河東蕭家園故互鄉也文光處之坦然各接以誠里人化之性善吟逢人卽索句積成卷帙年七十二卒

關芾林字慕棠城東關家灣人家素豐世多善人至芾林更慷慨好施與地方義舉知無不爲戚里有困難求無弗應鼠雀之爭輒出爲排解靡金錢耗酒食亦有不卹有其表兄張某與彭性命案業經官驗兩造俱願罷訟而因貧不能決芾林爲出數百金了之充本村紳董地方清



靜無一訟案居民至今稱之

許貴文字子昌城內人邑廩生爲人倜儻不羣分發安徽候補巡檢補霍邱縣分司三年有循聲旋辭職歸閉門不出與戚友飲酒賦詩以娛暮年著有伴桐軒詩集入民國及門林縣翰林張家駿述其生平事迹呈請大總統褒揚頒贈匾額壽七十卒其弟貴武任三關新安店邢家集等把總又署理城守營亦有能名人稱之曰難兄難弟乃文乃武

劉華鈺字嵩峯晚號愛菊老人縣南衛南村人性醇直幼嗜讀凡經史文辭及醫藥農政諸書靡所不讀有第三人皆繼母出華鈺親愛逾恆而督責如嚴師父命從之學諸弟亦恪然執弟子禮焉方授室之初父命與仲弟玉珍析產將取所有而兩分之華鈺以父在子不得有私財且堂上方在盛年繩蟹未有艾執不可父重奪其志予以田少許令自謀華鈺遂挈眷入城僑居且耕且讀嗣叔季兩弟相繼生父臥病累年家中落乃歸昔所受田給兩弟耕作時以束脩所入供甘旨視生產而贏焉其爲教原本經史與古文辭而稗官小說有害身心者生徒概不接於耳目一經指授皆循循有規矩子四人恪守庭訓傳爲家法景健祖章赴漢皋習工業祖賢入武昌陸軍校相繼卒業景向以優貢朝考分

發陝西皆有聲於時華鈺晚年以蒔菊自娛羅致異種手自培植冬夏不輟花時招客觴詠樂而忘倦輯有菑園賞菊錄行世其城居時夜嘗置燈隘巷躬自注膏然火行者或攜去則復置之值大風雨則令諸子數數往視恐火滅後於東雙河市上創立小學校暨閱報所地方風氣爲之一變年八十猶健步不杖日行三四十里民國十三年三月卒易簀時偶張目猶問中原亂局何人收拾其關心天下之重如此

姚壽朋字少琴家城內五舉牌樓邑廩生性至孝事母維謹性耿介平生讀書刻苦自勵精研醫理極有心得遇疑難症應手輒愈堂兄壽宏字少裁邑增生讀書過目不忘嗜詩工畫時以爲二難云

許其祥一名庭瑞字定周家游河鎮性至孝幼失怙恃賴繼母撫養成人事繼母視膳問寢終身不懈母有疾侍湯藥至廢寢食偶或盛怒一聞母喚卽爲霽顏體素羸瘠盛暑未嘗袒裸恐母見而滋戚也年屆六旬時母沒擗踊盡哀三年如一每當春秋祭掃猶爲涕零初家貧以貨殖起家輕財重義光緒戊寅戊申兩年荒歉穀價昂其祥出穀平糶極貧者散米以振之活人無算並置義倉施義地建橋梁卹孤寡戚里貧不能娶者贈以婚費或遺婢以配之不取值鄰有孫姓者家貧不能自活

兼被債迫將自盡且謀鬻妻其祥代爲償債助資經商以解其厄各種善舉嘖嘖人口晚年精神矍鑠夫婦齊眉膝下四子十三孫曾孫八玄孫二五世同堂號稱大家宣統元年內務部頒給熙朝人端匾額民國十一年卒享壽九十有六歲

雷鳴字曉亭大廟畝人生性剛直樂善好施與親族有不能婚嫁者資助之鄰佃誠實可靠貧無室者屬媒爲之擇配並助以財禮不取償女家赤貧墾故則給田稞拾石爲養送費以成其節且畀嗣子以種田資本髮捻之亂鄰農十餘家被擄鳴代爲耕種並維持各家生活郭劉氏有幼子患痘症其家主亦被擄鳴延醫診視調理月餘得不死客籍逃難至村者量給衣食病者施以醫藥去者贈以川資至其佐理地方公務修寨堡清戶口儲糧食依寨而居者多利賴之平生雅重儒道晚年館名師於家教其子若孫年節脩敬禮貌肫摯鳴聞震耳書聲燃鬚大笑以爲樂享壽八十四歲卒後二十餘年其鄉老農明士權年八十九矣亦當時受恩者追述鳴往事猶感激泣下云光緒二十九年廩生曹泰占等呈請褒獎奉旨旌爲義民並獎給德壽耆民匾額子德潤孫國璋邑廩生能光其家

雷德潤字兩琴鳴次子幼讀書能文以親老廢學治家嚴明三姑六婆不敢入其門教子以繼述爲孝平生救災恤鄰好善樂施有父風光緒間管理積穀因雨水霉爛填補之無報銷每遇年荒平糶不較錢色貧者賒欠不取償年終施給貧戶米糧其病無藥死無棺葬無地與男女及時不能嫁娶者並資濟之其子赴友難代訴獄冤人皆危而止之德潤獨力促其行冤卒以白其家教大概如是以性情耿介不合時宜足不履城市栽花蒔竹看書閱報以終其身享年六十五

馮明晰字泮林家馮羅店嘉慶時附生居心篤實以文章氣節鳴於時教讀二十餘年每年薪金概移作修橋補路之費臨終時猶將家存餘款二十串交熊宜亭代入善捐年七十三

潘大羸字可登大廟畝人性慷慨好施尙俠義髮捻之亂以練團修寨保障地方獲獎鄉人稱爲盛德先生

夏澤雲字子青家西雙河附生文思長子性質樸以課讀糊口淡泊自安終其身方病危子足跛侍側突匪來綁其子焚其屋子哀求匪釋縛負澤雲甫出門屋塌匪一笑釋之去是時匪方肆虐老弱者以石擊其首不死則付之一炬少壯無一倖免而澤雲父子獨得脫險非人力也以

民國二十年卒長女適雷仕恩七旬而仕恩故以節自矢媳刻苦操作能佐病夫治家頗著賢聲皆澤雲家教也

馮獻之一名祖述字清邵家馮羅店邑附生大京之裔孫也幼時庭訓甚嚴酷暑盛寒未嘗輟讀及長博通羣籍兵刑錢穀無所不諳尤好孫子兵書嘗慕大京之爲人慨然有上馬殺賊下馬草露布之志國體變更入京畢業陸軍師範充陸軍部文官給金質獎章所得薪金隨手輒盡專以濟助老無養膳幼無學費旅櫬不能歸者曾捐貲爲友人代訴不白之冤完聚一家骨肉終以不合時宜憂憤成疾假歸著有鴻爪誌言  
民國十二年卒壽六十一

易蔚文字霞軒邑西易家塆人父長庚樂善好施每晨必朗誦文昌帝君陰騭文百徧喜讀書自以一生假蹇爲憾嚴督諸子讀蔚文承父訓礪志劬學卒以體羸多病不得仕進而寄情詩酒著有霞軒詩集待梓性孝友兄弟分爨田宅遺產惟所置之不以措意與各房輪班奉母其迎來也輒先期而途往則後期臨去時依依牽裾若孺子焉胞兄沒哭之以詩哀溢言表詩見信陽詩抄三弟沒家中落蔚文撫其子飲食教誨逾於所生平生處世謹厚里不肖子以其文弱動加陵侮概置不校及彼有禍

患仍竭力代爲排解時論多之晚年家道日衰債負纍纍人勸以加佃禮資彌縫蔚文以恐傷農財謝之又嘗有舊佃因貧請解佃約詢得其故貸以牛種令免流離鄰里有不能舉火者通有無以拯濟之鄉人誦德焉年四十九卒妻邱氏有賢聲子樹滋邑附生文廟奉祀官

黃在仁字靜山黃家園人性至孝父永清患瘋癱多年臥床在仁躬親服事無間寒暑族黨稱之母呂氏孀居守志保有薄產在仁勤苦治生置田三百石勵行善事見貧苦親鄰輒解囊相助零星糶米止取半價捐款建顧家店石橋二座王店石橋一座夏季河漲沒橋輒繫索橋柱兩端免徒涉者蹈險道路泥潦必延工修補鄉人羣以善人呼之一生片紙隻字未嘗入公門年六十四卒子五訓煒畢業黃浦軍校九區區長訓德畢業河南省立高中訓顯畢業河南省立甲農訓猷畢業縣小唐國鼎字禹臣城內人性仁慈好施與咸豐六年歲大饑道殣相望國鼎與邑紳稟承知州設粥廠於城隍廟潔已奉公朝出夕歸未糜公家一粒粟人沾實惠全活無算是冬流民踣棲城廂凍僵者相望國鼎將已田產典數十畝製棉衣昏暮遣人施送迨日久事彰來者日衆款不能繼乃多製編草衣藉作禦寒之具至春暖乃已同治初與邑人籌辦積

穀借紫霞觀慈氏寺兩後殿爲倉廩議由上中之戶按畝攤捐陸續積穀四百餘石又捐施五里墩劈破山澗河來往木橋一道光緒三年饑復設粥廠辦理一如咸豐時邑人至今稱爲善人享壽八十一歲其子德馨孫蔭培均有善行相繼爲倉正光緒二十四年歲饑德馨呈縣開倉平糶將款發商生息逾年買新穀填倉增多一百六十石民國三年大旱米價奇漲蔭培以積穀變價籌運湘米平市價越一年又增填倉穀二百四十餘石十四年陝軍困城之役蔭培開倉振濟糶穀八百餘石城內子遺賴以生活祖培廩生械培附貢廣東合浦縣縣丞代理縣事曾孫英陸軍第十一路軍軍務處長

劉祖章原名雲會字極甫愛菊老人劉嵩峯季子也賦性直拙忌肉食則腹痛遂茹素以長年十六輟讀隨父設藥肆於東雙河旣而遊學漢口畢業工藝學堂民國元年冬東雙河始置車站祖章承信陽郵局委托創設郵寄代辦所仍佐父理藥業凡興學校及天足會閱報所諸役父兄有所指使皆奔走恐後風晨雨夕不謂疲與鄉人處坦率無城府遇非禮輒面斥之人知其翹無怨也民國八年入巡警教練所畢業後仍家居執業如恆次年夏直皖戰役潰兵四出掠財祖章被執市人代

白其貧得免丁卯夏革命軍北上有以黨爭被戕者軍士大索鄉人相仇殺得祖章旋詢知爲郵工而縱之自是盡瘁郵務益力二十三年九月財政部議廢印花稅局以郵局代售稅票東雙河郵局亦奉令如例兼辦十一月十四日赤匪猝至縛市民五人以去祖章與焉以爲稅吏也凌逼百端祖章無一語自解竟遇害時年四十有八

以上善良

明陳某

名失其

官指揮正德六年從河南馬都指揮追寇劉六齊彥明等至

武勝關兵敗死之

按陳名鎮以鎮亡後其繼室袁氏以節著

明郭九江郭家畝人

今四義鄉

體質魁梧慷慨好義明末盜起近村王五煽

亂擾地方九江邀集兄弟九榮九有九明九功等廣儲錢穀以濟民艱糾合村衆擇萬善山險要處所命長子鼎三子雋督工築郭家寨以處難民王五勾結闖賊率賊衆圍攻日久不解鼎雋皆有膽力率衆出擊奪回被捕人畜財帛無算第寨內無水至飲牛馬溺人心皇皇危在旦夕九江命雋率衆啓寨門取水五見而逐之雋令取水者先歸而獨自斷後與五且戰且走卒以寡不敵衆行至杏兒凹被五刺傷前胸死五攻寨益急自燃大礮轟擊忽礮反坐王五殲焉賊衆潰散地方獲安當



時皆謂大礮反坐時見關公顯聖遂於寨內立關峯寺祀之立碑寺內九江裔孫六宰撰文後人並改杏兒凹爲血人凹碑記其事

明張應宿信陽人進士崇禎十四年張獻忠陷城死之

清林茂乾隆季年人住古城富而好施興利除弊果敢有爲清初信陽舊有民間納捐米以養軍人之陋規經部議奏准免除而官吏舞弊仍令民間輸納茂上訴叩關獲免爲民除害人慶更生至今鄉里猶津津樂道焉

李自培字蘭皋邢集人道光甲辰恩科舉人咸豐間土匪四起自培團練鄉勇躬率士卒與匪首趙鑽子李林子戰於邢集王岡等處以寡禦衆出奇制勝鄉里恆利賴之擒匪肅清議敘授江西會昌縣知縣官聲懿美民間以二老包稱之卒於任

陳開業字渭川陳家寨人父鍾秀武庠生性好善咸豐六年歲饑施粥施衣全活無算鄉人德之爲立善人碑於蒿林山之大路旁開業慷慨有大志以貲郎供職工部咸豐中地方大亂請假回籍辦鄉團嘗與游河陳應典古城馬抱三母子河杜中選拒捻戰於邢家集北查山王岡等處又要擊之於淮河之大埠口殺賊無算河水爲赤捻匪不敢輕言渡

淮時信陽軍務浩繁地丁收錢加至三串三百開業與殷長庚呈控於僧王得減至兩串六百五十文地方賴之

殷長庚平昌關河南人賦性豪爽有烈士風清同治初元親王僧格林沁督師剿賊將過申王所至勤恤民隱事有不便於民者苟上達得以便宜剔除信陽納糧向按銀市價完錢是時地方官藉口亂事遞加至每兩三千三百三十文超過市價二倍餘民困輸將聞王且至士紳公議據情陳懇顧以王護衛嚴稍有舛誤禍且立至皆趨起莫敢先發長庚奮然曰老夫六十人耳苟有濟雖死何害衆喜具呈文付之長庚挾呈啟行轅衛士十數森列以刀擬其頂叱問何爲長庚匍匐呼冤衛士縛而致諸王嚴辭詰問長庚具訴爲邑民請命事撻其身得呈上之王王閱至再色頓霽命釋縛詳訊之長庚瀝陳加賦過重地方疾苦狀情辭懇至王首肯立飭州革去浮加自是每銀一兩定爲納錢二千六百五十文初王令照銀市價納錢每兩收錢二千六百五十文民困以蘇事後長庚口不言功有詢及者則曰衆人之福王之明也吾何力之有焉至今地方人以爲美談

郭桂林字顏山青石橋人邑附生質直好義鄉里有爭設法排解錢財細

故輒代爲彌補事後概不索酬地方訟獄爲之減少咸同中髮捻猖獗人民一夕數驚地距郭家寨駱駝嶺寨山路寫遠老弱奔避不易且山寨皆草舍不足以蔽雨雪乃詢謀於衆創建青石橋寨自咸豐末經始至同治四年乙丑告竣費款五萬除捐募不足十二外餘全由郭氏族人按三成照攤桂林獨認三成之一役既竟桂林鬚髮皆白家以中落鄉鄰交口感頌桂林不自以爲功也其秋附近翟家灣勾結陡溝捻匪將於某日發難桂林夤夜入城報告知州馬傳和派隊緝捕匪黨七十餘人桂林復言於州釋遣脅從僅辦首事一人事後鄉民至集道歎桂林一一慰之其他善行甚多不勝枚舉年八十四無疾而卒孫曾林立次孫之全以舉人官樞垣誥贈二品封典

李添甲字乾熙洋河人監生祖淩雲父祖培皆附生爲人正直不阿有勇氣咸豐四年剿捻匪陣亡名登城內白馬橋忠節總坊

高陞比部郎陳開業之僕開業家平昌關南十里清咸豐間捻匪猖獗開業築堡練勇自衛時信陽村鎮多附賊而賊踞邢集爲巢四出侵擾開業倡議聯平昌關古城鄉勇往剿之陞諫曰越境以圖遠古知其難今賊未犯我我奚爲越境犯賊且鄉勇名曰團練實烏合耳往必不支開

業弗聽率衆遇賊於古城北界河之北原賊悍甚甫交綏衆潰鳥獸散  
陸提刀隨開業馬後見事急奮力翼之突圍南馳遇絕澗馬不肯越而  
追者已迫陸急引開業馬退後十餘步力鞭之馬負痛一躍而過追者  
已臨澗陸見開業去猶未遠恐賊越澗急追獨力鬪賊被禽支解死  
彭元善監生赤土村人性剛直其弟倫亦監生成豐初倫爲鄉團團總元  
善助倫剿匪陣亡名登城內白馬橋忠節總坊

馬抱三字安亭古城寨首也成豐時苗匪爲亂蔓延豫南信陽邢集查山  
長臺關楊家廟等處莠民蠱起應之抱三年方弱冠有義氣捐田數百  
畝創修古城寨工程未半匪衆環攻抱三防禦得力卒賴保全寨成糾  
集鄉團保障一方南汝光道蒯賀蓀嘉其功保獎同知銜鄉里感其德  
公送申北砥柱匾額以頌之子明德亦有賢聲

劉士賢住古城秉性端方有勇有謀成豐季年古城築寨未就捻匪乘機  
圍攻城中老幼駭啼不止士賢內鎖人心外禦強寇相持月餘賊無隙  
可乘又以非背城一戰此圍莫解挺槍率衆出城奮勇衝突斃匪數十  
賊膽寒始退去人民悉賴安全寨首馬抱三呈請南汝光道蒯詳准給  
獎遊擊銜其殺賊解圍至今猶膾炙人口也

吳克謙字叔村北尖山人弱冠與弟克彥同案入泮學品經濟均爲一時所推重咸豐間髮捻猖獗乃於天目山東鄆小山倡築石寨北與魯堂寨相犄角復捐資籌餉練勇單騎馳赴荆襄道歐陽營乞來馬步數隊協攻匪巢將有撲滅之勢適髮匪犯隨恐失屬地乘夜班師匪雖未滅匪膽已喪未幾遁竄匪去民安實克謙乞師之力也

高文田北尖山人性剛直果敢有爲咸豐間土匪蜂起獨備薪餉募勇數十名與南陽董營長金山會剿撲滅咸豐十年髮捻盤踞申北蹂躪不堪文田於天目山陳平寨修復完善練團勇置軍械防禦有方來歸避難者三千餘戶與地方士紳方治霖高文傑等協力戰守保障一方每遇凝雪堅冰巡查益力辛勤三年之久全活無算

陳繼韶字琴舫平昌關人附貢生成豐辛酉倡修平昌關土寨週約四里籌辦民團保障鄉里迭次剿匪出力累功保舉知縣未及出仕而卒士論惜之繼韶性風雅蒔花種竹有別墅曰綰春園著有聽竹軒詩草待梓

杜中選母子河人咸豐季年捻匪盤踞申北勢極猖獗捐資倡築母子河雙河寨周四里與陳家寨相犄角練勇防剿西北賴以保全同治元年

髮匪陷三里店副將尹嘉賓赴援被圍賴中選奮勇解圍獲免事聞僧王保獎府經歷六品藍翎年五十卒於家

胡恢淙廩生居平昌關急公好義樂善不倦咸同年間髮捻迭亂鄉民多避難於平昌關人衆舊寨莫容恢淙捐資另築套寨數百丈救濟生靈頗多至今鄉人猶頌功德焉

張廷策字義山舉人廷憲之胞弟也性機警善說辭積學未售改業魚鹽設棧於三里店咸豐十一年髮匪卒至陷三里店損失頗鉅廷策被執拘見匪首從容辨論諷以利害匪首爲之動容優遇之尋釋歸匪去廷策糾合鹽商攤款創修三里店石寨磚堞周里許高二丈作申城之屏障爲鹽商之保障商與民均利賴之是時捻匪蔓延申境民變附逆幾無淨土鄂督派李續燾統兵六營會同知州馬傳和督民團兜剿終未撲滅廷策以民變爲匪多係脅從言於傳和請易剿爲撫傳和稟准南汝光道蒯賀蓀派廷策詣龍井說匪首蕭文信就撫廷策開誠佈公曲陳利害許寬既往予以自新往返定議脅從同時反正皖匪遠颺農商復業人慶更生論功保獎候選通判未及出仕卒於家

李利庚字晴峯城內富室也援例報捐戶部郎中性慷慨負俠義咸同匪

亂兵差絡繹支應無着官府擬議呈准於地丁項下每兩附加兵差攤派錢四百文聲明兵差停止卽行豁免久之視爲陋規以飽貪囊延不肯免利庚憤之層控府道司院悉左袒無效利庚益憤親詣京師上訴都察院久乃得直悉數免除閭邑受福初累控層憲奔走省京費數年心血百折不回耗鉅萬資財毫無吝色當仁不讓義無返顧其斯之謂歟

陳應典字徵五游河店寨首也咸同間匪陷游河店燒殺極慘應典感斯痛糾集族鄰練團築寨以衛鄉民繼而擒匪盤踞東北各鎮擬大舉踰淮西犯應典值知聯合陳開業杜中選諸團總伏團勇於大埠口俟匪半渡應典猛勇當先殺賊無算河水爲赤由此擒匪聞風喪膽不復渡淮西擾矣游河以南賴以安全皆其力也

夏士英北王岡人咸豐二年土匪猖獗士英舉辦團練鄉間賴以平安後與桿匪沈三玉戰於邢集西李家大塘奮勇直前陷於包圍與姪國祥國祿同時戰沒

郭守煦字春臯出山店人咸豐四年擒匪蜂起奉南汝光道余炳燾諭團練鄉勇緝匪甚力賞給八品功牌七年帶勇赴柳林攻退擒匪南汝光

道邊浴禮賞給六品軍功咸豐十一年匪破出山店寨拒戰死之

子紀節烈

潘焯出山店人家素封捻匪之亂焯慨捐鉅資創辦團練防堵屢著戰績西南賴以安全匪銜恨之伺隙於咸豐十一年冬月十二日襲破出山店寨焯督勇巷戰被執罵賊不屈死之

蔡錫洪字範齋從九品疏財仗義勇敢有爲咸豐時捻匪蔓延民不聊生錫洪慨捐重資創修虎山寨糾集族鄰團練鄉勇保衛一方至同治二年九月十三日賊卒至錫洪率團勇出寨迎擊奮不顧身戰一晝夜卒以衆寡不敵被執脅之降不屈遂遇害棄尸塘中逾八日尸浮出面色如生鄉人哀之事聞獎雲騎尉世職

事見蔡氏宗譜

游鈿西雙河人孝廉游鐘胞兄廩膳生髮匪之亂倡修天心寨保衛鄉民咸豐十一年匪軍大至圍攻陷天心寨殉難事聞給獎其子洪灝廕生子海清襲廕監生以父殉難家中落事寡母能竭力盡孝養雞魚鴨肉必先去其骨刺湯必去其浮油嘗而後進母病親驗糞溺審察症候晚年博覽羣書著有讀史隨抄庭訓格言稿毀於匪年七十三卒

方步齊南鄉人咸豐時從軍征髮匪屢有戰功亡於陣贈威勇巴圖魯



翟金鑑字明遠監生住東雙河東阪咸豐辛酉擒匪由鄂分兵北擾鄉民逃避金鑑獨具衣冠立門外以待匪至挾之不去遂被殺後卹贈其子翟禎雲騎尉世職金鑑入祀忠節祠

李巖字良士李嶂字作屏堂兄弟也住申南杜家阪爲人勇敢有爲剛毅不屈同治壬戌春髮匪圍攻救山寨屢瀕於危二人挺鎗攻擊奮勇追逐後援不至陷入賊中同時被戕

蘇體仁字健亭蘇家樓人邑附生品端學正士林欽仰咸豐季年擒匪竄信陽時體仁年八十有八被執不屈罵賊遇害匪平輶軒使者以耄耋守正殉難上聞卹贈雲騎尉世職

陳國華字蔚川五里店人尙俠好義咸豐末擒匪猖獗邑東北境皆成匪區五里店四面與匪爲讎匪陷而踞之人民逃竄一空國華馳赴湖北省垣踵見鄂督袁懇派兵赴援鄂督遲疑不決國華伏轅門外一晝夜作秦庭之哭鄂督義之卽日遣總兵周鳳山率師北上匪聞風遁去陳敬韶字鳳亭廩貢生馮家莊人工文藝尤善書筆力堅勁自成一家豫南碑匾多出其手生性極孝行動悉遵孝經咸豐辛酉七月十五日擒匪陷馮家莊匪縛其父鞭打之敬韶以身遮蔽代父受責竟被戕

周光緒字縉之咸同中倡辦鄉團剿匪屢著戰功獎五品藍翎以操勞過度雙目失明

周光第咸豐十一年遭匪亂死事甚慘蒙旌卹以忠烈義士入祀節孝祠周念典字覺夫監生成豐中以辦團功保縣丞擒匪破出山店殉難死奉

旌入祀節烈祠

咸豐十年方幼警報父仇與匪戰殺賊人以衆少不敢死予祀節烈祠

周令典咸豐中以辦團擊匪獎功牌六品藍翎咸豐十一年遇匪死子維純忿而投石擊賊同時殉難並予祀節烈祠

溫遐齡四區民團隊長於民國二十一年杆匪蕭六竄入境遐齡率隊剿之柳林陣亡

郭承恩青石橋人民團十七年共匪踞四望山作亂承恩以民團告奮勇赴剿中彈死

董世秀洋河農人少負氣節見不平事輒爲直之人多服其義庚午秋八月五日共匪陷洋河蹂躪無人道世秀悲憤填胸商人張興文家被掠世秀見之以大義相叱責匪怒以刃劫之色不變而詞加厲遂遇害

陳樹樟字毅木平昌關拔貢希元之子河南法政學校畢業民國十九年充光山承審時赤匪蔓延警報日至縣長張簡三約樹樟相助爲守樹

樟諾之無何匪逼城簡三乘間遁去樹樟忠義憤發督巡防民衆乘城拒守卒不支城陷殉焉

李伯文城內人新編十二師營長民十九年從旅長侯祥甫禦赤匪於柳林以衆寡不敵爲所禽械至匪總部百計誘之降卒不屈爲所戕陳善同挽之云視名重卽覺視身輕定遠封侯空負虎頭食肉相蒙恥生不如蒙難死臨危授命何妨馬革裹屍還

陳詳禮字明階馮家莊人高等小學畢業性慷慨果敢有爲每以土匪猖獗爲憂自備快鎗服裝給養投充本地團勇民國十三年正月初九日與匪戰於馬鬚嶺殪匪數名二月九日率團勇十餘人剿匪於毛家冲斃匪五生禽二越三日匪傾巢來復讎適局勇強半送案赴縣餘勇見衆寡不敵悉逃竄詳禮隻身格鬪戰一小時力竭戰沒被焚僅餘殘骸妻張氏以憂亡遺兩老皆七旬餘兒三歲地方哀之爲之立碑

鄧尙鰲字奎閣住黃龍寺高等小學畢業民國初土匪擾亂倡築山寨籌辦鄉團鄉人倚爲保障十三年正月初五日桿匪張么率衆掩襲猛攻尙鰲率衆以土槍禦之久之勢不支衆皆逃散尙鰲猶奮勇抵抗重創仆地尙瞪目呼曰吾父母與鄉鄰悉逃生乎果逃吾死亦瞑目矣

汪東先申新村人勇而好義民國肇造土匪四起衆公推爲團總創辦團練民國二年冬匪衆擾境東先率團勇二十三人邀擊之姪炳田格殺匪首王心泰及匪徒多名以無後繼爲餘匪所乘殞焉子秉堂族孫文理皆陣亡東先撙節益烈事聞知事李萬基追悼撫卹獎贈義勇可風匾額尋東先又赴尖山毛集暨桐泌確等處追擊羣匪由是巨匪全文斌不敢入境一方倚爲長城沒後家無儲石鄉里哀之

劉樹堂王應倫均清河村人民國十八年樹堂充民團班長率應倫等擊匪於四望山衝入匪陣樹堂被擄不屈匪以洋油燔死應倫中彈死事聞政府各獎卹給金百元勦匪指揮余世溶區團長郝正綸爲之立碑紀念郝正緒撰文

張文軒字朗泉歲貢生成同間髮捻之亂文軒襄辦團練克復張岡僧格林沁領兵南下駐紮城外子貢祠其部下徵派煩苛苟違其意鞭笞交加地方苦之文軒偕劉德潤冒死膝行稟求僧王減輕苛派並懇禁止兵士入城居民嘖嘖稱頌後任鄆城安陽嵩縣等縣教諭壽八十一卒周廷彬西雙河人同治三年髮匪破天心寨被擄不屈罵賊賊以刀刺其喉幾殞適官軍追至救出治愈生平讀書好善享壽八十五終

許傑四里橋

好今四義鄉

人性鯁直見義勇爲髮捻之亂婦孺結隊而逃河水

暴漲不能渡傑乃編竹木爲箴以濟之匪追至擄傑傑罵不絕口跳入

水匪去傑出猶罵不已年九十八無病而卒

郭家禮青石橋監生同治三年匪破天心寨擄家禮大罵不屈厲聲曰我

輩讀書人生爲清白民死爲清曰鬼士可殺不可辱有死而已遂遇害

信陽忠節古今頗多而最著者莫如髮捻之役同治十一年勅建忠節總

坊知州孫嘉臻撰文其略云國家自用兵以來凡殉難紳民及盡節婦女

均得隨時報部奏請賜卹所以慰忠魂崇節烈恩至渥典至重也信陽地

當孔道烽燧頻驚城鄉士民同讎敵愾前後十餘年殺賊甚多而衆寡不

敵慷慨捐軀者亦復不少至於青閨弱質黃口嬰兒以及緇黃寄寓之流

均能義不受辱視死如歸是誠廟堂恩膏之所被庠序教澤之所留必不

可聽其湮沒者也余於壬戌秋署任斯土卽思彰闡乃因兵戎未息採訪

維艱旋亦奉檄他去庚午春復權茲篆得伸前議以遂初心爰命邑紳候

選知縣李裕澤等分鄉採訪越年餘而事竣乃請於巡道憲邀集耆紳重

宴鹿鳴知州銜前四川高縣知縣郭鑑庚八品封典李炳蘭等議於白馬

橋東建立總坊取所訪得之壹仟捌百壹十二名口分別紳民婦女書名

其上以垂久遠嗟呼正氣猶存壯百里河山之色其名不死激千秋忠義之心旌卹優加泉臺斯慰工旣訖爰書其顛末如左庶幾後之人知所觀感云爾坊建於西城白馬橋街其向東一聯云一片寒沙埋烈骨九重溫旨慰忠魂向西一聯云九陞綸音兩間正氣廿年兵劫一代忠魂

計職員十名監生三十九名

候選縣丞周光第候選訓導魏謙益江南宜興縣知縣周守典候選從九品潘焯候選從九品潘昭祥從九品銜曹文彬從九品銜杜仲楫屯官朱浩劉長三倪瑞林生監蘇體仁陳敬韶姬憩棠徐守山張繹高余心淳鄒登甲張應澤張承先張瑞李公舉陳九皋金選臣程金鑑陳漢陳望齡郭保秩錢震泰金樂羣陳文敏吳應舉王金南李清華李自茂李天甲彭元善李高祥李泰中湯振聲文生樊濟川樊培基張文會張志恬張青雲張鴻座林徽典游鈿王化麟周念典

武職十三名

候選游擊殷會元候補千總馮星垣八品軍功吳貴周八品軍功李天三八品軍功王玉亭候選守備程明禮六品軍功李鳳立六品軍功郭守煦六品軍功王文茹六品翎頂黃蔚六品軍功劉開景八品軍功周令典八

品軍功潘炳

耆民十五名

馬全德胡國棟曾可全劉梅陳玉曉余文奎余文祥薛英周天申蕭學孫琳呂協東楊正修郭老八周祀

旌表義勇一千一百九十九名

朱燦然張棠張高昇李文貴張儒孫明山赫文學蕭萬樂汪未發陳九英孫榮華白彰彩陳開基孔學曾陳引五蘇天榮彭正柱馬自寅趙正富董運昭蘇天明陳萬貴陳開華劉兆林董乃金徐應白何萬道張萬富任鳳寅董登貴杜克儉萬才夏國安李長富賈澄李緒山匡國樂張祥趙純修汪金發李林山潘志李金德劉文蔚鄒榮樂張玉和董恢德周世縉韓華榮袁鳳偉王績劉建胡陳柏張祥林程度陳英樂井高善胡德坤陳三樂李登保陳玉富倪正相夏相馮萬有王德懋董乃積陳守先滕有文孫寅孔兆空董乃修何占先余守華袁明樂李可舉丁明典丁明哲朱點然朱法楷孫朝佐孫朝清焦時銀焦時起何錢龍邱學舉馮坤袁繼祥胡泗才李開義曾有鍾周董自修許希誠井長路井萬善霍正乾陳翰李正清何占發段有才周至德陳汝言陳株袁繼先余鳳志陳德陳起良李可同張

相何國正李正發袁金富白心一楊玉龍周永樂邵得春孔廣鴻李大發  
張保張富陳繼貴張輔清盧備仁余殿江王積施李天義李成王振王杰  
陳正樂陳德善董乃秀董乃龍丁明全丁文理朱蔚然朱功成周起興周  
祥泰沈敦才沈敦前許德來苗雷章韓自發尤得榮胡門桂潘喜魏朝明  
張根井奇善井至善陳德林劉逢毅馮羣牛大有何文才何文亮潘發祥  
傅德順余天眷許步成彭有才袁州劉鳳舉吳苟余廷昇李長久周鳴萬  
楊天機蕭馮才陳大德吳殿科王克修張全有張萬興張國題張天善張  
學才張亮清方志貴馮如意李是年李有忠李會名李麻子王德成王金  
好陳萬立陳萬道董乃喜董乃思魯萬選魯萬清劉玉合劉正旺周茂生  
周慶生沈敦奎余金舉雷鳴旺姚鳳庭嚴德魁任可得馮癸酉陳永泰井  
餘善王道立朱萬慶王化運劉鳳銀陳冠有高文舉高文蘭白文舉方芝  
衛大模楊福道鄧光立葛得才陳喜涂士富袁家瑞陳萬富張金懷張正  
發姚正芳胡登祥劉鳳祥余道坦陳魁張繼田王德祥王德寬張士謨張  
士誠張運兆張元榮龍小田龍大田李開春李來福張春張松年王楷王  
愛陳和尙陳響董永玉董運華魯東山魯允中劉驍劉學成周鳴盛周維  
清余金斗余魁袁得海左同吳興彭明朗余鳳兆陳立志祝國昌王明立



李敬德樊學易彭金敖陳敦位陳金昌陳大貴王德洛陳皮匠胡應懷左  
文炳韓童王成謝自龍陳道立涂有充柯金富陳舜韶王金年王開泰  
張文芳張學詩雷雲發劉眷李連元李鎖柱張書張石頭王足王塔陳金  
榮陳明立董志逢董榮魯安劉萬林劉貴恩劉學善周維舉周三照黃有  
本黃有德蔣羅子饒天林彭正禮彭金山祝自昌何萬清張小黑鄭曰魁  
李方茂梁懷唐地陳玉容高天曉高文經高正興謝寶林維舉周萬順程  
明選王正乾王金富方紹友李達榮李仁文周蔚興夏明富劉玉碧程本  
祥張文運張文富劉雙喜李長富熊文舉熊學聖熊開清熊明良熊明道  
熊明昇周遂生董運茂李楷李恭張獅子張娃王滿堂王老二陳燕董運  
宣董麟書董三妮魯學詩魯學禮劉志慶楊景成周友生寶永康黃開甲  
李堆馮庭梅邢苟管士有劉甲何萬春王金富劉書賢劉金榮楊玉喜李  
茂生劉大玉劉誼董華廷劉學舉曾玉堂曾雙喜陳俊李占先朱有才褚  
桂雲宋開富王大才陳長陳有陳瑞陳元陳安吳貴劉金相陳澄清劉培  
基陳自友葉滿堂葉清林葉文林熊明夔熊明修熊文科董來頭葉元宰  
李金亮李金榮張天成張應魁王誠王有董飛廉董永藻董運喜董乃士  
魯學洙宋治順楊聰楊景全寶汝華羅開貴杜萬富方梅馬鳳章石得禮

岳旺潘大亮宋大心王法義倪士顯張正廷王萬占楊玉山吳逢年王來  
吳克禮鄧桂曾守慈劉占俊王德從韓天富王有富周長尙胡連登吳殿  
選盧志高黃三何萬義胡正興朱有富卓希誠白衣太劉馮杰劉玉書劉  
金昇葉士林葉潑夫葉照林葉元桂蔣元徐金發李永興李常貴張應發  
張小體王金禮王其富董永庚董石頭董响董允才宋霞林宋金林楊正  
祿孫玉朝羅正榮甘作思方富山藍金貴程敦法毛永和潘玉學潘華劉  
萬宰徐明高曹景文徐玉重蕭得勝王萬昌高富貴馬樂三彭禮鄧學富  
徐天純高天喜夏國祥夏世英樊有富魏成余心泰馬旺陳士道徐鴨頭  
潘立盧心安尹長合段金玉井義善藍金斗蘇正均甘快來孫明珠孫套  
宋鳳儀宋嘉林董乃準董眼皮董允亮董允高王開柱張喜王德張榮發  
李景義李書貴陳豐子陳受生楊開第孫鴻有孫鴻彥孫鴻宜孫日發趙  
正貴王德輝吳殿章彭大慶王鐵頭吳殿元程學富謝朝鳳潘旺胡運林  
盛筵馬文典李福澤陳建陳品楊玉蕭吳喜楊慶曾張廷富甄啞子李可  
憲馮應華繆永慶劉萬全藍大同江永強盧照江選王萬福陶成寅杜學  
榮劉保李長友王興田庸王山馮盧會李富陳喜張五張登會高老大張  
文玉趙正旺張毛爾危家葉襄芳劉元鄒長玉聶旺追陳國榮楊兆修陳

文樂李克山鄧固馬順衢陳金潤冷德望李道人余思靈黃文亮盧和尙  
盧修林盧彬潘老四劉榮楊來聖汪治齋楊青修陳明周柱劉德成馬盛  
衢馬富頭程小隨程文斗余和尙余瞻杯藍金柱藍金梁黃文王麻子褚  
義陳九春井家科涂法榮吳金道陳敦緒陳天然譚高金張文運王老胖  
王德成匡文發譚隨盧潤盧金殿盧大盧四盧大憲譚文煥王同祝三重  
祝三餘吳元賢熊明哲李純士陳克喜舒有得龔大才王忠盧好王作幹  
徐心田楊培林王章王明富周三俊馮正才周中懿余文輝王德位彭法  
祖吳克元朱大發朱作醕楊天佑杜孝盧貴盧全周三德余文郁盧苟盧  
中憲劉蠻子李浩然周三憲程珍楊老四程志道徐金盛李問貞方亨芝  
徐可義朱三胡登趣黃灝惠杜克忠盧同盧智藍正富藍正銀藍正友藍  
正選藍大毛藍正乾藍正英藍正秀藍正偉陳作賓盧亂姚長順史含春  
徐油在邢文亮朱酷胡天舉李方方書徐蔴子史金培劉照祥吳朝聘吳  
萬芝吳義頭吳萬順吳臘梅吳萬秋曾文貴曾文學曾奈毛盧大龍盧運  
余卯余得海汪治選沈明亮李毛劉化楊松林桂培根李可奎劉喜王永  
秀徐道仁余思再余文博余文正雷惠清雷明來謝正春周中順周三多  
余占元楊培芝譚順江舉余思禮藍名友邱兆勤胡宏謀盧亮成盧敖成

徐義順余占廉王碾藍敖成謝照堂樂苟孫長合張金富應獲玉何輝殿  
杜華太馬得順潘浩然柯傳道余文斗譚立忠周龍陳周德黃生華陳國  
遂金炤金世奎熊萬年李江明世謙張世玉柴得興胡得旺殷大旺胡世  
元曾敏梓馮占魁李文會張有成陳玉林陳照林余禿子盧應合嚴文發  
譚朱蘇明立藍珍冷建齊青雲胡世安孫長春劉惇典王德明張應輔楊  
培恕高國順謝魁陳世則凌志雲周立學陳玉獻張春金世培蕭忠義周  
正謀周正室張玉成李存銀陶文彩朱金生貨大富貨大喜陸二毛鄧從  
奇杜成喜姚以謙楊秀生黃積善殷大旺張鳳彩盧魁余思原余思振馬  
稱羣譚中周忠武周忠運冷金花盧華周正亮涂二奔左文炳孫志奎易  
大興彭應賢謝寅光謝玉德胡林毛恆玉張逢酉張燾桑貴玉程楷彭金  
發李浦王榮王國順周正朝汪洋許學問郭文德王之元魏全烈朱廷鳳  
李彰陳興陳作書杜秀詩魯興周黃德明馮樹明黃積榮張心暢彭迎春  
吳道田吳道富馬臘意謝宏池邱狼藍年冷毛周毛盧友梅余啓貴陳乘  
申張金貴戴春閔金福程金龍朱有富陳世發任立得孫玉璋鄭得興楊  
可富黃甲貴周立本周立泰符金齊符金榮鄧作貴鄧作賓袁正發馬長  
清韓啓華黃正中翟長安陳德培朱長貴劉心由陳天才王作猷馮治聖

李周張心遂張順道余小毛蘇永富馮敏英鄧春馬鄧九儀藍胡藍小毛  
吳詩朝余牛余啓富余文富金壽宋孫秉彝李曉貴王化國黃榜杜有發  
周有文杜逢連金元雷發黃金題翟可聰陳得富陳萬全周培貞周禮賢  
梅本吳培林王立貴胡長明董盛奎周隴蔡論蔡錫洪朱萬樂唐捷林陳  
三仲周柱陳純張丑張順詩王玉發譚廣楊卯盧小留余思楷羅正發羅  
得藍寬藍啞叭藍林藍鳳章余古榜吳有德姚文明楊得林張起瑞張起  
富王化同黃向周廷發汪明惠陳永貞張道範吳恆陽周立勳翟可萬陳  
昭德周依賢曾廣東張鑑韓啓賢袁宣潘慶榮劉永昶侯松年李春華蕭  
輔之王輔一曾廣立曾廣猷黃盤胡春山魏金城唐金龍陳蔭胡應才康  
義功黃金有徐麻子楊永壽黃永修曹明燧鄭從侯勝年吳珊吳樹鵠許  
萬成陳大瀛黃開太艾成秀楊士祥喻大華符鳳鳴符壽林胡理國周立  
貴高金甲董盛世張世祥符其祥陳世全陳世美胡正清張正明張梅孫  
大樂余占恭余啓仁藍勤王題春藍正清藍正貴李桂林李漢盧培盧彥  
盧大然熊天祥鄧玉生王逢晉冷得乾翁繼先翁富先黃有得陳正華王  
筦陳書先陳瑞林錢光富陳有富馮思進宋良元周其良李乏論曾逢春  
符鳳彩朱全藍玉貴胡銀賓劉能許周熿袁奇士王權一陳明德陳自強

程敦貴曹光英黃永慶敖正國左萬有劉正德唐正興甘志成呂玉郎李  
正興王善許敬忠陳全瞿大順劉志業吳德純周世倫朱有榮黃三湯大  
國鄭景貴陳裁縫柴作霖周貽燕楊可新盧培田林中玉王作衡胡天久  
林愷陳舟元邱開元孫榮劉楷李富相翟有葛大貴賀爲福余心樂高繼  
興王家樂翟秉善翁義頭王小林冷德揚冷德坤郎大魁郎富余德海盧  
得興盧碾余啓章余啓光藍鳳年楊永發冷得銀冷得成張得勝彭永寬  
趙得旺張志秀姚忠清陳金義伍善元錢光前陳龍劉得運伍斌聶之佑  
賀正義魯華國王正發杜本忠黃鳳朝孫得廣黃正安孫得周呂致才紀  
兆海傅炳炎徐安太周維純金應魁蕭應春黃文喜王中義段其祥黃中  
張老二李景三丁文榜白耀彩李正剛陳良李庚宋鳳來劉得秀董茂張  
金之張繼儒張應懋

旌表義民一百八十二名

張百萬陸德新孫志俊盧馬瞿正隆黃秉錢魯興戴老二蔡光黃秦朱曾  
紹來白登科黃秉中鄒書辰熊秩夏明張大才熊旺鄒書禮關福元任得  
立嚴開選涂中發劉正富魏光榮劉老二賀元善柯興吳尙義江德旺楊  
正新張敬倫左玉成余文佩曹振林張廷揚胡大毛胡二毛葛維憲徐立

明李明南張學進張發楊和尙劉廷南劉玉山彭正裔羅萬才蕭迎仁王  
官德甘天友鍾大成郝成鄭國安談曰章朱萬成梁有度程德華易中文  
胡定華鄭么鄭季文劉喬胡德運王朝富李逢時呂金文張友張大晏葛  
成發葉同春湯辛乙蕭偉呂大才李大榮胡義久尹文學葉榮王金堂賈  
元秀陳祥胡應端李逢鳴馮抹子王景春楊恆玉翁及先陳世五潘成朱  
聶子樊道一羅鳳朝李成元李樹林彭純成嚴老么李玉銀王喜毛王興  
陳亮魏曰起魏曰發顧天相唐學書劉鳳池李純粹張應訪鄧立黃正中  
羅鳳池徐鍾朱梁孟德羅魁元李朝義吳蘭山李春發李向陽劉廷友張  
嘉樂王文順翁兩海董金儉盧萬春張禿子李蘭彭萬福龔華曾楊懷忠  
龔倫康景葉富朱全友余夢友邵能華李太和胡臘夫李文炳黃發董金  
寬董正發馬明盧守襄陳世補熊體恩楊得生譚運來楊世守黃金黃才  
劉金榜梁德李得培李大柱楊正李盛王啓德胡剛馬景太楊得春田雲  
發周廷魯吳名乾劉興徐容喜李增王元功雷積祥周得意許國寶江良  
張正亮張義謝士芳朱孔亮熊禿子李朝榮楊秉華袁易成熊伍恩熊兆  
奇甘兩包董發春余思德余思寬周元林陳萬年席應林魏忠趙麻子李

麻子

隨營義勇十二名寄籍義勇七名

劉開富雷鳳春王興才劉金斗劉義德楊學金陳公傳楊廣濟馬正國侯萬才宋望喜杜有發鄭鰲廬鳳呈楊道宗章全仁陳學宣何登第周大全義僧九名

僧上言僧道廣僧方寅僧廣秋僧究貴僧究富僧竟馨僧究喬僧竟想忠義婦女

王喜毛大姪女大妮葉富妻丁氏李德成女李大姑楊正業女大姐梁格女勸姐黃麟妻齊氏黃金鑑妻胡氏張國讓妻周氏郭良妻王氏張傳忠女張大姑陸中義妻石氏曾廣田妻田氏楊修書女楊秀姑龔清榮妻馮氏王應田妻劉氏胡德周妻王氏楊氏婢女雷氏馮玉貴妻王氏譚得富妻劉氏余有攻妻胡氏馮金貴母許氏袁明德妻朱氏江良妻丁氏林心泰妻辛氏張天佩伯母杜氏劉金榜妻張氏王元忠妻劉氏胡志元妻王氏陳伯順妻汪氏劉存璞妻劉氏賈立成妻康氏沈樂儒妻汪氏陳學純妻歐陽氏羅鳳池妻李氏楊秀姑婢女秋香龔輔姪女龔氏梅文炤妻李氏周廷芳女毛妮余灼女大姐黃天壽妻鄒氏祝垣妻喻氏周維林妻夏氏汪大瀛妻韓氏楊苾妻李氏楊彩妻韓氏楊恆饒妻王氏趙國相妻胡



氏陳金彥妻黃氏何文盈妻鄒氏鄒書展妻方氏林大華妻杜氏余占春妻徐氏余啓道妻鮑氏劉氏幼女苟妮張萬書妻黃氏邱從善妻黃氏邱燦儒妻黃氏周喜清妻張氏安氏幼子毛兒楊華妻鄭氏長子狗長女喜元次女二毛三女三毛周鳳妻朱氏長子和尙長女大毛次女二毛祝垣女毛妮蕭堯妻李氏袁永貴妻陳氏李楹妻鄒氏梅本妻周氏余文富妻鄒氏王繼先妻余氏凌成祖母楊氏孫禮山妻張氏陳有華妻陶氏曹聰女曹氏楊天喜妻余氏楊培元妻汪氏楊國珍妻張氏王寅妻郭氏黃華盛妻李氏陳忠妻韓氏李鎮妻鄒氏高萬發妻廖氏鄒氏長女大姑次女小姑翁乘權妻魏氏余占榮妻秀姐翟可強姪女屯姐余德懋妻劉氏陳金思妻余氏劉志貴妻倪氏楊培倫妻張氏楊培富妻張氏余守善妻劉氏鄒起妻蕭氏翟可萬妻余氏秦應甫妻李氏張銀妻龔氏梅文蒸妻李氏袁德潤妻吳氏武元忠妻錢氏梅逢春妻李氏翟明亮妻田氏厲樂三妻龔氏陳可祿妻梁氏厲永寬母聶氏孫有典妻王氏郭家禮妻周氏張順妻張氏辛氏子林妻袁氏張進妻周氏張氏子劉毛妻曾氏劉廉妻張氏胡天元妻劉氏劉開題妻周氏余智曾祖母盧氏馮志沂妻胡氏汪氏子沈逸名妻馬氏康得仁妻劉氏曹鵠林妻項氏王作猷妻劉氏張友仁

女張孝姑何作殿妻武氏張正明妻柴氏王明猷妻李氏郭保秩妻周氏  
許士清妻孫氏何福妻呂氏王氏女孫大姐李建高妻楊氏杜玉和妻葉  
氏趙逸名妻李氏葉瑞林妻李氏王作猷女王同姐李正榮妻子張學  
智女張氏胡裕德妻余氏許好善妻姜氏王有貴妻余氏湯運妻張氏楊  
逸名妻寇氏徐澤旺妻劉氏孫樂培幼女四姑五姑金國瑞女金玉姑王  
化正妻張氏王德臣妻王氏鄒書丙妻馮氏楊秀升女楊氏熊得發女大  
姐嚴春母吳氏蔡玉子婦劉氏修德妻甘氏李燦然女黃氏馬伯公妻許  
氏馬逸名妻胡氏藍鳳鳴妻孫氏郎玉生妻盧氏盧中成妻吳氏吳朝詩  
妻彭氏周三元妻王氏張成兒次子喜兒女愛姐姚氏幼女端妮夏正時  
妻張氏程萬全母陳氏余啓貴妻盧氏盧貴女盧大妮張逸名妻唐氏楊  
文林妻馬氏汪燦章妻胡氏汪其祥妻韓氏吳奈毛妻張氏譚明妻程氏  
郎大魁妻黃氏孫氏幼女藍小妮余思科妻雷氏余士敬妻周氏余占榜  
妻張氏盧成妻鄧氏康氏子張斌妻鄭氏楊金林妻張氏蕭合仁妻王氏  
長子忠兒次子位兒長女金姑次女繡姑藍五貴妻褚氏又鄭氏曾氏趙  
氏徐氏張氏高氏邱氏周氏田氏黃氏李氏

以上忠義



人物志二之二

文學 武功 耆壽 藝術 流寓 方外



文學

張宰字合一如芝子康熙時拔貢性倜儻喜爲詩嘗一再遊金陵登采石  
謫仙樓枯毫和壁間韻淋漓揮灑豪氣不減青蓮所交皆天下知名士  
如燕山周伯衡吳門黃九烟暨魏維度張孩如王湛斯諸名宿均相與  
往來唱和不吝推許康熙二十九年與邑人王山甫纂修邑乘訂正獨  
多所作詩信陽流傳頗少略載於楊笠舟中州詩鈔密縣錢九韶河嶽  
集鈔本邑人劉海涵檢鈔彙存輯爲一卷固始吳晉昌序其詩以爲清  
新俊逸擅庾鮑之專長雄渾老成踞高岑之最勝又曰人能重詩非詩  
能重人合一以光明俊偉之品與倜儻磊落之才一把臂而知其非凡  
人余非徒以詩重合一乃以人重合一也其見重於時如此

黃墀字珂度邑諸生父文瑛與師竹子喬峯將軍爲岑苔交迴月樓激陰  
館文字往來無虛日珂度幼承家學博雅能文人嘖嘖有白眉譽旣經  
世變遂不復求聞達閉戶著書以自娛撰書二十卷順治十七年邑侯  
賈待旌修信陽州志延與襄事同劉航石王營若皆以詩文相切劘一  
嗜古篤學君子也

郭亨字兩蒼郭家畝人康熙中歲貢歸德府學訓導爲人謙讓恭敬勤敏

力學久任教職嘉惠士林引疾歸里教誨子孫一時有一門四俊七賢之目四俊者坊于蕃塚均也坊字閑光亨長子廩貢生幼聰穎工楷書內行敦篤以文學名於鄉附門牆者多爲佳士子文一附生年七十卒于蕃字依京亨次子歲貢生生有異稟讀書數行下文思敏捷一日可成十餘藝名震一時從遊者衆生平端詳動符規矩享年八十七視履至老不衰子宛基宛郊孫毓英含瑛皆歲貢孫毓輝附生塚字弈封亨三子歲貢生靈寶縣訓導器局雍容政聲卓越德性溫和品學醇粹壽八十八歲均字位中歲貢生原武縣訓導賦質穎異過目成誦性恬靜退讓居家孝友文學與于蕃齊名子際雍歲貢生七賢者皆塚子新命顯忠敦復錫命瑞虹從龍六宰也新命字卜鎬歲貢生寧陵靈寶縣訓導幼慧幼學鄉黨稱孝壽八十四子燕翼歲貢生顯忠字扶莖廩生穎慧絕人下筆千言天不假年士論惜之敦復字象明歲貢生爲人忠厚誠篤高才博學邑人仰爲太山北斗年八十有八子鴻江附生錫命廩生嚴重方正爲鄉黨矜式生平以禮法自律處世和平成人之美濟人之急有義俠聲瑞虹增生博學善文淡於進取寄嘯田間時人比之郭有道從龍廩生早慧七歲能文倚馬萬言好學不倦三十五卽卒六宰

字徽典幼敏悟過人儀表偉岸工制藝善書法年二十以廩生登乾隆癸酉河南鄉試二十四成進士任湖南永定縣知縣署澧州直隸州知州清廉正直循聲洋溢任內所斷奇案纍纍能以經術飭吏治年六十餘致仕歸兩袖清風行囊惟有萬民傘德政牌而已歸後於郭家畝建立宗祠明宗法篤族誼宣揚祖德至今族人稟爲成規焉

萬侯字定垣雍正癸卯拔貢乙酉舉人授原武教諭初知州馮原奉藩憲檄修邑乘官紳會議於明倫堂特延侯襄事甫脫稿適侯赴原武任未歲事繼任知州張鉞始付剗刷按信陽縣志創於明成化初後知州江貴又成州志萬曆時何洛文劉尙樸又續修之清四庫提要譏其蕪陋嗣後兩經補纂至侯續修揆以近今章氏體例尙未盡合雖未爲完備然至今百十餘年令後人得有所憑藉著手重修其功殆未可沒也

劉應陞字觀宸號胎簪原籍江右梓溪前明遷信陽衛南村自大參侍御兩公以進士起家代有文人應陞爲其六世孫生而背父飛隴十四日稟母教幼卽大異常兒七歲就外傳不逾年吟誦成章州人咸嘖嘖稱奇童十五應童子試遂冠軍孫虛舟學使奇其文一再試以詩賦欣賞不置擬諸蘭蕙圭璋應陞益自刻勵求與古會凡漢魏以下諸名集靡



不撻討窮研吳雲巖一見引爲詩文知己既又從宮詹陳紫淵先生學造益深乾隆乙酉入選貢遂舉是科經魁文名噪甚大河南北無不延頸企慕一欲識其人爭先快覩其詩文繼遊京師宮詹子世昌官農部夙與朱竹君姚姬傳程魚門善每宴會輒邀陸與俱對酒論詩諸君皆傾倒之卽好飲者亦停杯贊賞丙戌己丑兩薦未售其受知主試某公愛其才以書薦之某太史卒不往謁性孝友事寡母尤謹自以背父太早每春秋墓祭輒愴然悲泣竟日善與人交久而敬之家素封凡鄰里告貸如願以償意豁如也論文重氣骨嘗謂氣者文之輔也骨者文之主也故采也而素先之水也而風行之先之者骨也行之者氣也是以骨振者其言闕而肆氣醇者其旨清以遠卽此可以概其爲人惜其享年不永僅三十六而卒沒後同里戚好彙集手澤得詩十卷文一卷名胎簪記梓以傳子雲甲歲貢生善書法性恬靜安貧樂道不慕榮利日以詩書自娛教讀爲業饗殯不給淡如也其墨迹頗近鍾王人爭寶之

劉倣字令祚號松園郡諸生少倜儻有大志然輕世傲物每自比劉伶阮籍之倫時人莫尙也家貧喜著書宅旁植松一株花竹四映日飲酒數

升雖絕晨饔吟咏弗輟存稿甚多同里進士馬正午慕其詩品獨超有唐人風取稿付梓署曰松園集其家存文稿十餘卷一日爲偷兒竊去仰天呼曰是愈於喪我也遂悲憤卒其絕筆云侵窗冷兩孤燈近入夜沈疴破被圍聞者哀之胎簪山人謂其詩洞胸鏤骨以刻削爲工頗類長吉而一生不遇亦與長吉不甚相遠楚人攸縣彭廷梅操選都門編其詩入國雅集

潘德遠字彝清家大廟暇年十五通經史及諸子百家言好琴採朝陽之桐粉赤金寶玉和漆製之發音清越能文章不利小試報捐國學生一赴棘闈不利而罷乃潛心性理學尤好老莊言性曠達廣交遊江浙河洛殆徧同時書畫家鍾璵李正乾汪勃皆兄事之卒於嘉慶五年平生治家嚴生七子均有父風

余作新字馥荈世居清河村嘉慶戊午河南鄉試第一父老相傳其未舉時與兄作礪同赴甲寅省試兄獲雋而作新被黜居近董奉寺遂負笈入寺讀書書案及室壁皆書兄名以自警日夜攻苦不少息三年中曾未解衣安眠困甚卽伏案假寢片時醒仍攻讀文思大進下屆戊午發解爲河南名元但文章憎命屢赴春官不第後以大挑授陽武縣教諭

訓士有法人擬之胡安定之教蘇州杭州不獨文學著名抑亦教育大家夙善草書人爭寶之制藝刊板前存奎樓今已散佚

周淮字簪泉號筠莊八甲村人父竹溪弱冠食餼以不服汴垣水土一試未中遂不復至家居授徒成就後學甚衆母氏師竹裔孫女知書工韻語淮從父讀無他師家學淵源承父未遂之志於嘉慶庚午舉於鄉信陽當乾嘉時科名頗艱帖括家口沈溺鄉會墨中至老弗倦淮獨博覽羣籍號稱淹雅實開吾邑風氣之先當谷村蔡氏子名經者以神童噪遠近里師遞避席去聞淮名來學稱弟子淮益購書相與窮研蔡旋以早慧夭折淮深惋之後揀知縣不就築草堂爲娛老計與同里張己峯生洲父子相唱和弟洛號筠里邑增生亦工詩善繪而墨龍尤所長時以爲難兄難弟

李洪緯字炳齋當谷人中嘉慶庚午科副車爲學純篤專一功力湛深其文根抵六經蘊蓄子史每出一語如鐵斯鑄欲移一字不得嘗偕胞弟洪烈赴郡應歲試其弟看榜歸寓有喜色問曰汝列一等乎曰然問第幾曰第一問我名何在曰未見曰汝試再看弟出聞礮聲看畢歸報曰兄另一榜曰我豈四等乎答曰非也兄文冠九縣學使特獎另榜示優

異耳清例秀才歲試分一二三等其最劣而不中繩墨者罰四等兩列  
四等疊序除名榜發亦不同時故有此問嘗有一韻事端午日獨坐書  
齋看書磨墨硯池擬作字適家人進糶與饅各一盤置案上隨食隨看  
不覺誤以糶蘸硯墨食之而饅固在也迨家人收器奉水請盥方覺相  
與一笑而罷

張培金字生洲清河村仙石畝人貢生六丙之子稟庭訓未嘗一就外傳  
能文工詩有聲藝苑中式道光壬午鄉試舉人與睢州蔣予檢固始蔣  
湘南結文字交七度春闈不第家貧藉筆耕餬口者三十年其抑鬱不  
平之氣一宣之詩著望山詩鈔八卷卷中落花集所謂憶花後憶花廣  
憶花皆所託意後就選湖南麻陽知縣淡泊自安不改儒素麻署漫興  
云時清恰好官藏拙事簡何妨晝起遲其操持亦可想見湖南用兵時  
培金會上書曾滌帥歎爲奇才亟欲錄用忽以疾卒旅櫬歸里別無長  
物惟有詩刻板片而已

柴作春字上林邑南大王冲人

冲以多  
虎得名

恩貢生性耿介能文章道光辛巳

應鄉試已擬入選適以試帖題得清字誤寫青字以大不敬被黜遂歸  
隱林泉書畫自娛著有談經別墅詩文集今佚其鄴城懷古云鄴城自

古帝王畿物換星移轉眼非漢代衣冠沈薄霧漳河蕭鼓賸斜暉玉龍橋下煙花冷銅雀橋邊野草肥畫棟雕梁經剝蝕營巢尙有燕雙飛柴氏本高後籍青州明萬曆中有名君輔者官湖北督糧道遂家孝感其姪歲貢生邵歲貢生莊增生琴於清順治丙戌遷邑東柴家寨旋卜宅大王冲世有聞人作春其後裔也

危慶曾字震峯勳業坊人世稱震峯先生吾邑之大教育家也原籍湖北光化明末有官山東登萊道者國變後棄官至信陽其親家某適任豫南道遂家焉數傳至慶曾窮研經史學品兼優道光戊子舉於鄉歷署蘭封葉縣等教諭講經課藝以培養人材爲職志推陞豫河工知縣辭弗就回籍閉戶潛修教子授徒遊其門者甚衆成就頗多郭鑑庚從慶曾習舉子業家貧無以供束脩其母每年親作布襪一雙以獻慶曾怡然受之郭氏子孫至今感念弗置云

張四象字儀亭城內人家貧刻苦攻讀博覽羣書文章根底六經中式道光丙午舉人大挑二等授息縣教諭息邑文風固陋四象集諸生按期授課聚堂講經文風丕變息邑人士咸稱德教云晚年解組歸來猶以教育英才爲樂成就後進頗多如舉人張廷憲蕭相銘李兆祥貢生李

祥元路玉階等晉及門受裁成其他採芹食餼者更難指數平生自奉儉約治家嚴肅至今後嗣猶守遺規

王金印字晴川邑廩生道光辛巳恩科副貢歷任魯山鹿邑淮甯閿鄉臨漳等縣教諭訓導彰德衛輝教授平生博學敦氣節秉鐸各郡縣均以教育英才爲志集生徒課藝講經諄諄不倦大河南北知名士出其門下者甚多李文清公棠階其尤著者也歲俸所入悉以購書積至萬卷致仕後殫心著述有晴川詩文集千餘篇及手批資治通鑑一部四書補註八册周禮釋義八册經兵燹皆散佚年七十四終於家文清驛寄祭文一篇詞旨典贍情意哀切爲時傳誦子三長敬紱次敬緝均附生季子敬紹附貢生自有傳

李大培字式蓮邑廩生杜家畝人爲人寡言語重氣節敦孝友其學主博聞強記故其文宏博淵深不墮時派尤工於駢體文字喬皇典雅當時如郭尊香進士陳湘浦太史皆極推重之延至家主教讀太史嘗云式蓮之四六卽在京師人文薈萃處亦屬罕覩惜功名蹭蹬累次堂備不獲一第年五十九就館於外病沒子稚遺稿散佚僅存可雲齋詩數首係門人零星抄輯者道光間其祖塋爲湯姓裏買葬墳其上累訴縣署

未准理咸豐六年春族人掃墓忿將湯姓墳發掘大培遠館固不知也湯姓以主使指控被逮褫衣衿其門人與鄉先達咸爲不平遂歸和解大培訟數年未嘗攀族中肇事者一人而湯固地方富室因此案竟至零替矣

董檢儀字鴻臚其先有名光裕者由山西洪洞遷信陽初居董家岡繼遷城內世業儒中間以諸生預貢選者歷十代檢儀弱冠食廩饋祖益庵精岐黃術振乏救災卓著仁聲父玉圃以書生經商家中落檢儀設帳授徒資脩金贍家道咸問文體漸靡檢儀爲文一以清真爲主且惡士習之陋也誘生徒鑽研經史擴充識見嘗曰士先器識一命爲文人便無足觀矣故所成就多樸學質行平生篤孝友與諸兄弟析居鈎金尺帛無所私時招諸兄弟至書齋譙集作竟日談怡怡如也仲兄檢身早逝嫂曹氏青年守志敬事之若母以伯兄檢閱子培基爲之後嚴教之循循禮法勉爲孝子族黨稱之檢儀性嚴正而和易近人與物無忤倫常日用間動履皆有軌則夙承家學嗜醫書晚年研究脈案手不釋卷門內老幼疾病著手輒效而未嘗一出應診有強聘者則曰吾術不如祖胡賀賀爲其審慎多此類生平不干預公事至遇地方公益則與同

輩磋商籌畫務求允當往往補救無形年六十七卒子一培黼另有傳  
董培黼字少皋檢儀子性誠篤聰穎過人從父學每課藝輒冠其曹年十  
八以府試冠軍補博士弟子員旋食廩餼起居一小樓誦讀其中於經  
史百家之書罔不觀尤善書畫書法王褚畫宗煙客一紙出人爭寶之  
與同志結一申陽文社以道誼相切劘皆一時知名之士其爲文根底  
深厚脫盡時習光緒乙酉應拔萃科擬首選以古體字見擯其秋鄉試  
初擬解旋移置副榜第一是科題爲君子成人之美培黼揭發忠孝大  
義陳古規今主司慮干時忌故抑之元著鈺在文明堂原刻海內稱之  
自此遂恢心進取設館授徒四方爭相迎聘其啓發誘掖一本至誠有  
時如家人父子之絮語必使請業者各如其意以去嘗謂士莫先於勵  
行初不以博取富貴爲榮進修德業非窮達顯晦所能限其顯而達者  
適然耳及門皆拳拳服膺勉爲篤謹平生事親孝問視定省未嘗或缺  
有所諭則敬立悚聽不命之退不敢退母性剛嚴好清潔而善怒怒時  
培黼輒長跪泣請願受杖有跪至竟日者必怒解乃起又或飲食日用  
積習所不能除而爲母所惡者則終身避之至處近宗伯叔兄弟必厚  
必和淳篤出自天性年四十二歲子二長錫廣光緒癸卯優貢鄉試舉



人沔陽房縣等縣知事次錫廣

余履齊字蓮溪山河村余家土城人幼失怙恃家赤貧性嗜學依族親讀書恥食人粟必自食其力日則採樵販米以度口夜則焚香照書以攻讀每入山樵必袖書野誦爾時八股取士履齊志不囿於世俗其爲文也必鎔經鑄史胎息漢唐大家故揮毫落紙浩氣縱橫名言絡繹讀之令人愛莫能置咸豐元年壬戌恩科舉於鄉當報捷人至公猶在山樵聞之索然哭至今鄉里傳爲佳話兩赴春闈皆薦而不納遂絕意仕進樂育英才傳廉訪青餘知其賢飭州牧張仲甫聘請主講申陽書院桃李滿城前此吾邑科第頗艱適履齊主講每大比必中二三人皆其門下光緒十二年部選河內教授赴官卽免贄見錢日與諸生講道論學文風丕變至二十年壽八十卒於任乏殮資官紳爲之釀金歸櫬輻餞滿郊殯歌震野迄今河內人士稱道弗衰平生嗜菊在申陽書院遠羅名種嘗以無墨菊爲憾善弄笛每於荷淨納涼月色佳時吹之風送傳聞有至泣下者老以氣弱捨笛而鼓琴高山流水頗得其趣著有引蒙正路文二卷後進多資啓迪至今雖不合時家塾仍多藏之

陳連川字杏坊世居洋河性誠篤豁達有大志爲文波瀾浩瀚氣概沈雄

弱冠卽補博士弟子員食廩餼而數奇不偶十戰棘闈至光緒乙亥鄉試始獲一第年己五十矣咸同中捻匪猖獗洋河數經蹂躪居民逃徒一空連川商同堂兄顏香建築寨垣不數月而集事地方賴以粗安平生善誘人居居授徒館舍幾不能容貧者不較束脩一時知名之士多出其門晚年司鐸闕鄉值災授之後聖廟頽圯禮器蕩然連川置備俎豆廟貌一新朔望嚴立課期衡定甲乙引正批謬登馴良而退武健士風爲之丕變至今閩人尸祝之事詳閩鄉縣志宦績傳

喻心地字仲坤城西喻家營農家子十三歲始發蒙天資聰穎造詣精進詩賦詞章立馬可待巧於文而拙於書三十六歲始青一衿家貧筆耕度日義塾專館爭聘之所至座爲之滿從遊者多顯達進士如李樹敏郭家瑤舉人如郭之全李聯奎李聯輝王永暄王煦朱啓燿等至遊泮食餼不可勝數一時俊彥咸出其門允稱教育大家其族叔至陝西提督軍門陣亡恩卹應給世蔭無嗣承襲或勸心地往弗從其安貧樂道有如此者

曹福林字萃五世居城東曹家花園少孤事母至孝內行純篤年十九補博士弟子員性聰敏好學其爲文得啓禎諸家神髓後從邑進士郭鑑

庚遊學益進赴鄉試十餘次房薦者三堂備者三道光癸卯闈擬中名  
在第八揭曉主司以犯世祖嫌名擯之先是邑人扶乩問榜訊批云時  
來風送滕王閣運去雷轟薦福碑是科邑人王雲昭領解一寓雲昭姓  
一寓福林名蓋定數也福林善誘人門下士成就極多若江右贛州道  
查恩綏衡水縣知縣李兆祥峽江縣知縣陳惠麟無極縣知縣王揚曾  
戶部主事陳斌麟弟邨縣訓導瑞林姪己卯舉人世焯其最著者卒年  
七十有五

梁楨字幹園邑附生少幼學從解元王雲昭舉人曹巽林遊得其心傳工  
爲詩文尤肆力於近體雜作兼工唐人律賦居恆廉靜有守不事攀援  
而誘掖後進至老不衰遇寒峻子弟尤爲惓惓以是成就獨多弟鶴園  
聰穎善悟工繪事並習秦漢篆隸時人寶之楨年八十一卒子祖功郡  
廩生亦負文名早卒

陳友蘭字渭川駱駝店人生而穎異弱冠精舉子業爲文橫絕一時及長  
補博士弟子員鄉試屢薦不售遂絕意進取以昌明正學爲己任購求  
諸先儒書潛心體玩幾歷寒暑作而曰學在是矣其爲學切於修己其  
工夫在敬身慎獨嘗爲楹聯云不懈工夫惟敬慎最消福分是風流又

云至今方悔讀書晚修己何嫌立志遲其刻苦自勵如此咸同之亂友  
蘭首辦鄉團申西賴不糜爛又築寨車雲山中難民乏食出困穀千餘  
石拯卹之又採四鄉火燼餘糧以補不足全活以數萬計生性嚴正人  
敬憚之凡衣履不整者不敢進見鄉里有爭端得友蘭一言卽解人比  
之太邱一門孝友內外無間尤篤宗誼修祠堂敘譜牒合族帖如著有  
四書淺說指南存於家子一恕修能傳家學

陳永修字礪山駱駝店人清增生幼失怙恃家甚貧從張魯峯讀刻苦向  
學衣食不給魯峯嘉其志不取脩金娶妻孫氏勤紡績永修亦學織漸  
能餬口設帳授徒誨人不倦遠近延聘尋以府案首遊泮二子指南薰  
南孫世緝建中均秉其遺教相繼入庠而世緝尤負時名永修嘗謂諸  
子曰天生我材必有用千古大道在人爲又嘗曰爾等只抱朱子家訓  
一本做去便不失爲善人平生教授五十年門徒八百二十人用世者  
不下數十人年七十八卒所作詩文甚富稿藏於家

康馥林字桂巖梅黃村人明崇禎舉人保民後裔邑增生爲文一本先民  
矩矱工試帖詩行草於大令得其神似生平恬靜寡言至於教人恆媿  
媿不倦鄉試屢蹶初不以介於懷也邑東北鄉向稱鄙陋馥林宏獎誘

掖里人始知向學士林至今稱之

危嵩福字伯高慶會長子爲人方正上承庭訓學有根柢人爭師之誨人不倦成就後進頗多性嗜酒與李蓬山爲詩酒莫逆每相遇必唱和痛飲流連深夜然家教甚嚴飲時兩子輪流侍立無敢稍懈夜深偶或假寢筭無算蓬山恐累其子過門不敢入嵩福或會飲友家兩子必於門內俟之歸時敲門應聲卽開稍遲必痛責有謂其過嚴者嵩福喟然曰惟嚴而後有成寬則流弊多矣吾家所以無悖逆子弟不見棄於鄉人者賴有此耳何敢壞先人家法況子弟多中材可成亦可敗甯嚴勿縱庶乎有豸故其子仁圃品學俱優蓋得力於庭訓深矣

樊屏周平昌關人幼聰穎絕倫過目成誦屬文不加竄點作賦不用詩韻工詩歌善詞曲尤工音律幼時同學完婚與賀好事者請其作洞房賦揮毫立就描寫盡致座客閨堂贊賞各塾傳抄人爭誦之未冠入邑庠同治丁卯科誤中副車未幾物故人咸以才子無壽深爲扼腕

李祥元字蓬山城內人家貧嗜讀文字冠絕一時以運途偃蹇久不得志於科名僅以歲貢終素性狷介厭世俗榮利敝衣糲食處之晏如也朋友有餽贈者卻弗受工詩善畫草書尤擅專長人爭寶之嘗從邑先進

郭尊香遊曾贈以詩云親情快聽好鄉評畫手詩才兩絕清滿徑蓬蒿  
扁仲蔚隔牆燈火照匡衡散關軍過防牛頓申伯臺荒任虎行可識廣  
平三北後梅花一賦動公卿同里陳孝廉連川於人不輕許可嘗與友  
人書謂自思半生作人不及蓬山之純卽此可以見其梗概矣沒後詩  
散佚不可多得李問樵交遊詩鈔中僅存二十六首七言如花愁夜兩  
紅初瘦草醉春風綠正酣五言如閉門因病足得句卽開顏皆雋永不  
落迂腐又除夕雜咏有云坐待弟歸閒撥火膽瓶香供古梅花又云最  
真祇有兒時樂親與重闌看酒爐儼然一幅孝友圖真情躍於紙上此  
種佳句胥從性情中流露豈凡庸拉雜成詩所能望其肩背哉弟祐元  
字萊山邑附生性孤介雖斷炊未嘗向人言之爲文有奇氣以一衿終  
人多惜之

危麟趾字仁圃恩貢生嵩福長子品端學粹士林欽仰年甫三十從遊者  
日衆循循善誘羣推教育大家成就後進頗多以洋河陳氏子弟爲最  
其家教謹守先人成法毋敢稍縱子尙志官郵部主事尙忠食廩餼恂  
恂守禮學業俱精其家教然也著有藝林佳製八種集蓼山房詩鈔待  
梓

王焜字筱岡金印曾孫也人品清雋文辭風華咸以遠大期之弱冠入邑庠屢膺鄉薦不售灰心進取以詩自娛著有醉紅軒詩草醫學尤精

李國光字賓于家西雙河光緒乙酉舉人少負文名游學大梁與艾子光席崇光稱信陽三光夙有治世才居鄉時片言解紛兩造悅服遠近化之無訟端性耿介有暮夜投金者斥絕之且暴於衆以杜紳士包攬受賄之風屢試春官不第以大挑選授陝州教諭到任首教士子敦倫紀先品行而後文藝士風大振數年卒櫬還陝州士民多有挽紼而泣者子蘭儕扶柩徒行千里人稱其孝從孫鍾毓光緒辛卯舉人爲人質樸讀書苦自刻矚目不窺園任伊陽南陽教官有賢聲

嚴作礪號渠臣城南三里店人幼失怙而貧嗜學及冠入泮以筆耕自給性和藹循循善誘凡來學者無愚柔明強必先教以爲人之道勸懃懇懇若父兄之於子弟以故登其門者成就多卽不通顯皆能恪守師訓不失爲鄉里善人民國紀元年五十九以衰病不復設科又二年無疾卒於家門弟聞訃皆哭失聲受業龍敏修劉景向劉怡宣等四十餘人爲建德教碑於澗河南岸上

胡承休字子欽當谷人邑附生家赤貧其父亦在庠藉硯田謀生子欽幼

讀極穎悟父以貧故令易讀而耕承休奉命維謹然心好學不能釋常以書自隨得暇卽諷誦不輟每負擔入市輒手書置擔上且行且讀父執見之勸仍就塾攻苦數年遂入泮願以數奇不得一第其爲學主靜而敬體貌端重伏案終日無畷側之容手足各有定處教人務嚴正而和易近人無疾言遽色故人樂與之遊舉人劉振鐸陳鳴清皆其高弟入民國後學術改革士習大變而聞風興起之徒閥閱高門之舊造廬請業執經問字者踵仍相接承休各因其材納之軌範遠近皆尊之曰胡先生生平不妄取筆耕外不受人一錢崖岸高峻凡徑竇之行齷齪之事一切屏斥之無敢相干者晚年旁及岐黃命理堪輿占驗諸學無不嫻熟而於命理尤精光緒末袁項城入軍機承休謂人曰項城此運不佳人曰項城當國中外皆相賀子獨謂其不佳何也承休曰命本不易言余據理推恐其蹈不測耳人曰此恐未必驗承休曰幸不驗方佳但過此尙有五年好運亦非人所敢言也然數亦盡於此矣後果皆驗壽八十一無疾卒

曹泰占字筱軒曹家花園人歲貢生稟賦穎異家貧依其戚沈氏讀書劬學至廢寢食制載胎息天崇出經入史未冠卽入泮食餼文名噪一時



每屆科歲考試輒不作第二人想歷任宗師皆器重之願命途多蹇鄉試累預堂備不得售丁酉科鄉試與同邑陳善同皆卷分第八房廉官爲皋蘭張虞民大令精藻鑑見兩卷擊節稱賞並置之篋中將登首薦適扁歲過密久漸遺忘至放榜之前數日全榜已定惟首選尙虛各房揆遺虞民憶及前事出兩卷呈之主試善同發解而秦占以額滿見擠自是秦占絕意進取設帳培植後進一時英俊多出其門邑曹氏世多經師如巽林瑞林福林世焯皆以善誘人鳴而秦占以通儒碩學持有清一代之終尤稱教育界之泰斗焉晚年與同志倡議重修縣志四出甄采未及著手編纂病沒所著詩文稿甚多皆散失

嚴家琨字越石邑南當谷人質稟聰慧數歲卽嗜讀異常兒博覽羣書淹貫古今未冠入邑庠旋食廩餼登光緒甲午河南鄉試其爲文挾奇氣筆墨恣肆不可一世戊戌會試房薦未售援例報捐內閣中書國體旣更輒頽然自放不肯就當時羈勒未幾鬱鬱卒

邱樹梓字仰喬邑北邱家窪人光緒癸卯科河南鄉試舉人保送會考分發吏部主事天質穎異擅才華風流倜儻冠絕流輩爲文格老氣蒼詩辭歌賦均所擅長工畫花卉人物書法奇逸自成一家性喜交遊遐邇

名士皆與爲文字交鼎革後漫遊京津奉吉各軍幕中鬱鬱卒著有哀  
曇集俗語句解等書

馬炳詩字楓丞世居游河鎮其父某嘗客正陽有同鄉陳士雅經商其地  
遇寇亂棄其裝千金逃歸乃爲清理璧還之不受謝柄詩幼承家學性  
純孝丁外艱非奉母命不出戶庭讀書背誦於其父木主前如對嚴師  
朝夕奉膳如事生然直至服闋而後己及壯以廩生中式光緒丁酉科  
鄉試見時事日非絕念進取盡心教讀培養後進戊戌偃師潘荔庵大  
令聘充西席兼評閱童試文卷先期多有投贄受業者束入納金鈔其  
中輒原封卻下其人疑見少增其數卻如初自是無敢嘗試者潘固久  
官萌退休志以重金屬柄詩於申西代置田十數區契據皆別署堂名  
而自書密據付潘氏以爲信雖家人弗知也迨潘罷官柄詩舉以授之  
己無私焉柄詩學行篤實行動遵古禮法邑西車雲山仰天窩林壑秀  
美泉石清疎柄詩移家其中耕且讀十餘年自稱車雲山人學者皆尊  
之曰車雲先生云年五十九卒著有車雲吳房學約敬義堂文集吳房  
文抄碎玉軒課草說夢說風訓徒庸言存於家子三人

劉振鐸字德軒八甲村人胎簪族裔也性沈默寡言笑喜讀書善屬文弱

冠入邑庠光緒辛卯舉於鄉詩文獨得妙諦人爭師之一時舉貢廩秀  
出其門者多至數十遠近負笈從遊者日益衆辛丑設帳青蓮庵僧寮  
爲滿州府試前十占十之七八稱盛事焉歷充豫南書院齋長上蔡書  
院山長年未五十病故士論惜之

危尙志字萱棠麟趾長子品行高潔文藝卓越尤精算術光緒丁亥入泮  
癸卯領鄉薦庚戌保送會考錄用郵部主事平生精於岐黃於靈素金  
匱傷寒論均有會心與儒醫舉人戴炳榮廩生姚壽朋附生陳再田相  
切磨雖沈疴危症無不著手成春壬子充唐山路礦學堂監學積勞病  
故年方強仕未竟厥施人皆惜之

黎孫濬字小坡本羅邑人孫濬始入信陽籍爲邑庠生父芸坡同治拔貢  
生入選後相繼丁祖父母父母艱未與朝考賈志以沒家中落孫濬遷  
居赤土村督家人佃田以耕而自設帳授徒邑大族郭曹王黃子弟多  
從之遊成就甚衆其教人勤勤懇懇至老不衰平生品學高尚接人無  
疾言遽色性嗜酒工詩嘗與門人共飲有不善飲者輒笑曰吾能教汝  
以讀何不能教汝以飲也其和羈可親如此年七十七卒著有易經淺  
註十卷以家貧未梓行詩集名借山草堂稿爲族人黎燦然孝廉索去

採入羅邑志乘燦然病故稿遺失

饒慶榮字文樓城內人邑增生秉性剛直制行端方與貢生危嵩福李祥元附生喻心地諸名士爲莫逆交慶榮稽古功深善屬文下筆雅擅大家風度每一藝出人爭傳誦秋闈累薦不售自以文章憎命遂不復求聞達於名場專以培植後進爲己任一時英俊多出其門如中書郭家珪劉子榮舉人郭之俊戴炳榮朱啓耀李煦炳王永暄王煦萬世清副榜王熙皆其及門弟子至預貢選列鄉國學者尤指不勝屈允稱教育大家晚年名益高陳州貳守聘教其子卒於周家口官廨著有衣鉢文藝千餘篇抱膝閒吟詩數卷皆散佚

潘岱鍾字魯青城內人清增生性傲岸尙氣節工書法早年學二王中年後摹漢魏家藏碑帖數百種城鄉墓碑匾額多出其手臨池一揮得者爭寶之雖重幣延請不惜也性好吟詠與黃潛滄交莫逆嘗過其館與之唱和得詩二百首爲親書各體訂成冊付潛滄謀壽之梨棗晚年家益窘以鬻字糊口年七十二鬱鬱卒邑舉人董錫廣爲之傳略云賣文賣字通都巨埠漸成公開之營業筆單潤例觸目皆是了不爲奇矧窮促抑鬱如潘君者耶君以七十老翁無負郭之田立錫之士而家口繁

纍長年累月仰君以食脫非以其所有易其所無溷可立待今人乃於其鬻字之索值也而少之於求字者之靳其值也置不以論抑何待君薄而待人厚不諒與不公均焉矣古語云貧視其所不爲潘君固有所不爲者吾心敬之故爲書其厓略如此可想見其制行之高

胡壽榮字鶴荃先世居五里店後移寓城內幼失怙依母成人家貧苦讀童試以冠軍入泮歲試優行生平居設帳授徒科舉制廢畢業師範學校橐筆南遊以詩書畫名噪江漢士大夫多從之遊書法精隸篆美國美術賽會經農商部審定頒給獎狀充水警廳書記官夙重氣節不善迎合以是益窘後鬻書漢市賈志沒著有鶴草堂詩抄八册分汝南宛南漢南荆南四集身後蕭條全稿遺失平生事母孝所傳有活佛歌一篇錄入文徵

陳世縉字瑞五駱駝店人天姿聰穎七歲能文鄉先生均以遠到才器之十五童試列前茅年二十以冠軍入庠旋以歲試第一食廩餼南汝光道朱壽鏞建豫南書院校士特獎之五入秋闈不售退而設帳授徒與邑人舉人杜紹甫馬楓丞貢生陳恕修胞叔貢生篤丞設一文會於車雲山徜徉詩酒年三十六卒著有雲山百尺樓詩文集稿遺兵匪散失

張葆荃字瘦萸別號淮南第一癡舉人培中次子工詩能文與弟葆華齊名書畫亦佳與其詩並稱三絕年二十九始入庠居常鬱鬱性沈靜嗜吟詠積稿三十餘冊至老吟情益豪邁多經世語常與黃潛滄王上曦寓書唱和年六十一卒稿皆散佚

劉霞軒東雙河人邑附生幼失怙恃受撫於叔父母以孝謹聞年十二從族伯珠泉學勤奮自勵始操觚爲八比文卒歲卽能成篇造詣日進見者贊爲雋才及冠入庠遭訟累心志日墮兩試棘闈報罷絕意仕進設帳授徒二十年勤懇善誘成就極多及門爲立德教碑以識不忘素性剛直守正不阿鄉曲雀鼠之爭得其一言立解清季籌辦城鄉自治被選南鎮議長時軍事徵役火急妨農業羣紳皆箝口霞軒爲請於當道豁除之京漢鐵路購地遷墳例發民價胥歸豪猾侵蝕霞軒主持公道令實利及民地方應興應革次第畢舉有假事以報睚眦怨者必剖白之不予株連其地痞及慣匪累民者分別送官法辦無倖免輿論翕然歸之共和告成乃閉門養靜終日治圃蒔菊不聞外事壯時雙目曾失明服藥數百劑始痊後又再發亦旋愈八旬後身體康健猶能閱報紙寫楷書亦德行涵養有以致之也以民國二十三年九月卒壽八十四

歲子開泗宰上蔡有聲

武功

清陳應元字玉亭世居城東五里店生而英偉材武過人聲音朗若洪鐘  
父聿修以國家方用兵西陲令應元棄儒學劍弱冠入武庠性伉爽重  
然諾疏財仗義急人之難雖萬金不卹俠聲聞四方豪傑之士爭歸之  
應元解衣推食悉副其所期而去以是家中落乾隆之季邑有大劫案  
讎家某將以莫須有構大獄陷應元應元聞而憤極怒馬馳去讎家要  
擊於隘斷馬尾而逸遂北至畿輔投身行間充提督某材官極蒙優遇  
不兩年擢任天津衛守備歷調鎮江廬江沔陽等衛積勞陞任袁州岳  
州等衛正衛官調陝西綏德營都司道光甲午秋乞假歸應元雖武人  
賢聲噪一時所至輒爲上峯所倚重一時名公鉅卿文人學士皆聞風  
通款洽如黎襄勤公李芝齡祝衡溪兩侍郎其較著者也在鎮江任最  
久嘉慶初教匪猖獗川陝楚豫等省用兵軍需孔亟南北轉漕倚鎮江  
爲樞紐應元督率丁役調度舟划源源接濟又疏濬福興濟甯等處河  
工以通運道故兵興五年而餉不匱卒能削平教匪應元與有力焉衛  
書虧漕查抄鬻女以償應元捐廉贖作義女攜歸爲擇配不肯去竟守  
貞以終焉在袁州任有領運千總某押運赴京行船失慎焚米淨盡應



元爲措資代繳初抵岳州任時軍民讎訟案牘山積應元竟數日之力  
悉予判結屯政肅然糧道某請准增加運銀應元親赴鄉催收見民間  
艱窘至有鬻妻子者歎曰爲民父母忍令民之妻子離散乎歸卽上書  
撫院力爭得仍舊例民慶更生爲之勒石頌德云致仕年已六十有九  
精神尙健於宅側闢一園蒔花種竹徜徉其中頤養天年時或招尋故  
舊把酒談心凡戚里無力嫁娶則量力飲助多置義櫬以濟死不能殮  
者每歲年關遣親信數人密查極寒之戶暗納錢鈔於其門內勿令知  
時讎家已死其子窶甚召而厚卹之曰非汝父予焉得至此又買某姓  
宅已十年其子糾衆拆樓板以相脅應元慨然以重金畀之而去曰彼  
誠貧不得已也奚足較聞者多其義道光癸卯卒贈武翼將軍壽古稀  
又九葬於灑河南獅子山自築壽壙樹石挽名人爲銘迄今頗稱形勝  
焉

張天篤字因培梅黃村張家上樓人武庠生清道光末由團練隨向榮擊  
洪秀全任荊州游擊升均州參將髮匪數萬來犯圍城二十餘日餉絀  
兵單勢頗岌岌天篤振臂一呼紳民踴躍輸助爭先迎敵背城一戰梟  
某渠魁圍始解論功升宜昌鎮總兵僞翼王石達開率師五萬攻城激

戰兼旬敵不得逞遁去旋調署襄陽提督因勞致疾卒於防次追贈定國將軍天篤治軍嚴整所駐之處人民安堵七嚙不驚卒之日遠近爲之慟哭荆宜一帶爲建定國將軍德政碑數十處至今歌頌不忘

馮聖傳字孔門生而穎異有膽略性耿介不妄取與年二十四補弟子員咸豐中辦團練剿匪於方園長臺新店龍井王營陡溝等處同治三年八月從嵩武軍擊賊於城南三里店敗之十八日與連美擊走圍攻州城之賊十九日與葛承霖敗賊於譚家河追出武勝關二十二日又與各軍迭敗之於廣水驛長正河大山口石塘等處斬首三百餘級事載豫軍紀略張曜西征調赴新疆至窮八站曜派隊迎之至則待以賓禮鉅細必以就諮後帶捷字十八營調停諸將使各受約束所至有功在新二十七載回回平敘功以知縣分發安徽見賞於臬司孫衣言時六安州知州劉奎光以貪污被控十五案內有車士合一案臬司屢派委查覆不得要領衣言檄聖傳密查奎光恐甚私賂以豫康祥銀票千兩聖傳持票據實呈覆奎光革職孥辦畏罪自盡奎光兄國光時官御史囑託後任撫臬平反前案輿論大譁事上聞部派大員蒞皖覆訊凡袒奎光之撫臬道府州縣各官皆得罪授聖傳廬江縣知縣數年卒年五

重刊信陵縣志卷十六  
十一  
十歲弟星垣勇力過人同治二年從聖傳剿匪於申北二河販張家竹林以衆寡不敵被執罵賊死豫撫張之萬奏請照陣亡例賜卹賞嗣子順樾世襲雲騎尉後樾入武庠

吳鳳山兩河口人爲多隆阿部下饒將識見宏深謀慮周詳且善詞令常與曾胡諸帥有所接洽言論悉中軍機諸帥偉之每授以重要方略從無僨事髮賊三次陷武昌已成犄角之勢漢陽不下武昌不能合圍一日鳳山與副將藍斯明率隊力攻已近城下方豎雲梯藍卽奮勇先登鳳山見城上數賊扛一條石向藍擲下恐藍受傷急揮一足踢藍於濠邊得免而石角適傷鳳山腦血流如注藍急罷攻扶鳳山歸臥病月餘次日藍拔漢陽鳳山亦因得陞階其時營中同志十五人凡遇大敵人莫敢撓者鳳山等赴之無不摧一夜十五人會飲大醉乘輿踏賊營二十座賊黑夜不辨多寡自相踐踏死傷無算累功官至副將賊平返里囊橐蕭然一歲三遭回祿貧無立錐知交爲釀微資使營商未幾虧折淨盡藍斯明任信陽協鎮時聞而憐之延至署資以衣食終身

王顯曾庠名鳳翔字鳴岡童時卽以能文名及冠補博士弟子員秉性正直處事果決不慕榮利不畏強豪當咸豐初洪楊發難大江南北無堅

城顯曾忿王師無功隱有請纓之志以父敬紹春秋已高不欲遠離武漢既陷信陽戒嚴敬紹奉檄籌辦團防命顯曾任團長而自總其成倡捐鉅款并勸紳富量助爲開辦費顯曾悉心籌畫旬日之間旌旗金鼓火藥刀戈燦然大備復聚精鐵數萬舫鑄大小礮位分佈五門又建議籌收鹽商票捐爲團勇餉源不擾民不加賦而得款甚鉅在軍號令嚴明信賞必罰親督操練陰晴寒暑弗肯少懈兵備使者稱爲學兼文武有勇有謀保獎六品職銜俄賊入境撲攻城垣顯曾會同官紳督率團勇登陴拒守賊踞南關新街高埠俯瞰城中矢石俱下勢危甚顯曾募敢死士昏夜縋城潛入賊營焚其棚帳賊驚潰宵遁城得無恙顯曾以操勞過度中暑病故年僅三十有二地方人深痛惜之

宋朗山八甲村磨盤寨人從僧親王征擒匪屢立戰功累官總兵王之陣亡於曹州也朗山殉之事聞優詔議卹賞雲騎尉世職追贈提督軍門配享僧王祠

喻正祥字禎甫衛南村喻家營田家子少孤貧無行負債匿叔家博徒環索踰垣亡去投多隆阿部下累功至副將從左宗棠征新疆回匪屢立奇勳迭陞至提督軍門移征青海所向有功賞穿黃馬褂雙眼花翎剛

勇巴國魯勇號留鎮青海被刺死敘雲騎尉世職初正祥去時家遺一妻無養寄食母家母死無依祝髮爲尼光緒初正祥遣人迎之其妻以年老不願還俗辭不去正祥竟無嗣世蔭亦無承襲者

聶玉林字岷山二十里河人少貧業農咸豐六年大饑逃湖北從雷軍門正春剿髮匪每戰輒告奮勇以功迭保官至副將隨左宗棠西征回匪屢建奇功陞總兵加提督銜授邠州協鎮因忤權貴解組還鄉購田數十畝贍家旋入川省投唐軍門授衛隊營官未幾病故

田得勝原名鴻章東七里棚老虎冲人少有膽識膂力過人咸豐初入楚軍奮勇殺賊累功官至副將從左文襄征回匪收復城池屢奏奇功陞總兵加提督銜剛勇巴圖魯勇號授十營統領新疆肅清請假回籍修墓道經甘省夜宿甘泉寺被馬賊劫殺財物掠盡妻閻氏控縣案未破而資斧罄進退維谷邠州協同鄉聶玉林聞而憐之助資扶柩歸窆閻氏無子無力上訴罪人迄未之得

楊正才城內人業硝坊咸豐時投荆字營剿髮匪立功保獎副將克復武昌冒險登城陞總兵充五營統領善撫士卒人皆效命收復九江安慶與有力焉加提督銜授潼關協鎮解甲歸來依然兩袖清風僅破屋數

椽而已暮年乏嗣姪輩熬確贍養以終

許萬榜字虎臣住城內髮捻之亂創辦鄉團勦匪有功南汝光道蒯賀葆保授汝九屬團練督辦陞豫勝軍分統調嵩武軍後路督辦從征回匪累功官至鎮威將軍記名總鎮提督銜曾任新疆哈密協鎮旋以總兵留豫任用

安魁三字敬亭城內人家寒微有膽略髮匪亂投荆字營効力結納亡命善規寨以寡勝衆三年累功官至副將充荆字營統領調豫陝勦匪道經信陽觀者塞途魁三由三里店下馬步行沿門拜客衣錦還鄉人以爲榮後轉戰豫陝甘肅清捻回等匪陞總兵提督銜授荆紫關協鎮許世忠字少臣鎮威將軍萬榜子也性勇敢善戰入嵩武軍効力勦匪轉戰甘新等省肅清回匪累官至建威將軍記名總兵留豫任用曾署撫標游擊授考城參將其子曦軍功保獎千總曾充湖北襄陽提標馬隊營官

王崇善清河村王家岡人明鎮國將軍延世裔孫少孤貧同治時爲人牧牛於魯家河失犢畏責逃皖北投淮軍爲王軍門牧馬軍門見有異相詰籍貫以實告又問信陽有明將軍王延世者汝知之否答曰標下八

世祖也軍門徐曰吾原亦係信陽籍七世祖與延世公嫡堂兄弟因祖  
冤被議避禍山左流寓至今予年半百似續無人既係宗家以世次計  
之予長汝一輩擬納汝爲嗣可乎崇善卽拜呼稱父登堂拜母乃日習  
騎射夜攻文字不數年居然文武全才委以軍務調度有方勦匪出力  
累獎官至游擊軍門陣亡崇善承世蔭晉階副將升分統從張曜征回  
匪屢奏膚功陞總兵提督銜曾任甯夏總兵旋調直隸李鴻章見而器  
之授拱衛軍分統庚子八國聯軍犯京津崇善捍衛京師力戰死之  
王占奎字子清小字嗣旺聚商坊人少孤貧寄食姑家習商不成亡去投  
安武軍從征捻回等匪奮勇殺賊積功官至副將充三營分統甲午調  
奉天中東之戰與焉和議成調防天津直督榮祿愛其才薦陞總兵提  
督銜奮勇巴圖魯勇號統領馬隊五營鎮保定庚子八國聯軍陷京津  
進犯保定占奎抗戰力竭陣亡

謝子靈以字行五里店人光緒季年兩湖張督之洞創辦陸軍投身行間  
挑入湖北陸軍特別小學畢業派充排長辛亥起義子靈與有力焉編  
練革命軍推充旅長扼守漢口清軍來攻子靈率隊赴援鏖戰於劉家  
廟傷亡甚衆子靈不少郤中礮陣亡

耆壽

郭觀相明嘉靖時人年八十九清郭應義年八十一郭維寧年九十郭維垣年八十一郭剛年八十二郭傳年八十一郭積瑛年八十六郭天財年八十三郭世法年八十一郭懋年八十四郭榜年八十一郭相年八十郭家選年八十九郭家宜年八十一郭之純年八十郭之恆年八十一歐陽獻輝字曉峯康熙時附生建德歐陽先祠年八十四歐陽舒和字靜齋乾隆時人年八十四

郝廷儒大猷次子廩生年九十郝爽林大猷孫年八十郝望林年八十四

嚴永康康熙時嚴家畝人年八十嚴永秀一名宗堯年八十九五世同堂子六孫十玄孫曾孫四十六嚴佐愷年八十一嚴佐善年八十四嚴兆麟恩貢安徽候

補直判年八十五嚴瑞麟增生年八十五二人同時入伴同時重遊泮水

李正隆乾隆時人年八十一妻劉氏年八十二白首齊眉子孫蕃衍

黃積月赤土村人有義行年八十二其父永模亦有義行享年大年黃學海赤土村人年

九十四無疾卒

易鳳鳴易家塋人生於乾隆己丑年卒於咸豐元年壽八十三歲

易鳳岐易家塋人生於乾隆乙亥年卒於咸豐四年壽八十四歲



黃在田蕭王村人現年九十歲

五代同堂

尹兆瑞洋河人享壽九十五歲其弟兆洛壽八十五歲弟兆棣壽八十五歲兆棣有義氣重德行光緒三年襄辦地方振務不遺餘力撫養姪樂耕樂年姪孫守銘俱有恩人稱頌之

尹樂儒洋河人壽八十歲性廉正爲地方紳董二十餘年人無間言

涂杰字光表北城五舉牌樓人性慷慨好行善事享壽八十三歲道光十八年卒

涂齊洛字龍山杰之姪曾孫廩膳生性古樸善誘人享壽八十六歲

周培旺字盛之西雙河人性孝友教子有方享壽八十二歲光緒中卒

祝道芝拔貢齡九之曾孫年八十八子孫衆多

王永成城內人現年九十二弟永康現年八十六

喻法福當谷村人有五子力田以養親年九十

杜國喜五里店人年九十二歲

魏學純五里店人年八十六歲

陳寶華字礪臣五里店人性孝友治家嚴肅平生多義行年八十二歲

李正田當谷村人年八十五歲

胡上林柳林人年九十一歲

李金來年八十四歲

李偉城內人附生大存之父年八十三歲

王萬里黃家院人年八十一歲

王壽昌城內人年八十二歲

熊元瑞當谷村人年八十三歲

杜永選當谷村人

年六十始生子

年九十歲

李光淮當谷村人年八十五歲

嚴修爵字貴良和孝鄉人現年八十四歲

周翰臣字敬亭業農年八十歲

張琴嘉慶時農人也世居北關外之望城崗子四孫十六卒年一百零四

歲曾玄四十餘人

鍾連科乾隆時出山店人年八十六歲

鍾靈芝道光時人年八十一歲

李可才嘉慶時人年八十七歲

李可德嘉慶時人年八十一歲

劉俊信八甲村人卒道光二十五年壽八十二歲欽賜耆民

劉彥銑清河村人卒光緒二年壽八十五歲欽賜耆民

劉彥元清河村太學生卒光緒十九年壽八十三歲

劉顯智八甲村人卒光緒二十八年壽八十四歲

龔大發南關回教籍有隱德享壽八十八歲妻趙氏壽八十二歲子二殿元殿義遵大發命分居各養父母父母晚均得瘋癱疾殿義養其父子開科服勞十有八年殿元事其母子開勝服勞十有二年兩代稱孝人皆謂龔氏有賢子孫殿元亦享壽八十八歲民團軍師長張振江贈五世同堂匾額

周原瑞字蓮岑周家窪歲貢生平篤內行道德高尚現年八十七歲尙健步子孫曾玄百餘人

周永字鶴齡西雙河人乾隆時增生品行端方不邪視不妄語不入茶酒肆盛德感人鄉里敬憚之衣冠不正者不敢見也享壽八十有五

馮雲漢馮羅店人乾隆時廩生心性和平道德高尚年八十時欽賜銜命杖朝匾額又閱五年而終匾現懸其後裔馮獻之家

楊春山秀山西雙河人兄弟均爲人正直耕讀爲業親仁善鄰家庭清潔

老幼悉率規矩春山年八十三秀山年八十一歲

姚起鳳字鳴岐家鎮遠坊生於康熙五十年享壽八十有六歲

余鳳山原名鳳林城內人性豪爽有膽氣咸同間以剿匪功獎守備享壽八十九民國十五年正月卒

蔡際昌字旭峯城內人爲人溫厚和平生於道光十八年享壽八十一

朱兆祥衛北村洪河人生於道光二十九年享壽八十四歲

譚植衛北村譚家沖人後城居生於道光二十五年享壽八十九歲


甘志友字益三家北關外性狷介義命自安閉戶讀書誨人不倦現年八十八歲

葉溥沾字惠泉住動業坊性孝友心和平雍容儒雅有長者風現年八十七歲

趙梓濱字仙浦安貧守分廉介自持閉戶授徒孳孳不倦卒年八十一歲

周德榮住澄清坊小字八一以生時其祖母八十一也現年八十四歲

楊魁城內人住試院街現年八十二歲



藝術

李亦復爲城內子遣之民明末張獻忠陷信陽屠戮殆盡李氏僅一嬰兒名延申賴僕女秋菊竊負逃匿山中得免單傳三世亦復其嫡孫也幼聰穎寫作俱佳人爭師之成就後學頗多與選康熙季年拔貢書宗山陰勁挺有姿人皆寶之汝陽東街關聖廟前戲樓匾額我見古人四字飄逸有致相傳爲呂仙書實亦復幼年所作也晚年草書尤佳圓轉自如大有龍飛鳳舞之概亦復庭訓綦嚴子一有聲庠序早逝孫四同案入學厥後詩書繼世十代青衿至清末如廩生龍章恩貢化南舉人煦炳附生煦觀皆其後裔也

鍾璣爲吾申乾隆時書法名家法宗襄陽以行書鳴一時書家陳敬紹陳以敬劉海門郭尊香多宗之申陽書院君子亭東側有申陽第一井碑碣爲璣手澤其書法之妙已略見一斑矣

吳業鼎字銘九西北鄉趙莊人善畫魚極活潑猿與鶴亦有超妙之趣乾隆時天下承平高宗怡情詩畫召善畫者試之優等授官銘九畫稱旨授江西德清縣知縣所收名人字畫暨精品磁器頗多後被盜損失無算迄今所保存者亦寥寥耳聞陳甘圃家藏橫幅畫魚七尾劉某藏一

直幅畫魚三頭此外未嘗數觀

朱燕謀字詒軒城內人善繪工筆人物花卉俱極生動人爭寶之論者以爲詒軒之畫雖不能與鐵溪銘九齊名或可步其後程云

啞僧姓楊氏名定山咸豐末方七歲曾讀書半年因家貧爲人牧跨牛被跌而啞遂剃度於朝陽庵雙林寺空凡長老見其畫而異之命從朱燕謀學久之青出于藍山水人物花卉俱佳並能作真草隸篆人豔稱之及冠漸能語不甚明瞭與人筆談洋洋滿紙文字頗通且多見到語暇則枯坐禪房不與羣僧伍曾化米施振受具足戒三十八歲圓寂其畫流傳亦不多

曹岫林字筱山貢生馮家莊人移居城內道門口善書爲南汝光道傳壽形所器重書宗顏真卿惜不多覩惟見道署試院隍廟三匾額道署德治軍心酷似顏家廟魄力雄厚以古拙勝試院庇人萬度神似爭座位筆可屈鐵以蒼勁勝隍廟靈應故妙又象多寶塔筆力堅卓以挺拔勝字體雖大不爲空闊所震攝是能大字如小字也清代信陽書家數十或宗山陰或希襄陽或學渤海各有所長惟岫正草俱宗平原樸茂沈雄爲空前絕後之作於書家獨樹一幟性至孝老而彌篤重陽節臨終

絕命詞有云一去無他礙三回若有思大數今已定老母痛何爲孝思純篤終始如一可以想見傳觀察聞而悼惜親書輓聯云三載論儒修素行如君不愧一州稱善士五言留別恨白髮有母那堪九日赴遊仙卽此足徵品端學粹爲當道所推重不獨以善書傳也

方應時明萬曆中歲貢精岐黃有神醫之稱所著有方書金鏡與高鑑神畫何大復神童並稱三神

黃信道字晦庵五里店人邑附生家赤貧從同里岳州衛正衛官陳應元充記室陳器重之謂曰子心地慈祥志在濟世曷不學醫道乎信道欣諾之陳爲購靈樞素問難經脈訣傷寒金匱等資之歸信道閉門研討三年出診應手無不愈者聲譽謀一時著有醫方經驗四卷爲門人盧姓者取去不肯示人稿遂佚子醇度字雅宣傳其學兼精外科求診者不遠千里長孫慎修字福堂次孫敬修字暇純皆名醫曾孫啓萱啓英均能世其業

戴日暄字秋陽遼谷之後住城內歲貢生性孤高邃於醫以禮求者無不應凡應者無不效苟不以禮雖權貴視之蔑如也南汝光道傳青餘病劇聞名禮而請之日暄具衣冠往下輿時見無人出迎立命與人肩之



返署中人急請故日暄曰我衣冠來者尊長官也長官病不能責其出  
迎豈並子姪而無之是慢醫也如之何弗去傅長公子急衣冠出日暄  
始下輿診之一藥而愈

曹宴林字曉園馮河村人爲人孝友品行端方精醫理著有醫學指南  
楊潤澤字時溪黃龍寺人湖北隨州祝家店分州工繪事學宋元人山水  
花卉得其神似指墨尤佳人多寶之

郭閑字心琴青石橋人正直聰穎善六壬課時髮捻鴉獶或有風雲象徵  
鴉驚雀噪卽袖占一課知有無匪來或來自某方無不應驗俾鄉人知  
趨避之方無虛驚之擾無不感而頌焉嘗捐資修駝嶺暨青石橋等  
寨堡善行甚多

楊光有當谷農家窶人子生有宿慧幼爲人牧牛入蒙塾三月罷去比長

學道科

卽爲人做齋萬  
亡之伏居道

不成借人醫書讀之漸得門徑遂開一小藥肆

爲人診病輒愈以體弱不能出門就家施診來者日益多名噪遠邇門  
外常有異方人車轍馬迹焉其術愈研愈精講豚理審症候有非時醫  
所能辦者藥材炮製工而取利薄每逢時症發生終日應接不暇倦極  
則僵臥室中閉門以謝來者沿以爲例爲人天性長厚類有道者壯歲

租田而耕衣食苦不給自業醫遂積資豐厚置田數十畝呼其胞姪來同居與子共享之能記三生事自謂前身爲山西某縣廩生有子女若干人嘗欲赴其處探視爲人所阻而止又嘗謂每夜夢讀書作文寤時輒忘殆亦生有自來者與

陳再田洋河店人家貧喜讀書善屬文弱冠入邑庠不樂進取悉心岐黃與主事危尙志孝廉戴炳榮廩生姚壽朋諸儒醫相切磨獨能屏去名利博覽醫書從內經靈素大處落脈卒參透仲景奧旨叔和脈訣診斷尋源起死回生鄉里賴以全活者甚衆惟傲骨磷磷不附權貴鄙薄富豪常有車馬恭迎而不應者禮貌稍弛拂袖便去醫不禦貧敝衣糲食晏如也晚年發明醫理著有傷寒闡微金匱要旨稿多散軼

楊繼恩字子述黃龍寺人天棟曾孫性靈敏品清高積學未售援例選授雲南藩經歷有政聲入民國解組歸於三角山開辦茶社地方蒙其利平生精通醫理醫術濟世存活者衆診斷依據內經施治晉宗仲景方藥簡單而回春頗速一時稱名醫焉

戴炳榮字宣圃秋陽之孫也性情孤峭有乃祖風文學醫學俱有根柢己卯中副榜己丑領鄉薦以府經分發廣西署武緣縣古零分司民國起

義歸來不名一錢行醫北京極有聲譽晚年回籍懸壺活人無算當道耳其名常敦請而優禮焉

王永欽字子謨申陽儒醫也少孤承母訓性聰穎喜讀書弱冠補博士弟子員屢赴秋闈不售因事母至孝遂淡進取躬親定省數十年如一日然心氣和平天資靈敏凡琴棋書畫星相醫卜等學皆通惟醫與畫尤深邃畫得大癡翁之神髓醫悟張仲景之妙諦求畫者應接不暇求醫者接踵於門兩者不暇兼顧晚年捨畫就醫遠近爭迎著手成春活人無算新將軍雲鶚贈功同良相匾額著有藥性徵實論二卷梓行於世輯醫俗格言警惕人心足見其醫學不獨醫人兼醫世也

郭家瑜邑增生住青石橋性誠實靈敏研究星象天文頗有心得善識星宿分野寫度休咎光緒庚子夜見熒惑入南斗曰必主天子下殿走是年拳匪肇亂八國聯軍犯京師帝后果西狩又見某星墜謂朝廷必損柱臣未幾李鴻章果卒觀象推步有占必驗諸如此類洵異人也

郭瑞庭青石橋人精醫術與戴日暄姚敬之齊名但彼各有所長或效或不效而瑞庭則中正和平著手即能生春先緒初瘟疫流行羣醫束手瑞庭診之莫不即愈全活甚衆子臧九佐五能世其業

董五倫吳家鎮人少時常夢一異人授以拳術習之遂精數年後一頭陀來訪與之校藝驚曰此吾少林嫡派好自爲之遂去自是嘗往來南北爲商賈捍護行李當時有賈家捍子董家拳之謠賈平昌關人以善使捍子著名故云皆清康熙時人



流寓

後漢周盤字堅伯汝南安成人

在州東北

嘗隱居義陽之賢首山後漢

書傳云盤少遊京師學古文尙書洪範五行左氏傳好禮有行非典謨

不言諸儒宗之居貧養母儉薄不充嘗誦詩至汝墳之卒章慨然而歎

按韓詩註王室如燬章云以王室政教如烈火矣猶

之舉和帝初拜謁者除任城長遷陽夏重合令頻列三城皆有惠政後

思母棄官還鄉里及母沒哀至幾於毀滅服終遂廬於塚側教授門徒

常千人公府三辟皆以有道特徵盤語友人曰昔方回與父嗇神養和

不以榮利滑其生術吾親已沒矣從物何爲遂不應建光元年年七十

三歲朝會集諸生謀論終日因令其二子曰吾日者夢見先師東里先

生與我講於陰堂之奧旣而長歎豈吾齒之盡乎若命終之日桐棺足

以周身外椁足以周棺斂形懸對濯衣幅巾編二尺四寸簡寫堯典一

篇並刀筆各一以置棺前示不忘聖道其月望日無病忽終學者以爲

知命焉

清童二樹浙人留信陽久工詩善書惟畫梅爲最著其畫梅蕊也先點以

簪後以淡墨烘之爲畫家別開法門且用筆圓潤能畫梅魂枝幹蒼勁

頗具占魁之概

龔際會湖北人依畫糊口流寓信陽甚久故世族大家多有手澤寫意人物獨擅專長其筆力之雄點晴之妙爲人所不及近時江浙極重之價增倍蓰矣

黃直湖北庠生寓朱晴峯家最久書畫俱佳頗有書卷氣善畫山水係南派尙有名家氣概間繪松鹿亦極蒼古流傳不多人爭寶之

朱子燮江蘇寶應人朱中丞曼伯之姪遊幕道署流寓信陽十數載性儒雅工詩善填詞尤善畫花卉翎毛筆意超脫人爭寶之聞劉鏡珊薛溫伯暨城隍廟各藏數幅他處不多見也

丁少山山東日照人分巡吳仲貽刊其父輯攬古錄以校對聘之至信陽流寓數年嗜金石尙考據薄舉子業篆隸真草俱入古人之室大篆極茂密八分尤雄健楹聯頗佳魄力在汀洲米谷之上畫山水純以篆筆出之圓厚不減廉州至山水對聯曾於劉鏡珊潘魯青處見之俱可寶也

鄭鴻謨字圯深福建閩縣人器局恢奇才氣伉爽爲文長於論事下筆不能自休於清代國事變遷政治得失考講尤悉光緒庚子拳匪藉仇教

戕外人清廷惑滿大臣邪說謂匪皆義民其術足以制火器張撻伐廷諭各省撫用之匪益橫秦隴晉豫避亂外人皆走信陽時鴻謨館南汝光道署掌交涉兼參與府州幕事廷諭轉行至三署促宣佈鴻謨持不可因言禦外當視國力力不足用而用術未有不敗者矧保護外人明約公認今顧背約縱匪外人方走集於此此諭出將無噍類是重禍而速寇也朝廷一旦悟前失懲罪人悔何可追道府固疑縱匪之非聞鴻謨言益感動而議者咸謂顯抗朝命罪且不測獨州署刑席胡生議同而知事饒拜颺尤力主鴻謨說三署乃共決計祕廷諭亟辦匪更派丁勇迎護外人導使由鄂至滬放洋還其國其傷重者鴻謨更與胡生協籌救濟傷復而後資之行外人感頌後天津和議定嚴辦首禍凡官吏縱匪陷殺外人皆論罪信陽道府以下皆論功道屬地方並免償款停科之罰莫不賢鴻謨謨鴻謨居幕府逾二十年其臨事善斷皆此類也癸卯中式順天鄉試旋以滬寧鐵路總文案調郵傳部路政司歷充法制科總務科科長升參事民國二年卒於官

畢太昌字覲文羅山人生負異質六歲能文有神童之稱年十二入庠次年食廩餼性倜儻不羣疏放自熹及冠後肄業於汝寧南湖及開封大



梁辦香明道信陵等書院文名噪全省二十後斂才就範舉動率有典則馬三元宋祝三兩宮保聘入毅軍幕府帷幄機要深資臂助光緒癸卯科中式河南鄉試舉人甲辰聯捷成進士改庶吉士游學日本早稻田大學畢業授職檢討加侍講銜河南巡撫寶鋆奏調充河南高等學堂監督民國紀元任河南陳州府知府河南督軍趙倜聘充督署總文案疏通民隱申張軍紀當道深倚重之八年選充參議院議員不隨衆爲從違所主張皆有裨於民生國計十一年歸河南充參事會參事十五年充省署祕書長太昌夙無宦情淡於進取當道屢擬以方面相畀輒力卻不受遇安危大計精密規畫祕其名不欲人知有功則以歸之同僚而已不與操守狷潔不苟取非其道雖萬鍾不顧也宦游數十年囊中不名一錢平生尤篤於交誼朋友有急難輒傾囊相助疾病則爲之調醫藥而謹護持之其學問主實踐不尙空談於羣書無所不讀歐美學說尤能窺其祕要夙善屬文詩賦尤精吐屬風雅詞旨雋永他人百思不能到也家故貧晚年本籍田宅陷於共匪寄居信陽城內疏食飲水處之晏如日與馬風丞陳一軒黃潛滄王上曦曹星珊徜徉車雲賢隱間所至輒有題詠士林傳誦年六十六卒於開封

裴其勳字堯田光山縣人自幼博涉經史能文章好騎馬試劍少長入天津武備學堂六年畢業見習盛軍適甲午中日戰起先後臨陣數十次履危用智屢解重圍並攻克連山關分水嶺各要塞和議成以功敘千總乙未充使日大臣隨員畢業日本陸軍士官學校著留日考察軍政報告書二十四章介裕庚獻之朝清季改革軍制倚爲藍本薦擢守備回國後充開平武備學堂監督注意作育人才一時英俊多出其門尋歷充山東督操營務處提調江西督練處參議江北巡防各營統領訂法制整步武靖匪氛振民困成績爛然以兩江總督薦敘參將光緒之末日俄戰終東事日棘朝廷於吉黑建行省行新法其勳應調至奉主持戎幕規畫宏賅適日軍強越圖們江謀佔間島朝廷命其勳統領陸軍佐副都統辦理間島界務據公約與之力爭日軍不復進逼顧其地毗連韓俄中外僑墾雜居黨匪出沒無常行旅裹足地棄不治實啓戎心其勳首先肅清伏莽次第振興庶政邊人安焉宣統二年卒締結中日界約領土主權均經保全地方愛戴歌頌至今理屬黑頂子一帶與俄接壤俄人潛移界碑於我內地其勳履勘山川形勢根據地理歷史恢復舊疆綿亙二百餘里閱三年以副將用及陛見復簡升協統移鎮

吉林省垣旋以戡平匪氛晉總兵是年秋武漢起義全國解體其動力排黨爭維持秩序輿論翕然民國元年俄人乘時侵略外蒙噶使庫倫倡亂內蒙古哲里木十旗和之其勳奉檄督師往征出郭爾羅斯前旗遂佔哲里木十旗駐在所爲根據地長驅直進剿撫兼施軍行江省大賚廳偵知俄國兵艦駛往蒙邊卽分隊飛追至柴火塚地方截獲之返大賚會地方官驗明艦藏山礮八尊步槍千餘枝質之俄艦艦長接濟叛蒙無可遁飾乃以公法處理之由是叛蒙軍火斷絕來源而國軍所向勢若摧枯札旗鐵旗麻子濠那罕昭後舍利陶什堡等蒙寨次第克復隨建議請停戰召集十旗王公會議宣佈共和真義政府從之不三月而蒙事底定張督錫鑾上其功敘陸軍少將繼又剿辦延吉叛卒肅清長春黨匪南滿交涉解決以東督薦任吉長鎮守使仍兼第一混成旅旅長五年授陸軍中將八年吉督孟恩遠內調其部屬高士儉患失職糾黨聯盟謀抗命慮其勳異己中梗卽矯命調散其部卒促晉省將加害其勳子身挈眷慷慨赴吉垣謁孟痛諫請急受代高黨羣起露刃詰難之其勳議論不爲屈孟卒大悟從其勳言詣長春招邀新任吉督鮑貴卿蒞任會商交接吉事以解貴卿履新首檄兼領高士儉所遺師

長綜理善後其勳固辭兼職並請遣散該師以舒民力辦善後兩月蒞事九年固請辭職書凡四上政府以其勳爲國家宿將在邊宣力有年姑允生入玉門惟以國步方艱正需老成輔弼未許投閒遂任爲將軍府將軍其勳平生尙信義廣交遊事親至孝菽水躬親在軍善馭士卒雖貪夫悍士無不柔馴之如指臂具應變才臨機立斷幼時嘗飲聞其父思祿談身所經中法戰役韜略蓋秉自庭訓云夙愛信陽山水晚年因營置田宅卜居焉性和易居信陽數年士夫皆樂與之遊以民國二十二年卒年七十歲

趙連城號玉璞陝西南鄭縣人同治初匪破城家屬被殺連城逃至皖投軍積功保千總升守備補河南練軍馬隊長官駐防正陽岳城光緒二十四年經南道調駐信陽確山後辭職遂家信陽住南關外唐家衝術性俠義無積蓄茅屋數椽淡泊自適壽七十八終子作霖安貧善繪山水酬以資輒不受不失清白家風云

劉次青陝西涇陽縣廩生民國初充西安警務處衛生科科长官醫院院長後隨陝軍至信陽遂留不去生性孤介取與不苟於岐黃特精邃任紅十字陝會醫生不受勞金寄居陳味琴宅中其鄰人就診者概不索

謝貧者並助以藥費而勢宦家求診者不以禮至不往也治病原本經方應手著奇效邑名醫王子謨極推許之晚年衰弱多疾彌留時味琴爲置衣衾棺槨猶斷斷以累及居停爲憾並乞隙地與其故弟肖堂遺櫬同窆聞者莫不哀之

張志達志遠

張中行子

皆附生湖北應山籍寓大廟畝康熙間在應山辦振有

功地方官以義士聞於朝奉旨以仗義濟人咸感其德著應山縣知縣周祐製匾以鼓樂送其家相傳匾有御璽字係御筆現存其裔孫張延慶家

彭信和湖北麻城人咸豐中寓居西雙河不戲謔不妄語持身謙和妻馬氏業織布和抱布質於鄰集譚家河每帶小斧見道路不平或石子荆棘有礙者輒修理之一日所攜布值數十金被盜人賊俱獲家人縛盜於市擬送官和乃私勸盜改行資而遣之謂家人曰人有盜行可恥孰甚執而暴於衆已足蔽辜從嚴治之不太過乎其忠厚待人如此年八十六其妻八十三同日無疾而終

方外

明德誠和尚姓王氏名星奎字文若別號信柏明左參延世子也生不茹葷六歲能詩善書稍長尤工騎射每抱出塵之志惡聞利祿之語雖爲諸生非所願也明季闖亂辛巳城陷避難武昌船頭送別周維岳詩云同作窮愁客君尙有家還此後如相憶覓予在廬山遂從問石和尚剃度爲僧法名德誠終隱廬山參禪悟道詩集著有拾遺草梓行於世無礙禪師法名明理河內人爲臨濟宗二十六代勤苦精進大衆欽仰住伏牛最久嘗感初祖異徵飛錫到信陽於萬曆初創建朝陽庵歸者雲集又兼理豬塘村海會寺戒律謹嚴宏宣寶筏以萬曆三十七年示寂後塔於庵東五里許其法嗣廣老和尚亦克振宗風焉

寂印字我期光山萬氏生而穎異就傳讀書輒作出塵想長從雙林寺印懷法師剃度受具足戒精冠僂偶循譯講肆諸大經論咸所通解廣長之譽諱於一時遐邇開期演教者爭延致之嘗謂六度波羅蜜檀那居首凡所積衣鉢隨布功德州境若賢隱寺慈氏寺青蓮庵天仙廟觀音堂率資布施莊嚴堂構捨施茶齋晚年往來龍牙寺峻禪師靈山寺百禪師之門深通神契臘六十二坐化是爲臨濟第二十八代法師其徒

嵩泉於康熙十八年奉全身塔於寺東

密音大師號眼聽川北渠縣馬姓母賈氏行四童時出入村塾俛首不妄言里父老呼爲四菩薩年四十遭亂離遇二僧介紹貴州平越府三教寺敏樹和尚遂皈依焉尋出荆襄歷青山山洞對一尊宿問答若針芥之投聞者歎服去抵孝感黃草山丐達聞法師授具足戒龍牙謔和尚雅重之謔和尚名峻明爲臨濟三十三世正宗於吳楚豫六坐道場晚年駐錫賢隱寺著有語錄康熙初邑人劉蓀芳序而行之謔和尚西歸眼聽繼主賢山方丈席開場選佛陶鑄英靈一時遐陬龍象雲集風從著有語錄十卷行世京師濟輪輯入藏經康熙丙子六月坐化壽七十有三塔在賢首山東

穆堂禪師傳達磨正宗曹洞第三十世自衡州岐山仁瑞堂來建幢塔院禪寺取聖教序雙林八水之義改稱雙林道行高尙宇內宗仰所著語錄六卷奇義妙諦策進方來俾膏肓必死之流聞之如飲醍醐紅塵煩惱立地清涼法幢奉爲開山之祖邑歲貢郭宛郊題其像稱爲天下大老云

石慧字福濟雙林寺第三代曹洞宗三十三世法師也麻城人宋程子後

裔徽州程氏子祖某遷楚幼穎悟嗜空宗年十六從應山智耀披剃旋充雙林寺介衡侍者衡曹洞嫡派也許爲法器因受具足戒朝夕咨請頓悟本源衡以雙林後事委之坐方丈者四十六年兼理光山之淨居寺息縣之塔院寺其接引來學總不違曹洞賓主君臣正偏之旨至於講解經論悉取證於五經四子書故所說明白坦易無不可解若乃隨機赴緣則是非齊掃法病同拈真如經剛王寶劍嶄然決截故能使碧巖丹嶂翠竹黃花信手拈來頭頭是道有時寂然無語一棒一喝予奪瞭然奉其旨者罔不悉飲甘露而去南北奉爲龍象雍正十年三月示疾而化撰有石翁濟禪師語錄十二卷板存雙林嗣法祥續塔於雙林之東胡文良公爲之銘王杰書

澄本禪師號廣慈曹洞正宗第三十五世籍雲夢姓方氏幼嗜詩書頗通文學十五齡忽厭煩惱於雙林寺出家學佛師楚峯上人有真覺於乾隆十六年繼彌我和尙充寺主席有徒立庵慶雲喜雲者十餘人衣鉢輻輳四方宗仰兼主光山淨居寺漢陽歸元寺延之爲長老乾隆癸丑復歸雙林往來問偈談禪者率多逸人高士一時搢紳先生交推重焉法臘六十九攜履西歸法嗣敬融於本寺東爲塔以葬



清彩大和尚字嵩泉號喜雲曹洞正宗第三十六世姓路氏原籍江南康熙間徙申生九歲剃度於雙林寺禮廣慈爲師受具足戒性嗜山水以朝海取道沔湖抵金陵徧歷名山古刹與其長老尊宿講法無虛日乾隆甲辰純皇帝南巡迎鑾於浙之淨慈雲林中蒙恩賜紫旋返雙林繼廣慈主雙林方丈之席四十八年修葺藏經樓大佛殿章馱殿東西二樓老祖堂官客堂二師寮東西二山門廊房圍牆二月臺捲棚八字牆放生池並置購田園五十餘石廟制重光巍然勝境年八十三寂化其徒孫體靜爲塔葬於寺東知州區拔熙爲作誌銘體靜號煜林邑陳姓六歲禮嵩泉爲師年十八受具足大戒常朝南海慈雲徧謁古寺高僧與之往復講論旣而翻然悟曰吾道以度世爲本浪迹何爲哉於是歸主席雙林修舉廢墜廣傳衣鉢並以其餘力復興雞鳴寺直指庵覺路宏開四方宗仰年八十無疾更衣端坐而暝法嗣建塔於邑西北金牛山麓拔貢路玉階爲誌銘咸同中復有慧峴和尚戒律精嚴道行高邁邑賢士大夫皆樂從之遊亦爲雙林龍象云

了鑑和尚號空寰邑黃位中次子九歲剃度於雙林寺師雲臺上人咸豐丁巳受戒於指南同治元年主方丈席光緒丙戌任僧正司僧正嗣退

院補靈山聖壽寺教授修葺地藏寺爲養靜之所

僧廣洛字淨原系出信陽涂氏幼聰穎父母鍾愛之年數歲遭奇疾羣醫束手許祝髮病若失乃雉度於縣之城隍廟年未及冠縱觀內典輒能領悟有嚴稱大師者時爲解說慧業日進暇則怡情翰墨究心篆籀得日照丁少山婁縣杜少復指授遂臻妙品書法以北魏爲宗兼及漢分篆刻由浙西七家上追秦漢士林得其一紙一石者珍若拱璧故薦紳先生咸折節與之周旋南北冠蓋往來莫不知有淨禪師也光緒末學堂議興地方爭提廟產充經費乃至毀像滅道廣洛集其徒捐貲創佛教學堂闢發真諦保全頗多民國四年別闢叢林爲清修地建寺於城西八里工未及集而坐化僧臘五十舉人劉子榮銘其塔

僧宏貞字空塵爲邑洋河舊族王氏童年以多病捨身於城隍廟禮品海上人披薙幼好弄不拘繩檢時或兀然獨坐有如痴呆初宏貞出家與淨原同時僧歲俗齡相若而學業聲譽不逮淨原遠甚德準禪師嚴誠而激勸之宏貞頓興愧恥幾莫自容遂自號模糊燈僧面壁勤修稍涉忘情卽提耳疾呼以自警不數年業大進與淨原齊名年二十四負鉢至漢陽受戒於歸元寺定安禪師自漢歸購請佛典多種藉資探討淨

原精研淨土而宏貞獨神契禪宗時並稱二難歷充本寺監院被任爲僧正司法筵之上尊爲龍象焉晚年以地方興學亦佛教佈施之旨惟抽產之說流弊滋多乃自動辦兩等學校捐園地爲倡又與淨原組織佛教會闡揚真諦另建古佛寺於城西用資清修並籌辦地方公益慈善等事僧俗翕然淨原西歸之次年亦病發而逝壽五十一埋骨古佛寺側西來山陽僧俗送葬者八百餘人有徒明可肄業於華嚴大學頗能繼志云

燈授字性澈號慕西邑東鍾山鋪人俗姓米父本湘早逝母石氏撫之幼多病百藥不效母誓諸神捨身空門八歲難度入賢山寺禮五戒和尚爲師年二十受具足戒於漢陽歸元寺學律於大綸經師習禪於修印首座聽教於心鏡法師三年不出寺門領悟洞澈旋赴上海受業於華嚴大學月霞長老嗣移杭州海潮寺同學七十人研究大乘經典明見心性自是足跡徧歷湖州五台北京漢口復南渡海至仰光暹羅所至朝禮名藍請教尊宿所業益進壬戌春與了塵戒塵慈舟機通諸禪師開辦華嚴大學於漢口九蓮寺十方僧伽從者如雲信陽赴漢肄業者十七人啓蒙導窾成績卓著癸亥回信陽持五戒法師喪見母寺蕭條

徇衆請着手整頓慘淡經營不數月耳目煥然改觀於本寺內開一佛  
教養成學校培植後進地方兒童畢業者數十人又開一佛教圖書館  
陳列經典三百餘種各科學與雜誌又數百種縱人觀覽是時本省毀  
寺逐僧之說甚盛邑境內大叢林如雙林寺朝陽庵指南院城隍廟紫  
霞觀慈氏寺檀柏寺直指庵等皆相繼夷爲瓦礫或駐軍隊其產或飽  
學痞之囊橐或供軍閥之敲剝所存無幾賢山寺亦終日在風雨飄搖  
中廟田去十之五幕西奔走南北呼籲無效乃親敏上海佛教總會呈  
請中央轉飭豫省府取消前令一面復根據保管寺產條例聯絡紳耆  
組織保存古蹟委員會雖已收者未蒙發還而未收者已保全不少矣  
戊辰冬壬申春地方兩次災歉難民鬻集城關道殣相望幕西協助邑  
紳開辦粥廠數處親執瓢勺早作晏罷食粥者前後萬餘人閱時兩月  
事畢分別資遣回籍近年幕西念中土自鼎革以來佛學凌替思昌明  
而光大之北至開封與西航居士淨嚴禪師募建河南佛學院學子雲  
集鈴鐸相聞嗣復重新鐵塔寺白馬寺木石瓦甃之屬無不出自手營  
勞勞汴洛席不暇暖工未竣以丙子夏五月遘疾化去僧臘四十有八  
西航淨嚴爲建塔藏骨於鐵塔寺側其徒清虛復迎衣鉢歸信陽葬之

賢山南麓